

**NATIONAL ASSEMBLY OF
SEYCHELLES**

Tuesday 25th May, 2021

The Assembly met at 9 am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab e bonzour nou telespektater e oditer dan piblik ki pe swiv nou pou komans nou travay ozordi.

Nou pou annan pret serman par nouvo Manm, swit a rotasyon lekip LDS dan Lasanble. Alor mon ava apel manmzel Jany Letourdie silvouple, pou antre pou seremoni serman.

Mon a demann bann Manm pou debout pou sermantasyon silvouple.

MS JANY DE LETOURDIE

I Therese, Jany Letourdie do swear that I will be faithful and bear true Allegiance to the Constitution of Seychelles and that I will preserve, protect and defend the Constitution of Seychelles. So help me God.

(APPLAUSE)

MR SPEAKER

Mersi e byenveni Onorab Letourdie dan nou Lasanble. Onorab Letourdie i ranplas Onorab, ansyen Onorab Clive Roucou. Mon remersye Onorab Roucou pou son travay ki in fer avek nou e mon swet Onorab Letourdie en bon sezour dan nou Lasanble.

A se moman nou pou pran en poz teknik pou permet lekip Lasanble re organiz lasal pou nou kontinyen avek nou travay. Nou pou rebran nou travay 9er edmi. Mersi.

(BREAK)

MR SPEAKER

Mersi tou bann Manm. Mon annan plezir akeyir zot pou nou dezyenm trimes pou sa lannen. E en trimes ki mon ekspekte ki i pou sarze e nou pou annan bokou travay devan nou.

Mon vremen santi ki nou'n fer nou devwar dan dernyen trimes pou adres bann size ki'n devan nou, pou ranpli nou rol koman Lasanble.

Mon santi ki tou Manm in fer en kontribisyon pozitiv dan zot deliberasyon. Malgre bann moman enteripsyon e distraksyon ki reste touzour regretab.

Mon mazin nou pou kapab renouvle nou travay avek

plis zefor e plis serye. Annou pa bliye ki nou Lasanble i reste en model e en legzanp pou nou nasyon an antye.

Lo paviyon Lasanble i annan moto Linite dan Diversite. Diversite byensir akoz nou annan lopinyon diferan e nou reprezant en pep ki annan lopinyon, ki partaz lopinyon diferan. Me linite akoz nou bezwen fer sa travay ansanm pou nou pei.

En pti mo lo nouvo laranzman Lasanble, byensir zot a rekonnet ki nou'n troun dan sa formasyon ki nou'n servi pou adres *COVID*. *COVID* i reste avek nou. Bann Dokter in touzour dir nou sa maladi, sa menas pa pou al vitman, i pour reste avek nou pou detruwa lannen e nou bezwen kontinyen adapte.

Tou bann Manm in ganny en nouvo seri lenstriksyon lo bann mezir ki nou swiv. E byensir sa i bann mezir ki deza i ase familye. E i annan zis en sel, zot a lir byen e swiv sa bann mezir silvouple.

E i annan en sel prosedir ki mon oule fer, met en pe lanfaz lo la ozordi bomaten e sa se larantre pou tou Manm e tou *staff* i larantre prensipal Lasanble.

Alor re nou'n entrodwir en nouvo prosedir ki nou pou gard

en *checklist*. Tou Manm ki antre dan Lasanble koumsa nou verifye ki tou Manm in pase e in fer sa tyek tanperatir e in ranpli sa formil, ki i pe raport pou Lasanble an konesan ki i santi li an bonn sante.

E nou annan bann lenstriksyon ki mannyer pou dil avek bann lokirans ki kapab arive si bann Manm i santi zot mal.

Laranzman nou lasal byensir i en lenkonvenyans pou serten Manm e osi pou piblik. Me selman nou bezwen aksepté lenkonvenyans ki sa i anmennen.

Avek sa 2 mo koman Kominikasyon, mon ti a kontan a se moman pas laparol *Leader* Lopozisyon pou adres en size ki i ti a kontan dir en mo, lo lapar Lasanble lo la, e apre sa mon'n ofer menm posibilite pou lot kote avek *LGB*.

Me mon konpran son *Chief Whip* i anvoy mwan en pti paragraf lo la, alor nou a pas laparol avek ou apre. Onorab Sebastien Pillay.

HON SEBASTIEN PILLAY

Mersi Mr Speaker. Bonzour Mr Speaker e bonzour tou koleg Onorab e bonzour tou dimoun ki a lekout.

Premyerman Mr Speaker mon dir ou mersi pou ou bann

mo lankourazman ki ou'n donn bann Manm e ou lapresyasyon travay ki bann Manm i fer.

E lo sa kote latab e byensir mon krwar Lasanble an antye nou donn nou langazman pou nou travay e pou nou a laoter konfyans ki Lepep Seselwa in met dan nou.

Mon pran laparol ozordi bomaten Mr Speaker avek en leker lour e avek en leker santiman lakoler, me osi dezapwentman. Akoz nou tou nou'n tann koz lo oubyen nou'n ganny sans vwar lo televizyon yer swar kot ti pe koz sa *video* ki'n an sirkilasyon, ki montre serten aksyon ki mon konsider endesan e mon konsider inakseptab dan nou sosyete.

Mr Speaker mon dir sa akoz dan ou lentrodiksyon ou'n koz lo Lasanble i en model i en legzanp, me osi la pou nou *remind* popilasyon atraver sa travay ki nou fer lo lafason ki koman en sosyete nou devret pe azir.

E lafason ki koman en sosyete nou devret pe kondann bann aksyon, ki nou vwar pa al anliny avek bann valer moral, bann valer spirityel, e si oule bann valer kominoter ki nou annan koman en pei.

Mr Speaker mon santiman dezapwentman i pou sa aksyon

ki'n ganny filmen, me egal man anver sa endividi oubyen a bann endividi ki'n osi filmen sa aksyon.

I inakseptab dan okenn ka, okenn endividi ki li i annan si oule kontrol moral lo en lot endividi, sirtou enn ki pli zenn ki li pou servi sa loportinite pou filmen en tel aksyon.

Mr Speaker mon oule demann Lasanble ansanm pou nou kondann sa. E mon demann Lasanble pou fer tou kan ki pou posib pou nou asire ki bann Lotorite konsernen i fer zot lenvestigasyon pli aprofondir dan sa size, e ki bann dimoun oubyen endividi ki responsab i annan konsekans pou zot aksyon.

Mon krwar sa ki kler Mr Speaker ki nou bezwen dir ki, se pa sa Sesel ki nou'n grandi ladan e ki nou tou nou koz labous plen lo la. Sa ki nou bezwen fer se ki asire ki nou pei pa al ver en dekadans sosyal, mwan mon a anvi sa, nou Lasanble pa anvi sa.

E mon demande ki ler nou pe pran bann mezir nesese ki bann Lotorite konsernen i osi regard bann Lalwa, e bann provizyon legal ki gid bann konsekans pou bann tel aksyon.

Pour ki Lasanble i ava osi akonpanyy bann Lotorite pou

vwar ki bann sanzman neserer ki bezwen ganny fer, pou nou asire ki nou protez bann ki pli vilnerab dan nou sosyete sirtou bann ki pli zenn.

Mon demann tou Seselwa pour pa sirkil sa *video* parey sa demann in ganny fer. Mon repet sa demann e mon demann nou tou ki annan sa *video* ouswa lo zot telefonn ouswa *elsewhere* pou *delete* sa *video*, e pou nou fer sir ki en aksyon parey pa zanmen ganny met o gran piblik ankor dan nou pei.

Mon remerci ou Mr Speaker ozordi bomaten pou donn mon loportinite pou koz lo lapar Lasanble. E mon swete ki malgre ki nou annan diverzans lopinyon lo bokou size, lo sa enn size napa okenn diverzans lopinyon. Tou Seselwa i ansanm pou kondann sa ki'n arive, pou kondann en tel aksyon e pou kondann sa kalite mantalite ki mo pa krwar i annan okenn plas dan nou sosyete, dan nou Sesel ozordi. Mersi Mr Speaker.

MR SPEAKER

Mersi. Onorab Arissol. Mersi Onorab Pillay. Onorab Georges atraver ou mon a pas laparol lo ou kote.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm, tou bann dimoun ki pe ekout nou kot lakour, mon dir en bonzour spesyal Onorab Jany De Letourdie ki pe *join* nou *Caucus*.

Mr Speaker parey ou'n mansyonnen taler lo nou kote avek ou permisyon se nou *Chief Whip* ki pou fer en *statement* lo sa *video*. Mersi.

HON SANDY ARISSOL

Mersi Mr Speaker. Bonzour Mr Speaker. Bonzour tou Manm, bonzour bann Manm sekretarya e tou dimoun ki pe a lekout dan lakour. Premyerman mwan osi mon ti a kontan *welcome* nou ser Jany. *Welcome back* Jany.

E mon ti a kontan profite Mr Speaker pou nou remerciye Onorab Roucou ki'n la avek nou dan nou lekip e ki'n fer kontribisyon ekselan. Nou ti a kontan dir li mersi bokou pou son kontribisyon.

Mr Speaker mon osi mon ti a kontan lo nou kote koman *Chief Whip LDS* avek permisyon *LGB* pou nou, nou osi eksprim nou fristrasyon, eksprim nou dezapwentman avek sa *Video* ki pe sirkile ozordi.

Premyerman nou ti a kontan lans en lapel avek bann adilt sirtou bann adilt, parce i

enportan menm nou annan nou difikilte lavi pou nou toultan zet en koudey kote nou zanfan i ete, ki nou zanfan pe fer, e avek ki nou zanfan i ete.

E si en tel video in ganny sans sirkile a i montre poudir i annan kantite nou bann zenn, nou bann zanfan laba deor ki napa sipervizyon.

E mon pe lans en lapel ankor, nou komanse n pti pei kretyen, pou nou dan kominote parey nou ti fer lontan zet en koudey lo zanfan enn nou vwazen;- zet en koudey lo zanfan enn nou frer pou asire ki tou nou bann zanfan ki laba deor zot ganny sa proteksyon nesaser.

Alor mon ti a kontan pran menm laliny ki tou bann Lazans in pran Mr Speaker, menm laliny ki Onorab Pillay avek son lekip in pran pou nou kondann sa aksyon ki'n arive dan nou pei.

E nou swete e mon pe swete ki tou bann Lazans konsernen zot vwar sa ki koupab e i ganny anmennen devan lazistis. Parske souvandfwa nou tann bokou aksyon, nou ganny dir pou annan aksyon, nou ganny dir pou annan lavyasyon apre nou pa tann naryen ki arive.

E lo sa enn ki la mon krwar Lasanble pe gete Sesel pe

gete, e nou tou nou pe ekspekte i annan en keksoz ki ganny arive. E nou swete tou bann zanfan ki ankor dan lakour ki pa ankor ganny sans al lekol en bon semenn.

E nou swete ki zot pe swiv ki pe arive e nou swete ki bann paran zot pe pran tousala aker e serye. Mr Speaker mon ti a kontan remersye ou pou sa 2 pti minit ki ou'n donn nou lo nou par. Mersi bokou.

MR SPEAKER

Mersi. Mersi bann Onorab. Zot in reflekte mon lopinyon egzaktaman e mon pa bezwen azout plis ki sa avek sa. Nou a pas lo Prezantasyon Dokiman e mon apel Madanm Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. Bann Papye ki pe ganny Prezante *ce matin i comme* swivan;

S.I. 30 of 2021 Seychelles Pension Fund (Benefits) (Amendment) Regulations, 2021

S.I. 31 of 2021 Food (Temperature Control) Regulations, 2021

S.I. 32 of 2021 Excise Tax (Amendment of Schedule 1) Regulations, 2021

S.I. 33 of 2021 Secured Transactions (Filing of Notice of Security Interest) Regulations, 2021

S.I. 34 of 2021 Secured Transactions Act, 2015 (Commencement) Notice, 2021

S.I. 35 of 2021 Central Bank (Purchasable Aggregate Value of Government Securities) Notice, 2021

S.I. 36 of 2021 Tourism Development Act (Commencement Notice), 2021

S.I. 37 of 2021 Constitutional Court (Application, Contravention, Enforcement or Interpretation of the Constitution) (Amendment) Rules, 2021. Mersi Mr Speaker.

MR SPEAKER

Mersi. Sa bann dokiman i lo latab Lasanble e a laporte bann Manm. Mon pou sot *Order Paper* en pri gin pou envit Madanm Clerk pou nou pas lo *First Reading* ek *Public Bill*. Madanm Clerk.

MADAM CLERK

Mersi Mr Speaker. *This Act may be cited as the Trade of Wild Fauna and Flora Act, 2021.* Mersi Mr Speaker.

MR SPEAKER

Mersi. Aprezan nou a pas lo komansman nou travay lo

kestyon pou Minis. E mon ava envit delegasyon Minister Lasante ki pe atann nou.

Mersi. Bonzour e byenveni Minis Peggy Vidot, Minis pou Lasante e Zofisye ki avek li Dr Jude Gedeon Komisyoner Lasante Piblik e Dr Danny Louange Direkter *Public Health Agency*.

Nou pou komans avek *Private Notice Question* sorti kot *Leader* Lopoziyon, Onorab Pillay.

HON SEBASTIEN PILLAY

Mersi Mr Speaker e bonzour Minis avek ou delegasyon. Mr Speaker kestyon i lir koumsa;

I annan konsern lo sityasyon bann tes ki ganny fer pou *COVID* e serten alegasyon ki lakantite *rapid test* pou *COVID-19* in desann dan en fason drastik. Eski Minis pou Lasante i kapab eksplik nou Lasanble:

1) Akoz ki lakantite *rapid test* in ganny diminyen e eski se sa ki pe fer ki lakantite ka *COVID-19* ki pe ganny raporte pe desann?

2) Dapre serten lenformasyon Direkter Laboratwar Lasante Piblik in pran son konze, eski in fer sa volonterman oubyen eski in ganny en demann ki'n fors li pou pran son koze, akoz sa

sityasyon lakantite tes pou COVID-19?

3) Prenon kont ki tes pou COVID i enportan dan sertifikasyon *cause of death* en dimoun, akoz ki Minister Lasante pe ganny difikilte pou sertifye lakoz bann lanmor avek COVID parey bann *Policy WHO* i demande? Mersi Mr Speaker.

MR SPEAKER

Mersi Onorab Pillay *Leader* Lopozisyon. Minis mon envit ou pou reponn.

MINISTER PEGGY VIDOT

Mr Speaker. *Leader* zafer Gouvernman dan Lasanble Nasyonal, *Leader* Lopozisyon, Manm Lasanble Nasyonal, tou dimoun ki a lekout bonzour.

Mr Speaker repons kourt pou sa premye kestyon se non, sa bes dan bann ka i pa akoz nou pe fer mwens tes, me plito akoz bann ka pe reelman desann.

I annan 2 kalite *rapid test*, mon prezimen ki Onorab pe fer referans avek tes *antigen*. Dapre stratezi teste ki lasante piblik in met an plas; letan en dimoun i prezant kot en sant lasante avek sentonm e ki son bann sentonm i resanble ki sa dimoun i kapab ganny COVID, en tes rapid pou antizenn i ganny fer.

Si sa tes i negativ, en sityasyon pou fer en santiyon pou fer en tes PCR i ganny pran e en tes i ganny anvoye kot laboratwar. En tes rapid pou *antigen* i permet lasante izol sa dimoun pli vit posib e tir li an sirkilasyon pou ede kas sa lasenn transmisyon.

Adisyonnelman ler nou annan en lepidemi ler nou annan en *surge* parey nou ti annan, i rekomande ki ou fer ou tes rapid akoz sa i ed ou pou izol dimoun pli vit. Nou konnen osi ki bann tes antizenn i ase presi. Komansman sa pandemi tes antizenn pa ti servi sa gran kantite, akoz ti annan serten konsern lo zot efikasite e spesifisite.

Me depi Septanm lannen pase, WHO in fer resorti poudir kalite tes antizenn ki pe ganny fer i bokou pli efikas, e alor en kantite i ganny plis servi ki oparavan. E nou nou'n fer serten konparezon pou diferan, avek kantite dimoun ki nou'n teste avek tou lede tes, nou'n war poudir i rezilta i tre konparab.

Dan sa 2 dernyen semenn, in annan kekfwa dan sa dernyen semenn sirtou, in annan mwens dimoun ki'n vin kot sant, kot nou apel sa kot sant ki nou teste bann dimoun ki annan sentonm. E *obviously*

si i annan mwens dimoun i annan mwens tes ki ganny fer lo sa bann dimoun.

I annan mwens kontak ki'n vini, akoz zot osi zot napa sentonm e pa bokou ki'n vini. Me i annan kantmenm ki'n vini pou zot fer ot tes. Alor i annan en serten bes dan demann pou tes.

Me nou osi fer remarke poudir tes i ganny fer lo dimoun, tou dimoun ki antre lopital, tou dimoun ki vin maternite. Nou fer tes regilyerman lo en bann travayer ki nou dir bann *frontline*, tel ki travayer lasante, pou osi ed nou dan nou sirveyans pou regarde si i annan dimoun ki pa neserman annan sentonm me ki kapab teste pozitiv.

Alor an mwayenn, nou fer en bon pe tes. Zis pou dir zot par egzanp dan sa dernyen mwan dan Baie Lazare nou'n war nou'n fer 515 tes.

Dan Glacis nou'n fer 673 tes.

Dan Mont Fleuri nou'n fer 1068.

Sa 3 sant kot nou ti pe dir s bann *fever centers*. So ou vwar poudir kantmenm i annan ase tes ki pe ganny fer. E nou fer tes partou dan ankor diferan ankor lezot sant. An mwayenn nou fer 300 a 600 tes *PCR* dan laboratwar.

Nou osi resevwar bann rezilta ki sorti dan landrwa kot i fer tes swa antizenn swa *PCR* dan bann klinik prive ou si non bann landrwa prive ki'n demann permisyon pou zot fer antizenn.

E nou konnen nou annan an se moman 4 laboratwar ki fer sa bann tes. I annan laboratwar kot nou menm *Public Health*;- i annan laboratwar kot *Euro Medical*, nou annan laboratwar *Seychelles Medical Services* e nou annan osi laboratwar *Orthrus*.

So tou sa bann landrwa pe fer tes antizenn *as well as* tes *PCR*. Apre nou annan nou omwen dizyenm lezot landrwa ki fer zis tes antizenn. So i annan en kantite tes antizenn ki pe fer dan pei.

Fodre note osi ki dan bokou pei zot pa pe fer tes lo dimoun ki'n ganny tou lede sa vaksen si zot en kontak. Me nou isi nou pe *still* fer. Akoz pou nou i enportan ki nou fer sa *contact tracing* pou nou kapab al kas sa lasenn transmisyon. Akoz nou pei i ptipti e i esansyel koman par nou bann mezir ki nou'n met an plas lasante piblik.

E ler nou regarde bes dan ka *COVID* ler nou egzamin bann lezot endikater, nou vwar

poudir sa osi i montre nou poudir i annan en bes dan kantite ka. La kantite ka ki nou pe admet lopital in desann dan sa dernyen semenn.

E si konmela sa bann dimoun ti malad dan zot lakour ki nou pa'n teste zot, zot pa ti pou kapab reste malad, zot ti pou vini pou zot vin rod tretman. Nou vwar osi letan nou egzamin nou *positivity rate*, sa osi i desann. Akoz i montre poudir napa sa gran kantite ka ki pe releve. Alor nou santi poudir sa i vreman reel bann sif ki nou pe donnen.

Mr Speaker laboratwar Lasante Piblik pou mwan reponn dezyenm kestyon, i enn bann laboratwar ki'n ganny bokou lenvestisman e kapasite, pou li fer plizyer kalite tes ki bezwen dan sant piblik e non pa zis *PCR* pou *COVID*.

Sa laboratwar i annan en tim travayer ki dinamik, ki byen formen. Zot in vreman annan en rol kle pou zwe dan sa pandemi, pou ede pou debiste tou sa bann ka maladi. Sa laboratwar i annan son prop sistenm kontrol entern, me i osi fer bann kontrol eksteryer avek bann laboratwar referans ki aletranze resaman.

Mon plis ki sir bokou zot in antann, nou'n vwar i annan bokou konsern ki ganny sorti lo

sa Laboratwar Lasante Piblik. Dimoun in menm komans kestyonn kredibilite nou rezilta, akoz zot dir ler zot in ganny en rezilta pozitiv kot nou, zot in ale zot in ganny en rezilta negativ en lot landrwa.

Zot in eksprim serten mekontantman avek letan ki nou pran pou donn zot en rezilta. E sa bann konsern in ganny fer parmi nou popilasyon osi byen ki serten viziter ki'n vin dan nou pei.

Alor koman en antite avek responsabilite e swivan tou sa bann konsern, nou'n vwar li neser pou nou fer en revi dan nou diferan prosedir laboratwar.

Dan fonksyonman laboratwar otour lemond, sa i en keksoz ki ganny fer normal, e menm nou laboratwar isi nou annan en serten odite ki ganny fer toulezan par *WHO*.

Sa revi pe ganny fer dan en fason profesyonnel par 2 eksper endepandan. Pou asire ki sa revi i ganny fer totalman lib e endepandan, Direkter Laboratwar in ganny demande pou pran son konze, pandan peryod ki sa revi i a ganny fer ki kapab fer detrwa semenn.

Atraver sa revi, nou ekspekte ki nou pou war ban pratik ki bon e ki nou ti a kontan ranforsi. Me nou

ekspekte si i annan okenn defi, okenn *weaknesses*, i ava osi montre nou kote ki nou bezwen ranforsi, amelyore e met an plas sistenm ki nou bezwen pou fer ki nou laboratwar i vin kredib e ki i osi tenir en serten repitasyon.

Akoz ler nou regarde se sa laboratwar ki annan manda pou regle tou lezot laboratwar ki pe ganny formen isi Sesel. Alor pou nou, in enportan ki sa i ganny fer.

Mr Speaker pou trwazyenm kestyon, i koz lo sertifikasyon lanmor avek *COVID*. Me avan ki mon koz lo la, lo mon non e lo non Minister Lasante mon ti a kontan eksprim nou kondoleans pou tou fanmir ki'n ganny touse dan en fason ou en lot, avek dimoun ki'n kapab perdi zot lavi avek *COVID*.

Mon asir sa Lasanble ki koman en travayer Lasante e osi koman Minis, e nou tou ki travay dan lasante nou annan en gran sagren a sak fwa ki en dimoun i perdi son lavi.

Akoz nou rol se vreman pou nou sov lavi. Me nou realize poudir parfwa i annan keksoz ki *au dessus de nous*. Me alor *mes condoléances* a tou dimoun ki'n ganny afekte.

Mr Speaker wi tes pou *COVID* i enportan dan

sertifikasyon lakoz lanmor en dimoun. Me en dimoun ki'n mor e ki'n teste pozitiv pou *COVID* pa neseserman vedir ki in mor ek *COVID*. Sa dimoun in kapab mor ek en lot kondisyon ki pa asosye avek *COVID*.

Alor i enportan, pou fer sir ki sa lanmor ki'n arive i aköz *COVID* e non pa par en lot kondisyon. Teste pozitiv pa vedir dimoun i annan maladi *COVID* ki aktiv. E menm en tes ki pozitiv i kapab pe detekte en lenfeksyon ki sa dimoun in gannyen en bon pe letan pase.

Lasyans i dir nou menm 3 mwan apre ou ankor kapab pe teste pozitiv me pa sa vedir ou en ka aktiv. Si nou pran en legzanp en dimoun kekfwa ki'n ganny aksidan e ki'n mor par sa aksidan, e apre i teste pozitiv nou pa kapab dir poudir *COVID* ki'n touy li toudswit.

I son lanmor i kekfwa bann domaz, bann *injury* ki in gannyen dan son aksidan. Alor i enportan ki sa bann envestigasyon sa bann *assessment* i ganny fer.

Minister Lasante in adopte *deed* e prosedir ki baze lo Polisi *WHO* pou definir lanmor ki koze par *COVID*. Sa prosedir pou sertifye lakoz lanmor avek *COVID* i pran letan dan plizyer ka.

I enkli en evalyasyon kondisyon lasante sa dimoun avan ki i ti mor e osi bann faktor lasante piblik tel ki kontak sa dimoun in gannyen dan son bann dernyen 5 zour. Sa i kapab pran en bon pe letan.

I pran plis letan ankor, ler parkour maladi sa dimoun, i pa toultan kler;- par egzanp annandler si i annan en dimoun ki pe viv li tousel, ki dimoun pa konn son maladi, i pa konnen ki latizann i pe pran, pa konnen koman in ete dan sa bann dernyen zour.

Sa i fer ankor ki i pran en pe plis letan pou sa lekip ki'n egzamin sa bann ka. Akoz i pa zis en dokter. I en lekip dokter avek diferan lekspertiz ki analiz sa ka, e fer en desizyon, si sa ka i *COVID* ou si non sa dimoun pa'n mor avek *COVID*. Menm si i ti kapab pozitiv letan ki i ti'n mor.

Alor sa bann faktor ki vreman enportan pou fer sa bann analiz e sak ka i ganny deside lo en baz endividyel. Mersi Mr Speaker.

MR SPEAKER

Mersi Minis. Mon pou prezan ouver lasal pou kestyon siplemanter pou en peryod. Mon rapel bann Manm ki kestyon siplemanter i devret lo size ki dan sa kestyon orizinal.

Se pandan nou'n envit Minis isi, nou'n envit son delegasyon isi e mon pa anvi limit enteraksyon ki zot annan. Mon pou permet en pe liberte dan bann kestyon ki demande. Be selman i a toultan desizyon Minis pou deside si i kapab reponn, lo en size ki al an deor sa kestyon orizinal.

Mon a demann bann Manm ki dan milye lasal ki zot bezwen al deryer lo *podium* e mon a dir zot evite tous *podium*, evite tous *micro* e i annan *wipes* lo *podium* pou zot donn en pti *sanitizing podium* ler zot fini koze.

Avek sa mon an envit Onorab Pillay, si i annan kestyon siplemanter pou fer li la avan ki mon pran lezot Manm.

HON SEBASTIEN PILLAY

Mersi Mr Speaker. Mersi Minis pou ou larepons. Mr Speaker mon annan detrwa klarifikasyon ki mon ti a kontan ki Minis i aporte pou nou ozordi bomaten.

Premyerman, eski Minis i kapab dir nou an relasyon avek sa bann tes ki pe ganny fer dan sa bann lezot laboratwar. Lkel bann lezot laboratwar ki zot in anvoy okenn tes pou fanny fer? E eski i lentansyon Minister Lasante pou servi sa bann lezot laboratwar?

Oubyen pou demann bann viziter oubyen lezot dimoun, pou al ver sa bann laboratwar pou fer zot bann tes, malgre ki sa bann laboratwar Minis i ava koriz mwan si mon mal, zot pa bann laboratwar akredite avek *WHO*?

E konbyen i koute pou fre enn sa bann tes? E mon swete ki i pa lentansyon Gouvernman pou pandan letan ki nou annan sa revi, pou anvoy bann tes kot sa bann laboratwar i bezwen peye?

Akoz si nou kalkil 300 tes 600 tes i vedir R600mil ki sa laboratwar pou fer lo sak batch tes ki pou ganny fer. Mon annan en lot klarifikasyon Mr Speaker lo mon dezyenm parti kestyon.

Minis in reponn nou e in dir nou ki i annan en revi ki pe ganny fer lo Laboratwar Lasante Piblik be sa ki mon pa ganny en konpran Minis se, akoz ki sa lenformasyon pa ti ganny donnen oparavan? Akoz sa pa ti ganny dir ler sa kestyon ti monte dan bann konferans lapres?

Akoz sa lenformasyon pa ti ganny donnen? E lekel sa 2 eksper ki pe fer revi lo Laboratwar Lasante Piblik? Kote zot sorti, ki zot akreditasyon, e lekel lorganizasyon ki'n anvoy zot isi?

E mon trwazyenm siplemanter Mr Speaker si ou a permet mwan, mon vwar ki la mazorite pei in etabli en protokol vizavi rapor lo lanmor avek *COVID*, sa ki nou'n vwar i *CDC* se ki i enn bann ka referans ki nou sistenm lasante i kontan servi li osi i annan enn.

Akoz ki Sesel pa ankor kapab etabli enn li osi? Ki ava fer ki rapor *reporting of* bann ka kot dimoun i mor ek *COVID*, ou ava apresye Minis ki si en dimoun i antre lopital i byen, me i annan en problemm asosye, e i atrap *COVID*, me i perdi son lavi, i annan en responsabilite la *somewhere* ki ganny *ascribe*.

E zis an pasan Mr Speaker mon oule *remind* Minis ki mon'n ganny pa mal konplent ki ou'n koz lo sa zafer izolasyon pou zot izol dimoun, mon'n ganny pa mal konplent ki dimoun ki'n fini fer tes i re ganny anvoye dan lakour pou al ganny izole dan zot lakour menm si lakour i bann gran, gran lakour i annan plizyer dimoun ladan?

So mon pa pe tro ganny en konpran ki kalite prosedir ki zot pe servi ki, ler ou pe dir mon ki lakantite ka pe desann me selman dimoun pe izol zot lekor dan bann lakaz ki bann gran lakour, e dimoun pa pe vin

devan pou tes, ki mannyer nou kapab fer sa *statement*? Mersi Mr Speaker.

MR SPEAKER

Mersi Onorab Pillay. Mon a rapel bann Manm, 2 pwen siplemanter silvouple si zot leve. Minis ou ava adres sa bann pwen.

Mersi Mr Speaker. Onorab mon a esey pran ou bann kestyon enn par enn. Ou'n demann nou lekel laboratwar ki nou'n servi pou fer serten tes pour Minister? Wi nou'n servi laboratwar *Euro Medical* e laboratwar *Seychelles Medical Services*.

Akoz parey nou fer a toultan letan nou pe konpar rezilta, avan par egzanp nou donn en laboratwar sertifika pou li fonksyonnen, nou'n anvoy serten tes pou nou vwar ki kantite *concordance* nou gannyen avek rezilta sa bann tes?

Nou'n anvoy tes kot *Euro Medical* e nou'n anvoy tes kot *Seychelles Medical Services*. E pour sa bann tes ki nou'n anvoye i napa en gran kou, aköz par egzanp i annan en laboratwar ki pa'n sarz nou e en lot laboratwar ki ansarz nou pou zot *reagent*.

I enportan aköz nou oule vwar ki si rezilta dan 2

laboratwar i balanse, ki kantite *concordance* ki i annan pou nou konnen poudir si tes rezilta i kapab kredib. Si ou demann mwan aköz ki nou pa'n anonse poudir nou pe fer en revi? Nou fer revi dan diferan kantite seksyon kantite landrwa dan Minister Lasante.

A sak fwa ki nou fer enn, nou pa neserman pibliye, me mon konnen ki sa kestyon in ganny demand dan konferans depres e dokter Gedeon in adres sa kestyon.

An term lekel sa de dimoun? Koman ou konnen an se moman napa bokou dimoun ki pe voyaze. Nou annan 2 Seselwa ki annan lekspertiz dan sa domenn e nou'n servi zot lekspertiz;- enn i Mr Jude Shroff, e lot i Ganassa Kumar ki travay e ki *head* nou laboratwar *Quality Assurance* pour teste bann medikaman ki nou gannyen isi Sesel.

Akoz nou pa'n adopte en protokol pou nou kapab sertifye lanmor ou si non, ou'n sit *CDC*? Me pour nou, nou panse ki nou travay pre ek *WHO*, e *WHO* osi koman en lorganizasyon *United Nations* ki annan *lead* dan lasante, ki nou prefere adopte gidans Polisi *WHO* pou fer sa.

Eski nou kontinyen met dimoun dan izolasyon dan lakour? Mon panse ki pou nou

dan sa letan kot nou'n ganny bokou ka, nou pa ti pou annan sifizaman landrwa pou nou izol tou nou bann ka.

E pour sa rezon parey i leke dan diferan pei, ka ki nou'n vwar nou'n demann zot pou izol dan lakour avek serten gidans ki zot in gannyen. E mon kapab dir poudir nou enn bann tre pe pei ki ziska prezan, nou'n izol dimoun ki an karantenn, dan en lotel, ou sinon dan en fasilite ou sinon dimoun ki'n ganny teste pozitiv.

La mazorite pei si ou pozitiv ou reste dan lakour, ou izol ou dan lakour. Alor pou sa rezon nou osi nou'n vwar poudir nou kapab adopte sa prosedir sirtou dan letan kot nou'n annan en *surge*. Mon krwar sa i la mazorite repons pou ou bann kestyon Onorab.

MR SPEAKER

Mersi Minis. Nou a pas lo lezot Manm silvouple Onorab. Amwen ki ou kapab fer li vitman, mon pa pe permet ekstra kestyon. Ale si ou bezwen en klarifikasyon lo en keksoz ki'n pase.

HON SEBASTIEN PILLAY

Mr Speaker mon pe zis demann ou permisyon pou ki ler ou fini pas lo lezot Manm pou mon kapab re vin lo en pwen

klarifikasyon. Mon pa oule pran letan Lasanble pou anpes lezot Manm demann zot kestyon.

Me mon pe demann ou permisyon pou mwan kapab ganny en dernyen sans pou enn de dernyen kestyon avek Minis apre ki lezot Manm in ganny loportinite pou demann zot kestyon. Akoz si mon fer li la, i riske fer keksoz bokou pli long.

MR SPEAKER

Wi, me selman letan pou kourt. Onorab Woodcock.

HON WAVEL WOODCOCK

Mersi Mr Speaker. Bonzour Minis, tou Manm e tou dimoun a lekout. Minis mon premye kestyon i baze annefe en statement ki ou'n fer ler ou ti pe reponn kestyon Onorab *Leader* Lopoziyon.

Minis ou'n koz en pe lo konsern piblik lo kredibilite bann tes, e vre i annan konsern piblik ki i annan konsern ki bann *anomaly* dan la kantite ka *COVID* pour sirtou premye semenn Me, ki pli o ti'n ariv 324 le 7 avek osi le 8 Me.

E i annan bann alegasyon sabotaz angiz pou ogmant la kantite ka *COVID* dan pei. Alor mon kestyon i, eski in annan okenn *anomaly* ouswa sabotaz

pou ogmant la kantite ka *COVID*?

Annefe parey ou'n mansyonnen osi poudir i annan ennler sa, mannyer ou kapab dir sa, kot i annan bann *case* kot parey bann dimoun in al kot Laboratwar Lasante Piblik, zot in teste pozitiv. Me apre ler zot in *cross-check* avek lezot klinik prive, ou'n war poudir plizyer sa bann dimoun...

MR SPEAKER

Onorab ou kestyon i long silvouple.

HON WAVEL WOODCOCK

Yes sir, wi so alor Minis eski ou kapab konfirm avek nou, ouswa donn nou lenformasyon si in annan bann *anomaly* ouswa si sa bann alegasyon sabotaz i kredib i vre? Mersi.

Mon dezyenm kestyon i annan en lot konsern deor la Minis, kot i konsern bann dimoun ki'n fer *PCR test* ki zot ion pozitiv, zot in 2 semenn dan izolasyon e dapre bann Lasante Mondyal zot dir ki zi en dimoun in fer 14 zour i pa pou *infectious*.

Me ki'n arive bann dimoun apre ki zot in sorti dan zot izolasyon, zot in an kontak avek en dimoun ki pozitiv dan enn de semen, apre ki zot in sorti dan izolasyon menm en mwan. Zot

in re ganny demande pou fer *PCR test* ankor.

Me dapre konpran en dimoun ki'n menm si i pa *infectious* i *still* kapab annan sa viris dan son lekor. Eski i normal pou sa bann dimoun fer, refer tes *PCR*, eski sa i pa pe osi ede pou ogmant la kantite ka *COVID* ki nou'n rikorde sirtou pandan sa mwan Me? Mersi.

MR SPEAKER

Mersi. Minis, e Minis mon a rapel ou ki ou bann zofisyete si ou anvi zot entervenir e oubyen zot anvi entervenir ou kapab fer sa.

MINISTER PEGGY VIDOT

Mersi Mr Speaker. Mr Speaker kestyon e eski nou'n annan *anomaly* konparezon avek bann tes ki'n ganny fer dan nou laboratwar ek tes ki'n ganny fer dan laboratwar prive.

Wi in annan e, me sa i kapab annan diferan leksplikasyon. Akoz en dimoun i kapab fer tes diferan landrwa dan menm zour annan diferan rezilta.

I tou depan lo ki mannyer son *sample* in ganny pran, keler ki in pran *sample* ki letan dan son lenfeksyon, ki kantite viris i pe *shared at the moment* ki *sample* in ganny pran. So in annan serten anomaly.

Eski mon kapab dir ki sa bann anomaly ki nou'n war i en sabotaz. Nou pe dir poudir nou bezwen fer en revi nou prosedir, me alor mon pa pe kapab fer sa kalite lakizasyon sabotaz.

Me sa ki mon pe dir poudir an vi ki i annan konsern nou'n bezwen deside fer serten revi pou nou fer sir ki ler nou pe donn en rezilta, nou rezilta i kredib.

Si konmela en dimoun in ganny lenfeksyon in teste pozitiv enn fwa, in dan izolasyon i sorti e i ganny ankor en kontak, eski nou fer en lot PCR? I si ou en kontak sirtou si ou en *high risk contact* e mezir an se moman se ki ou fer en lot tes.

Me nou konnen poudir nou annan ka ki dimoun in ganny enfekte me selman nou pou osi regard li pa zis avek en tes pozitiv. Me sa kot nou pou bezwen pe fer sa ki nou apel en *case investigation*.

Pou regarde si i annan lezot keksoz ki pou dir nou poudir la ou en *case* avek en *re infection* e pa en *case* kot ou ankor annan bann *remnants* dan ou lekor ki donn ou en tes pozitiv.

So sa i lafason ki nou adres sa bann sityasyon. Mersi Onorab.

MR SPEAKER

Mersi. Onorab Vidot.

HON AUDREY VIDOT

Mersi Mr Speaker. Bonzour Minis ek ou delegasyon, tou Manm Onorab e tou dimoun ki a lekout. Minis letan ou travay anba presyon i normal e nou konpran ki parfwa dan nenport ki travay ki ou fer, presyon i arive parfwa i annan fot.

Mwan mon konsern ki annan ki kestyon pou vini, se ki letan ou'n dir izolasyon kot lakour, i byen ki ou pe seye, nou konpran poudir zot napa landrwa pou izol dimoun, e met dimoun karantenn, e dimoun i ganny anvoye kot zot.

E nou popilasyon Sesel nou konn tre byen poudir dan bann lakour, lakantite lasanm ek akomodasyon, kantite dimoun ki reste dan en lakour i vin en konsern.

Mon dir sa aköz, mon donn en legzanp mon annan en dimoun dan mon distrik ki li kot i ti travay i konnen poudir en dimoun pros ki in an kontak avek en koleg in teste pozitiv. Me personn pa'n kontakte li pou *contact tracing*, li in al lo li menm.

Ler in al lo li menm in vwar poudir in teste pozitiv e tou dimoun kot li in teste apre

letan in teste pozitiv. Si li i pa ti ale i ti kapab afekte lezot.

MR SPEAKER

Onorab fer li kourt silvouple, avans nou kestyon plis.

HON AUDREY VIDOT

Dezyenm mon lot konsern se ki si sa bann dimoun letan i annan zot ki pa pe ganny fer sa tes. E zot pe kontinyelman ganny demande pou vin travay zot al travay e zot dan bann landrwa par egzant swa kot *IOT*, swa kot *STC*, swa kot *Rosebelle* dan bann landrwa legzanp ki mon konnen dimoun i frekante e i fasil ankor pou kontinyen propaze.

Alors eski letan nou pe limit la kantite tes ki pe ganny fer, i pa pe ankouraze pou fer plis ka? *Ok?* E ki apre pou vin en dezas pou Lasante kapab annan kontrol lo la? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Onorab pou ou kestyon. Onorab ler en dimoun i teste pozitiv, sa dimoun i ganny apele e i ganny entervyou, ki i fer ki i ganny demande non son bann kontak.

Alor tou kontak ki non i donneren i ganny swivi. Si par

egzanp sa dimoun in swazir pou li pa donn en non, kot nou kot Lasante nou pa pou kapab konnen poudir sa ti en kontak.

Nou osi konnen poudir i annan dimoun ki dir “ler i telefonn ou dir li mon en kontak pou mwan kapab pa al travay.” Sa osi i arive. Me tou non ki nou gannyen nou sey kontakte e nou sey *assess* son risk an term kontak.

Akoz nou war poudir i annan dimoun pa tro konpran definisyon kontak. Mon zwenn avek ou la en pti kou kekfwa deor mon'n koz ek ou en 5minit, apre ou dir mwan poudir mon en kontak e mon vin teste. Be ou pa'n annan sa kontak ki ase esansyel pou ou kapab ganny sa, anmas sa viris.

Alor nou bezwen fer serten *assessment* lo lekel ki kontak e lekel ki pa kontak. Nou osi konnen poudir nou demann dimoun limero telefonn, pou nou kapab kontakte sa dimoun pou nou kapab kontakte sa dimoun.

Souvandfwa nou ganny limero ki pa vre, limero ki mal. Nou'n bezwen demann en kantite fwa al ver bann diferan lezot organizasyon tel ki; *Community Development*, tel ki *DA's office* pou nou kapab rod sa dimoun pou nou kapab kontakte li.

So i annan kantmenm pa mal defi ki nou rankontre ler nou pe fer *contact tracing*. Ler nou pe fer osi ki sa dimoun i pozitiv, nou demann zot kestyon lo zot lakour. E bann dimoun ki nou war i annan risk ki o, nou annan ankor servi Avani, Ile Du Suet pou nou izol zot.

E si zot donn nou en kont ki zot ok, ki zot lakour i byen e ki nou pa arive kapab al vizit tou sa lakour nou bezwen pran sa ki zot dir koman laverite.

An term ki dimoun i al travay nou pa pe limit, mon ti a kontan refer sorti nou pa pe limit kantite ka, tes ki nou pe fer. Nou pe fer tes kan i apropiye.

Si en dimoun i ganny kontak ozordi, i vin demen kot klinik pou li fer en tes, nou donn li konsey poudir sa moman letan pa ankor ase, pou li kapab fer tes. I pou zis en tes ki pa pou donn nou en rezilta ki vyab.

Akoz i bezwen en serten letan avan ler i devlop sa viris. Alor nou pa pe limit tes. Me si sa dimoun li i teste pozitiv nou dir li poudir i pa merit al travay. E ler i sorti dan son letan izolasyon, i ganny en sertifika poudir in ganny tel kantite zour dan izolasyon.

So si son anplwayer i fors li, i annan tou drwa pou li refize si nou, nou'n dir li fodre i reste an izolasyon. Me i en kestyon *enforcement*. *Obviously* nou pa pe kapab vey tou dimoun ki'n teste pozitiv e ki nou'n met an izolasyon.

Me bann ka ki bezwen ale akoz zot lakour pa akseptab pou zot reste pou zot izole, dek ki zot dir nou, nou *still* met zot Avani ou sinon Ile Du Suet. Mersi.

MR SPEAKER

Mersi. Onorab Hoareau.

HON JOHN HOAREAU

Mersi Mr Speaker. Bonzour Minis ek ou lekip. Minis an tan pou nou konpran en pti pe nivo *coverage* lo deteksyon pou kas lasenn transmisyon. Eski ou kapab donn nou si ou annan statistik lo par tet zabitan oubyen *per capita* si ou annan, la kantite tes ki'n ganny fer pou deteksyon *COVID*?

E antan ki Minis pou Lasante pou sa dernyen 7 mwan, mon ti a kontan konnen si ou satisfè avek nivo *coverage* sa bann tes e si i fer nou en sours lafyerte pou nou konnen si nou parmi bann pei lo lemond ki'n fer pli byen dan sa domenn. Mersi.

MR SPEAKER

Mersi Onorab. Minis.

MINISTER PEGGY VIDOT

pou ou kestyon. Koman en pei nou annan en stratezi pou teste e ziska prezan sa ki mon kapab dir nou kapab *workout* son kantite ki par latet, i apros san sa ki dan laboratwar Gouvernman kot *Public Health* nou'n fer i apros son ansanm avek *PCR*, ansanm avek *antigen* i aprosan 115mil tes.

Me nou konnen osi poudir lezot laboratwar parey *Euro Medical*, parey *SMS*, e in fer bokou tes zot osi, e mon napa sa *number* la pou donn ou. En kantite landrwa omwen en dizyenm, en 10 lezot landrwa travay oubyen antite ki fer tes antigen.

Par egzanp bann dimoun, bann landrwa kot parey *Hunt seafarers* kan i antre nou annan Dr Jivan ki fer, nou annan *Victoria Clinic*. So nou annan o mwens en 10 lezot landrwa ki fer *antigen*. Alor mon santi poudir in annan o mwens zis kot nou 1. Keksoz tes [par latet popilasyon.

Eski i sifi ou dir mwan? Idealman dan enn bann keksoz ki pei i fer se *test, test, test as much as possible*. Alor si nou kapab fer plis tes ou si nou ti a kontan fer plis tes wi, me nou

bezwen kantmenm mazin resours ki nou bezwen pou fer sa bann plis tes e kan ki i neserer.

Annou sanz nou Polisi an mezir ki pandemi i evolue. Mersi.

MR SPEAKER

Mersi. Onorab Gabriel.

HON CONRAD GABRIEL

Mersi Mr Speaker. Welcome Minis, panel ek ou delegasyon. Minis on kestyon i swiv en pti pe kestyon Onorab Vidot. Konsernan izolasyon kot lakour.

Plizyer lenstans i annan petet fanmir antye ki ganny mete an karantenn kot lakour, sa i ganny fer ki i annan bann problem ki arive apropo sa kot, i annan ki mank manze, mank keksoz *basic needs* sa lakour, enn de keksoz ki napa, e zot in ganny dir pa bouze.

Petet Minis zis klarifye nou, lekel petet lorganizasyon ki responsab petet ler en fanmir antye in ganny mete an karantenn? Lekel ki sipoze get zot en pti pe pou vwar ki zot pe fer.

Akoz bokou nou, mon krwar bokou *MNA* la in ganny *calls* poudir ek bann *constituent* kot zot in ganny mete an karantenn, zot napa naryen ki

zot pou fer ensidswit, ensidswit
....

MR SPEAKER

Onorab Gabriel ou pe al longman an deor size. Ou'n demann ou kestyon, kontinyen avek si ou annan lot pwen e nou a permet Minis donn en repons.

HON CONRAD GABRIEL

Petet se sa en pri pe mon konsern, Minis petet sa *COVID Relief Fund* petet ti a *enlighten* nou lo la ki mannyer pou ganny distribye petet a sa pwen. Mersi.

MR SPEAKER

Mersi Minis. Kestyon kalifikasyon. Ki byensir i an deor *scope*, me *please* fer sa ki ou kapab.

MINISTER PEGGY VIDOT

Mersi Mr Speaker. Mersi Onorab. Avan ki nou'n pran sa desizyon pou izol en fanmir, nou'n fer diskisyon avek diferan partner. Enn bann gran *partner* ladan se *Local Government*.

Nou'n annan *meeting* ek zot e nou'n demande, i annan *Local Government Red Cross*, e sa bann aktivite pe ganny dirize, kordinen par *DRDM* e sa a sak fwa ki en dimoun i ganny mete i ganny dir poudir zot

kapab *call* zot *Local Government* e *DRDM*.

E menm dan bann *press conference* toultan Dr Gedeon letan in anons sa bann mezir, in anonse osi poudir se sa mekanizm ki nou'n met an plas. Alor dimoun i konnen poudir zot pe kapab *call* kot zot *DA* e ganny serten lasistans dan term ki kalite led zot kapab gannyen. Mersi Mr Speaker.

MR SPEAKER

Mersi. Onorab Gill? Mon ava al kot Onorab Cosgrow

HON WALLACE COSGROW

Mersi Mr Speaker. Bonzour Minis, bonzour le 2 Dokter, bonzour tou Manm Onorab, bonzour tou manm piblik ki pe ekoute.

Minis mon kestyon i konsernan bann tes ki pe ganny fer. Ou'n dir Minis ki bann tes i ganny fer dan Laboratwar Lasante Piblik e osi dan bann lezot laboratwar.

Eski i annan okenn bann protokol par egzantp pou raport, ki bann protokol pou raport bann ka pozitiv, ouswa la kantite tes ki ganny fer avek bann laboratwar prive osi?

Pour ki nou a kapab annan en pli bon statistik lo lakantite tes ki'n ganny fer e la kantite ka ki ganny raporte.

Dan menm laliny ou'n dir i annan 1.ekek zabitan, 1.ekek tes par *tete d'habitan*.

Konbyen ladan Minis ki etranze? Akoz zot pe osi fer tes pou bann etranze. So i pa neserman vedir ki se sitwayen Seselwa ki pe ganny teste, ki'n fer sa nivo tes kot i ete ozordi.

Dezyenm Minis normalman ler nou fer en rev i dan en landrwa, nou bezwen son *top person* pou li kapab dir nou, pou li kapab ed nou avek en rev i. Sel sityasyon kot mon konnen ki letan ou fer rev i ou tir sa dimoun la, pou li pa enfliyans sa rev i se si i annan en keksoz mal ki'n pase, ouswa ou per pangar i enfliyans sa rev i negativman.

So pou mwan mon pa ganny en konpran akoz ki Direkter Laboratwar Lasante Piblik i ganny *removed* pandan en sityasyon kot rev i? Akoz demen i pou tournen li, i pou bezwen kapab enplimant sa bann rev i.

So eklersi en pti pe dan sa zafer rev i, akoz mon pa krwar nou'n ganny en bon larepons Lasanble.

E Trwazyenm Minis...

MR SPEAKER

Eskiz mwan, eskiz mwan Onorab Cosgrow.

HON WALLACE COSGROW

Ok mon a tenir Mr Speaker.

MR SPEAKER

Mon'n dir 2 pwen klarifikasyon, e ou dezyenm pwen osi Minis in deza adrese, me selman mon ales sa devan li. Minis.

MINISTER PEGGY VIDOT

Mersi Onorab. Mersi Mr Speaker. Ki protokol? Nou annan en protokol ki nou donn tou laboratwar avan ler zot ganny sertifika pou zot kapab fonksyonnen dan Sesel. Zot bezwen raport li *on a daily basis* kantite tes ki zot in fer, e kantite, e rezilta sa bann tes. E koman COVID i en maladi ki i *notifiable* zot bezwen fer sa toudswit.

Ki kantite tes ki ou'n dir nou'n fer par, ou'n demann mwan kantite i etranze, kantite i Seselwa. Dan nou, sa ki nou annan koman nou statistik se 90poursan i Seselwa e 10poursan i etranze.

Desizyon nou'n pran ki mannyer nou oule nou rev i i ganny fer dan sa lenstans dan Laboratwar Piblik, e se sa ki nou'n fer. Mersi Mr Speaker.

MR SPEAKER

Mersi. Onorab Lemiel.

HON SYLVANNE LEMIEL

Mersi Mr Speaker. Bonzour Minis avek ou delegasyon. Minis mon ti a kontan konnen ler ou'n reponn *Leader* Lopozisyon, ou'n dir ki i annan bokou pei ki bann dimoun in pran 2 doz, zot pa pe fer tes lo la.

Me isi Sesel nou pe fer, e mon ti a kontan konnen ki kantite dimoun konmsi ki'n fini pran sa dezyenm doz ki'n ganny COVID? E ladan osi ki kantite ki'n pran 2 doz ki'n *passed away*?

Aprè osi Minis mon ti pou kontan konnen dan protokol pou pran lesantiyon, akòz i annan bokou alegasyon la deor. Menm i annan ki pe dir i annan bann *swab* ki pa ni ganny met dan nennen, ni dan labous dimoun, in ganny anvoye kot laboratwar e in ganny sorti koman pozitiv.

Parey mon'n dir i alegasyon. So eski Minis petet sa i vre, oubyen ou kapab konfirman okenn keksoz lo la? Mersi Minis.

MR SPEAKER

Mersi Onorab. Minis.

MINISTER PEGGY VIDOT

Onorab ou'n demann mon konbyen dimoun ki'n teste pozitiv ki'n ganny son 2 doz

vaksen. Dapre statistik ki nou annan i apros 30poursan, e dan sa 30poursan la mazorite swa zot napa sentonm, ou si non zot sentonm i *mild*.

Konbyen dimoun ki'n mor ki'n ganny 2 doz vaksen, ziska prezan nou pa ankor rikord okenn lanmor kot en dimoun in pran 2 doz vaksen.

Si sa alegasyon ki en tes dimoun pa'n fer *swab* in anvoy zis son VTM, eski sa nou kapab konfirman si i wi i non? Ziska pran nou pa ankor vwar e i annan sistenm an plas pou nou kapab detekte si i annan VTM ou si non, non. Mersi.

MR SPEAKER

Mersi. Nou'n ariv 10er edmi, nou pe depas ler, me selman vi ki i annan telman lentere mon pou donn ankor 15minit sa size. Gard bann kestyon kourt silvouple, e Minis gard bann repons osi kourt, direk.

Onorab Labonte.

HON ANDY LABONTE

Mersi Mr Speaker. Bonzour Minis avek ou delegasyon. Minis mon kestyon i baze lo premye kestyon Onorab Pillay. Vi ki bann dernyen mizazour ki nou'n vwar se ki vremen ka lenfeksyon i pe redwir.

Eski ou kapab konfirman ki ou Minister i kler ki si en

dimoun pa malad Minister Lasante i pa pas port-an-port, kaz-an-kaz, pou al teste dimoun me si dimoun i vin lopital pou teste *then* prezan ki ou kapab determinen si zot malad, si zot pa malad? Sa i mon premye kestyon.

Mon dezyenm kestyon i plizoumwenn lo ou *professionalism*, mon konnen ou en dimoun ki vreman eksperyanse e ou konn ou travay tre byen. E ou ankor pe deservi kominote ki nou vreman apresye.

So eski ou kapab konfirman poudir dan laboratwar li menm li, bann desizyon ki ganny pran i ganny pran pirman lo en baz profesyonnel, me pa vreman pa par bann dimoun ki pa konn naryen dan lasante. Mersi.

MR SPEAKER

Mersi Onorab. Mon demann, mersi Onorab ou kapab asize akoz ou pa pou ganny sans demann kestyon ankor. Mon rapel bann Manm ki i annan kestyon Onorab Bistoquet osi lo *Order Paper*. Alor vey son kestyon e pa tro antisip sa size ki li i pe al lo la. Minis silvouple.

MINISTER PEGGY VIDOT

Mersi Mr Speaker. Mersi Onorab. Onorab sa ki mon

kapab asir ou se ki tou dimoun ki bezwen ganny fer en tes si i apros nou i pou fer son tes nou pe donn li. Napa limitasyon lo tes.

Me nou konnen poudir tes i bezwen ganny fer a en serten leta dan maladi sa, avek *COVID*. E alor si i tro boner nou pa pou fer.

Eski nou egzers *professionalism* dan tou sa ki nou pe fer? Wi *in as much as is possible* lo mon kote mon konnen ki mon demann *professionalism* e alor mon *practice it* e mon demande ki *staff* osi ki travay Minister Lasante i fer menm keksoz.

E ki nou desizyon i ganny pran lo en baz ki kan nou annan levidans ki ed nou pou fer serten desizyon ki nou santi i formen lo sa. Mersi.

MR SPEAKER

Mersi. Sa Manm ki pe asiz dan kwen laba deryer, non, non a kote isi Onorab Loze sa? Sa sez devan i bar mwan e apenn si mon war ou. Ou ti'n lev lanmen? Ou kestyon silvouple.

HON JOHAN LOZE

Mersi Mr Speaker. Bonzour Minis avek ou delegasyon. Minis mon oule konmans par remerci ou e tou travayer lasante pou zot servis ki zot pe

rann la kominote, lasosyete Seselwa.

Minis mon premye kestyon, ou'n dir nou poudir ki en seri kritik e komanter in *trigger* en revi endepandan dan Laboratwar Lasante Piblik.

Mon kestyon se si Minis ou ti pou pare pou *entertain* posibilite, en tel revi lo zesyon sa pandemi *COVID* dan son antyerte Sesel? Vi ki in annan egalman kritik, komanter e tou kalite keksoz ki'n ganny dir sorti kot lasosyete Seselwa?

Mon dezyenm i dernyen kestyon Mr Speaker, i konsern kominikasyon, nou, Lanmerik zot pe dir i annan en pandemi kominikasyon otour sa pandemi. Me lanmenm la dan Lasanble, nou war ki Minis i koz lo *surge*, e Manm Lasanble Nasyonal i koz lo sabotaz.

So ki mon ti ava anvii demann Minis, si zot ti pou posib pou zot revwar zot protokol kominikasyon? Si ti pou annan posibilite ki zot kapab revwar bann lezot *sit web*, *raw data* - pibliy *raw data* lo tou bann pwen statistik. Pa neserman ki *data* ki pou konsonmasyon lamas.

Me ki bann lezot zournalis, bann eksper, bann statistisyen, lezot statistisyen zot a kapab gannyen depouye fer analiz. Annan en Polisi a

100poursan ouver avek lasosyete Seselwa, *instead of* zis en *rolling* ouswa en *walking average*

MR SPEAKER

... *ok* nou'n konpran ou kestyon Onorab.

HON JOHAN LOZE

... dimoun ava nobou konpran pli byen ki zot, zot pe dir. Mersi Mr Speaker.

MR SPEAKER

Mersi. Minis.

MINISTER PEGGY VIDOT

Mersi Mr Speaker. Mr Speaker mon dir nou'n annan konsern, mon pa'n dir nou'n ganny en seri kritik. E alor ler i annan en konsern, nou santi poudir nou bezwen adres konsern.

Eski nou kapab demann en revi lo repoz sa pandemi? Mon krwar tou pei, tou lorganizasyon dan Lasante i demande ki nou fer sa, pou nou vwar si nou'n byen zer sa repoz. Osinon, non, kote ki nou'n kapab nou ti kapab fer mye, kote ki kalite keksoz ki nou bezwen pran kont an ka ki i annan en lot.

E ki mannyer nou kominike, i en keksoz ki toultan pe ganny revwar, pe ganny vwar ki kalite lenformasyon ki

bezwen ganny sorti, kan manner sa lenformasyon i kapab pase, i en keksoz ki kontinyelman ganny revwar revi. Mersi Mr Speaker.

MR SPEAKER

Mersi. Onorab Aglae.

HON EGBERT AGLAE

Mersi Mr Speaker. Bonzour Minis e le 2 dokter. Minis dabor koman en ansyen travayer Lasante, mon ti a kontan aport mon soutyen avek ou travayer lasante pandan sa pandemik la kot nou war zot vreman anba bokou presyon.

E mon kapab dir sistenm lasante in vin *overwhelm*. E mon krwar nou bezwen fer donn zot zistis par donn zot sipor i nesesser. Minis baze lo sa, premyerman mon ti a kontan ou eklersi nou, aköz i annan serten konsern sirtou bann pasyan ki pe mor ek *COVID*.

Kot i annan fanmir i en pti pe perdi dan bann prosedir, pou kapab premyerman ganny bann serten klarifikasyon lo size medikal zot, sa enn ki'n *passed away*.

E dezyenmman pou kapab fer sa lanterman li menm li aköz i annan ki ale vini, eski sa bann kominikasyon ouswa sa bann protokol i ase kler pou sa bann dimoun? Ki pou zot kapab fer

sa bann prosedir aköz menm kot Padayachy i annan serten konfizyon par ler, ki si sa papye pa ankor ariv kot zot atan pou sertifye poudir i ti negativ ouswa i ti pozitiv, pou pran lekor i annan serten konsern.

Eski zot pe met en dimoun spesifik, ouswa dan zot Departman pou kapab gid sa bann fanmir pou zot kapab pas atraver zot dey, dan en fason en pti pe pli eze?

Dezyenmman, mon ti a kontan petet eklersi nou en pe Dr Gedeon, mon'n ekout ou en kantite dan ou bann lapres, e i kler ki an mezir ki vaksinasyon nou pou *attain* sa iminite ki nesesser, pou annan rediksyon dan tes i kler sa ki i pou annan rediksyon dan tes.

E baze lo sa nou pe war osi ki menm si Minis in dir nou pa pe diminyen la kantite tes, manner ou larepons ou'n donner, Minis ou'n dir poudir *contact tracing* manner pe ganny fer ozordi, si ou pa'n sitan pre pa nesesser ki ou bezwen vin fer tes. So vwala sa i osi i en fe ki pe koz poudir pou annan rediksyon dan tes.

So baze lo sa Minis mon ti a kontan petet dan lavenir petet, ki manner zot pe mazin pou zot kapab li menm li, aköz i annan en kous popilasyon pou

protez sa kous popilasyon adolesan, zenn ...

MR SPEAKER

... prosed lo kestyon silvouple Onorab.

HON EGBERT AGLAE

... Ki manner zot pou prepare pou zot protez sa kous adolesan zenn ki zot, zot pa pe kapab pran vaksen e menm si zot pe tonm dan en *contact tracing* zot pa pe ganny teste zot osi. So ki manner zot pe marye sa ansanm? Mersi.

MR SPEAKER

Mersi. Minis ou kapab adres sa? Kantmenm i an deor *scope* premye kestyon.

MINISTER PEGGY VIDOT

Mersi Mr Speaker. Mr Speaker 2 klarifikasyon;- nou'n annan en kantite ka, me nou sistenm lasante in kapab mannye sa kantite ka ki nou annan ziska prezan.

Mon pa pou dir poudir in *overwhelm*, aköz i annan, letan nou vwar dan lezot pei kot sistenm i vreman *overwhelm* nou pa'n ariv la. Mon ti a kontan klarifye sa.

Dezyenm pwen nou pa pe limit kantite tes ki bezwen ganny fer. Tou tes ki bezwen ganny fer i ganny fer. Toultan

nou'n teste dimoun ki kontak e nou ankor pe teste dimoun ki kontak.

Me selman letan, aköz i annan dimoun parey mon'n dir zot vin teste avan kekfwa i ler ki zot lekor i konmans prodwir sa viris e alor sa tes i pa pou montre nou e pou donn li en *false*, en sans sekirite ki pa et.

Aköz si i vini nou dir li i negativ, e zis aköz i pa ankor ganny 4 zour, 5 zour apre son kontak i pou ale i pou krwar i pou *free*, i pou ale i pou transmet.

Me selman parey ou dir, eski zanf an i ganny teste, si zot kontak a o risk zot pou ganny teste e si i dan en fanmir kot i kapab annan en ka e ki i annan sentonm i pe *still* ganny teste. So nou pa pe limit kantite ka teste ki nou fer. Nou ankor pe fer pou tou dimoun.

An term koman nou kapab senplifye prosedir pou lanterman, pou bann dimoun pou ede fer zot pas sa peryod dey en pe pli byen? Nou an kontinyelman an diskisyon avek kot Padayachy kot i fer bann fineray.

E nou annan en tim, ki travay pre avek tou legliz avek Padayachy kot zot diskite bann problem, bann *issues*. Be koman nou'n dir e dimoun pe dir i annan serten konsern ziste

rezon nou pe diskite sa, e nou pe demann zot pou adrese, pou fer ki keksoz vin pli fasil pou tou dimoun. Mersi.

MR SPEAKER

Mersi. Onorab Uranie. Ou annan 30 segonn pou demann ou kekyon e Minis i annan 1 Minis pou reponn. Mersi.

HON ROCKY URANIE

Mersi Mr Chair. Bonzour Minis avek *panel*. Bonzour tou dimoun a lekout. Minis dimoun aze i ganny dekonseye pou vin klinik oubyen lopital pou redwir zot risk atrap COVID.

Dan en lakour kot sa dimoun aze i en kontak pros avek en dimoun ki'n ganny teste pozitiv pou COVID, eski zot pe fer provizyon pou al teste sa bann dimoun kot zot? Mersi Mr Chair.

MR SPEAKER

Mersi Onorab. Minis.

MINISTER PEGGY VIDOT

An se moman nou pa pe fer sa tes dan lakour *unless* i vreman neser. Me si i annan en dimoun ki parey ou dir i vilnerab dan en lakour kot i annan, nou demann sa dimoun pou ganny fer izole e met dan enn nou bann landrwa fasilite

kot i bezwen ganny izole e la i a kapab fer tes.

Me nou sistenm se si ou annan, si ou vilnerab nou retir ou. Mersi.

MR SPEAKER

Mersi. Nou pou pran en poz la nou pou retournen 11. 5 pou nou pran lezot kekyon e mon remersye Minis ek delegasyon pou sa seri. E Onorab Pillay nou'n *run out of time*.

HON SEBASTIEN PILLAY

Mr Speaker mon pa war rezon ki mannyer ou kapab dir mwan nou'n *run out of time* kan sa size i en size enportan?

MR SPEAKER

Nou'n *run out of time* Onorab Pillay. Mersi Minis ek delegasyon...

HON SEBASTIEN PILLAY

... Mr Speaker i pa lozik, i en keksoz ki mal. Minis pe koz lalang avek Lasanble ou pe les li Ou pe les Minis koz lalang ek Lasanble Mr Speaker!

(BREAK)

MR SPEAKER

Bon. Avan nou kontinyen avek kekyon Onorab Pillay mon'n al ekout *recording Lasanble* e mon kapab verifye ki a de repriz ler

mon ti'n anonse ki nou pe pran poz ou'n dir Minis pe koz lalang devan Lasanble.

Sa pa akseptab, sa kalite langaz mon pa pou aksepte e mon pe demann ou *retract* e donn en *apology*.

HON SEBASTIEN PILLAY

Mersi Mr Speaker. Mr Speaker koman en dimoun ki konn prosedir Lasanble mon konnen poudir 2 mal pa fer en byen. Mon pa war li korek pou ou *curtail Question Time* pou donn mwan loportinite pou reponn kestyon. Sa i mal me ...

MR SPEAKER

Mon pa pe al ladan, sa pa kestyon, mon oule ou *apology*.

HON SEBASTIEN PILLAY

Me i pa eskize osi ki mwan mon met mon *mic* poudir ki Minis i koz lalang. Mon pa ava dir ki Minis i koz lalang. Mon ava *retract* sa mo *lalang*, mon ava dir poudir *The Minister was being economical with the truth!* Ok.

MR SPEAKER

Mon pa aksepte. Mon pa aksepte sa bann langaz de mezir. Swa ou *apologies* oubyen ou pa *apologies*.

(APPLAUSE)

HON SEBASTIEN PILLAY

E me Speaker mwan avek mon grander lespri, mon napa okenn problem pou *apologies* ek Lasanble par lefe ki mon met mon *mic on*.

MR SPEAKER

Ek Lasanble ek Minis, *please*.

HON SEBASTIEN PILLAY

Minis i dan Lasanble Mr Speaker.

MR SPEAKER

Ok, well. Ek Minis.

HON SEBASTIEN PILLAY

Ok, Minis i dan Lasanble. E mon ti a kontan ki i pa korek pou okenn Manm met son *mic* apre ki Speaker pe *adjourn*. Me selman Mr Speaker mon pou bezwen met devan ou ki respe, *respect is earned!* Si ou donn respe ou osi ou ganny respe an retour Mr Speaker! Mersi bokou.

MR SPEAKER

Eski mon'n tann ou *apology*? Mon pa ankor war, mon pa ankor tande mwan.

HON SEBASTIEN PILLAY

Ou pa ankor tann mon *apology* Mr Speaker?

MR SPEAKER

Non, silvouple fer li kler, fer li kler setou.

HON SEBASTIEN PILLAY

Fer li kler ki mannyer? Fer li kler ki mon *apologies*?

MR SPEAKER

Ou *apologies*. *Apologies* ek Lasanble Onorab Pillay, *that's all I want*.

HON SEBASTIEN PILLAY

That's all you want, be mon fek fer ou'n dir mwan pa bezwen fer koumsa. So Mr Speaker parey ou'n demande mon ava *apologies* ek Lasanble e mon ti ava ekspekte ki tou Minis ki vin dan Lasanble i donn nou tou lenformasyon posib ler nou demann kestyon. Mersi.

MR SPEAKER

Ok mon pou termin la, me selman ler mon dir ou *apologies* ou *apologies* e pa ou azout en leksplikasyon e en lot soz pou ou demann. Sa i pa akseptab osi en? Mwan mon pe dir ou sa mon pa pou aksepte. *Ok*.

HON SEBASTIEN PILLAY

(Off-Mic)

Be mwan mon annan en privelez dan sa Lasanble.

MR SPEAKER

Ou annan en privelez wi. Be ou annan respe.

HON SEBASTIEN PILLAY

(Off-Mic)

MR SPEAKER

Enough Onorab Pillay! Bon, nou a kontinyen avek kestyon pou Minis ek nou a pran premye kestyon Onorab Desheila Bastienne. Onorab.

HON DESHEILA BASTIENNE

Mersi Mr Speaker. Bonzour Minis ek ou delegasyon. Bonzour tou Manm Onorab e tou dimoun ki pe swiv nou. En mansyon spesyal pou Onorab De Letourdie. Nou *welcome* ankor en lot madanm dan nou *Caucus* Lasanble. *Welcome* Onorab De Letourdie.

Eski Minis i kapab dir avek sa Lasanble, si Gouvernman pe annan en dyalog avek *PUC* pou fer sir ki tou *meter readers* i pran zot vaksen pou permet zot kapab kontiny zot travay san okenn risk, sirtou la ki sityasyon *COVID* i ankor serye, pou ki sa problemn estimasyon lo bann *bill* i ava arete? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Parey tou lezot dimoun Minister Lasante ti ofer travayer *PUC* vaksen *Sinopharm* osi byen ki *Covishield* dapre gidans ki nou annan an viger.

Dapre nou rikord i annan prosan 808 travayer *PUC* ki'n pran 2 doz vaksen, e i annan 29 ki'n pran zis en doz. Mon konpran ki *PUC* i annan anviron 1200 travayer. I annan ki pa ankor pran me sa i pou diferan rezon.

Mon konpran dan sa 45 *meter reader*, i annan 30 ki'n pran 2 doz e i annan 2 ki pran en sel doz e lezot pa deside pou zot pran. I parey nou Polisi an se moman, vaksen i ankor pran lo en baz volonter. Me nou ankouraz tou dimoun pou vin devan pou vin pran.

Minister Lasante i pare pou fer kozri dan tou bann etablisman, pou eksplike rol vaksen, reponn nenport ki kestyon, retir dout ki dimoun i annan lo size vaksen.

E la nou ankouraz tou dimoun ki bezwen plis lenformasyon pou apros nou, nou a donnen.

Dyalog avek *PUC* i ganny fer avek diferan seksyon dan Minister Lasante. E plis nou annan dyalog, plis toultan i pli bon.

Minister Lasante i panse osi ki en travayer *PUC* ki li i konter i merit kapab kontinyen son travay avek en, san okenn annan gran enteraksyon avek bann dimoun kan zot al kot zot lakour.

Alor pou sa rezon nou panse ki travayer ki fer, ki lir bann *meters* i merit kapab kontinyen zot travay tout an swivan sa bann *SOPs* ki zot annan an plas. Mersi Mr Speaker.

MR SPEAKER

Mersi Minis. Mon pou permet en pti moman pou kestyon siplemanter. Mon pou demande ki kestyon siplemanter i reste lo sa size silvouple. Akoz nou annan en lot kestyon pou pran dan sa peryod avan midi. Mersi.

Onorab Bastienne eski ou annan okenn kestyon ki oule swiv ou?

HON DESHEILA BASTIENNE

Wi Mr Speaker. Mon annan enn. Mersi.

MR SPEAKER

Wi Onorab Bastienne, *go ahead*.

HON DESHEILA BASTIENNE

Minis an vi ki travayer *PUC* i form parti bann servis esansyel

dan pei, me ki protokol lasante ou Minister pe mazin met an plas, pou asire ki servis Gouvernman pa ganny enteronpe, e koz okenn lenkonvenyans pou piblik? Mersi.

MR SPEAKER

Sa in depas en pe *scope* kestyon ki ti lo travayer PUC. Minis ou kapab adrese.

MINISTER PEGGY VIDOT

Parey dan tou servis ki Gouvernman ki bann diferan lakonpanni, letan nou'n antre dan pandemi nou'n annan en kantite travay ki'n ganny fer avek zot tou, pou vwar ki kalite mezir zot bezwen met an plas dan zot landrwa travay.

E sa i en travay kontinyel e a sak fwa ki i annan diferan keksoz dan sa konpani si zot kontakte nou e nou, nou osi nou fer swivi e nou sanz sa ki fodre sanze ansanm avek zot.

E pou sa rezon nou panse poudir PUC parey lezot landrwa, si zot servi tou zot SOPs ki zot annan i merit kapab ede pou koup, pou apes transmision. E ki zot kapab fonksyonn normalman. Mersi.

MR SPEAKER

Mersi. Onorab Sophola.

HON NOLINE SOPHOLA

Mersi Mr Speaker. Mr Speaker zis mon oule klarifye en keksoz. Pou premye kestyon bomaten mon ti'n lev mon lanmen ...

MR SPEAKER

... mon konnen.

HON NOLINE SOPHOLA

E ou'n nod. Mon pa'n ganny sans reponn, koze.

MR SPEAKER

Wi.

HON NOLINE SOPHOLA

E la dan sa *scope* pou Onorab Bastienne mon pa war mwan pe *fit in*. Eski mon kapab poz mon kestyon ki mon ti pou demande bomaten?

MR SPEAKER

Non. Nou a gete si i annan letan a lafen, nou a retournen. Nou'n *run out of time* bomaten e sa i aplik pou tou Manm Lasanble. Mersi. Si ou napa kestyon ki swiv kestyon Onorab Bastienne, nou a kontinyen. Onorab Cosgrow.

HON NOLINE SOPHOLA

Mr Speaker *sorry*. Me selman koman en Manm mon remarke ki mon drwa pe ganny vyole. Mwan osi mon ti annan keksoz

pou mwan pase parey ki lezot Manm osi in pase.

MR SPEAKER

Wi, ou a regarde si i annan loportinite pou demann en lot kestyon, apre kestyon ki nou pran. Onorab Cosgrow.

HON NOLINE SOPHOLA

I pa zis Mr Speaker. I pa zis.

HON WALLACE COSGROW

Mersi Mr Speaker. Mr Speaker mon kestyon lo sa kestyon Onorab Bastienne, nou tou nou'n vwar, nou'n kapab war bann reaksyon ki nou annan konsernan bann *bill PUC* ki'n sorti tou resaman, an rezilta petet estimasyon.

E i vre i pa zis lo bann konsonmater pou zot petet ganny sa bann kalite *bill*. E ki ti ava normal si travayer *PUC* sirtou bann *meter readers* i kapab al lir *meter* e donn *reading* korek pour ki bann konsonmater pa war zot perdi.

Me kestyon ki reste Mr Speaker, malgre travayer *PUC* sirtou bann ki pran *meter* i pran 2 doz vaksen e nou war nou konnen poudir sa 2 doz vaksen pa anpes dimoun ganny *COVID*.

Sa bann dimoun zot annan serten zot i bezwen al lir *meter* dan lakaz dimoun, e zot a risk. So ki eski Minis, Minister

Lasante pe propoze pour ki sa bann dimoun i kapab annan plis *safety*?

Nou konpran problemn konsonmater, e nou bezwen osi realize ki sa bann dimoun i osi a risk e ki sa 2 doz vaksen pa'n neserman pe protez zot. Mersi Mr Speaker.

MR SPEAKER

Mersi. Minis.

MINISTER PEGGY VIDOT

Mersi Mr Speaker. Mersi Onorab pou kestyon. Nou panse ki travayer *PUC* ki al lir bann *meters*, zot napa en gran enteraksyon letan zot antre. Si zot servi zot bann prosedir sa bann, mezir ki nou'n demande, met zot *mask*, gard zot zistans, pa apros pre ek bann dimoun, *sanitize* zot lanmen i ava ase pou protez zot.

Akoz sa letan ki zot antre pou lir en *meter* i tre minim. E si zot pran zot responsabilite lo sa bann pwen, i pa met zot plis a risk ki en travayer kekfwa ki dan laboutik ki enterakte avek en lot dimoun ki vini ki gard zot mezir parey. Mersi Mr Speaker.

MR SPEAKER

Mersi Onorab Aglae.

HON EGBERT AGLAE

Mersi Mr Speaker. Minis baze lo ou larepons ki ou'n donner mon ti a kontan petet ou eklersi nou. An vi ki ou konnen parey...

MR SPEAKER

Fer kestyon kourt silvouple.

HON EGBERT AGLAE

Mr Speaker *I beg your indulgence* silvouple. Mon ti a kontan petet dan sa laliny larepons ki ou'n donner menm si ou pe pran 2 doz vaksen ou kapab transmet sa viris. Baze lo sa Minis avek bann lezot servis, akoz nou tou nou anvi keksoz i retourn dan nou normalite avek servis. Akoz i pe anmenn serten andikapman.

Baze lo sa, kwa ki zot pe petet pe fer an plis lo kote sipervizyon, pou fer sir ki sa bann lorganizasyon parey *PUC* zot fer sir ki zot swiv sa bann *SOPs*.

Akoz nou'n koz lo *SOPs*, me selman nou pa pe neserman al en pti pe pli aprofondir lo la, *carry* en *sanitizer* ek zot, si fodre met legan, si fodre met sa *face shield*. Bann keksoz koumsa ki bezwen ganny dir. Akoz le nou koz *SOPs* i lo papye.

Eski zot al verifye pou fer ki sa bann lakonpanyen pe swiv sa bann keksoz e ki sa

bann travayer i annan an disponibilite, ki pa zot ki pe rod dan zot pos, lakonpanyen ki bezwen donn zot pou zot kapab fer zot travay? Mersi.

MR SPEAKER

Mersi. Minis.

MINISTER PEGGY VIDOT

Mersi Mr Speaker. Mersi pou sa kestyon. Onorab i annan en kantite lakonpanyen dan Sesel, i annan en kantite landrwa travay. Nou travay ek zot pre, e nou annan diskisyon ek zot, pou regarde ki kalite *SOPs* pou *assess risk* zot bann travayer e pou zot met an plas bann diferan keksoz.

I annan de landrwa kot nou kapab annan dimoun pou pase pou tyeke, pou fer serten tyek detanzaot. Me nou pou napa ase travayer pou pas dan tou sa bann landrwa a tou enstan, pou fer sir ki zot, zot pe fer sir ki zot bann travayer pe swiv sa bann kalite keksoz.

Sa kalite program *enforcement*, nou koz avek travayer, avek anplwayer, pou fer sir ki zot konpran akoz ki zot merit pe fer li. Me kote Lasante nou pa pe kapab fer tou sa kalite *enforcement* ki ou'n dekrir. Mersi.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. M Speaker dan larepons Minis in fer nou konpran ki i annan 45 *meter readers*, e ladan i annan 30 ki pa'n pran, ki'n *fully covered* e i annan lezot ki pa ankor pran.

Mon ti a kontan demann Minis, an vi ki nou konnen nou'n tande dan medya poudir *Covishield* li menm li pe al *expire* le 4 Zen. Eski i annan en legzersis ki pe ganny fer? Mon pa konnen si bann dimoun si zot in pran *Covishield* oubyen si sa lot *Sinopharm*.

Eski i annan en legzersis ki pe ganny fer, pou ankouraz bann dimoun ki'n pran premye doz, pou vin pran dezyenm doz? Sirtou *Covishield* avan ki i *expire*? Pa zis pou bann travayer *PUC* me pou lezot dimoun ankor ki pa ankor pran? Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Tou dimoun ki'n pran premye doz vaksen *Covishield* ki *due* zot dezyenm doz vaksen *Covishield* zot in ganny programen pou ganny vaksen

avan le 4 Zen ler sa *consignment* ki nou annan i pou *expire*.

Sa bann dimoun zot pe ganny kriye, zot pe ganny kontakte par bann diferan sant vaksen pou fer zot vini. Apard ki nou'n met lanons lo televizyon ek lo radyo. Me lo en baz endividyel zot pe ganny kontakte, akoz zot tou zot, dan sak sant kot zot in ale, i annan bann detay lo zot, i annan zot bann form.

E sa pe ganny fer Onorab pou fer sir, ki enn nou servi tou sa vaksen e ki tou sa dimoun ki bezwen ganny zot dezyenm doz i gannyen. Mersi.

MR SPEAKER

Mersi. Dernyen pwen lo la. Onorab Loze.

HON JOHAN LOZE

Mersi Mr Speaker. Minis mon pwen i retourn ankor lo kominikasyon. Minis mon pa konnen lo fason ki lenformasyon i ganny kominike.

Eski i annan en fason pou Minister fer konpran dan en fason *unequivocal*, ki desizyon lasante personnel en Seselwa lo zesyon son lasante personnel i reste dan lanmen sa endividi?

Akoz i paret mwan ki, i annan dimoun ki pa ankor konpran ki Gouvernman Sesel

pa pe al pez personn ater pou bour en pikir dan son zepol, pou fer li pran vaksen, *thus* nou ganny bann kestyon koumsa parey ki'n ganny demande la avek ou ozordi.

So once and for all, mon pa konnen si in *cast li in stone*, ekrir parla lo en montanny pou tou dimoun konpran ki poudir Gouvernman Sesel pa pe al fors personn pran vaksen? Mersi.

MR SPEAKER

Mersi Onorab. Minis.

MINISTER PEGGY VIDOT

Onorab mon krwar ki si mon rapel letan mon ti travay dan Minister oparavan, ti mont en kanpany lo “Mon lasante i mon responsabilite.”

E sa i reste koman en keksoz ki nou vwar dan lasante poudir i toultan la e ki nou ankor pe prese. I an se moman vaksen parey ou'n byen dir, i pa obligatwar, me i dezirab e alor nou ankouraze akoz sa i pou ed ou lasante.

Me solman tou prenon kont ki nou respekte ou lopinyon, me selman nou konnen poudir ti ava ed ou, e pa zis ou tousel, ed kominote si ou pran vaksen. Mersi.

MR SPEAKER

Mersi. Nou a pran kestyon Onorab Rosie Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour Minis avek tou ou delegasyon. Bonzour tou bann Onorab e bonzour tou bann dimoun ki pe ekoute.

Avan mon demann Minis sa 3 kestyon. Mon personnelman koman en travayer lasante, mon pou donn sipor Minis Lasante, Dr Gedeon, Dr Louange avek tou travayer lasante.

Pou zot ki mon konnen ki zot in tenir sa labriz pou kapab konbat kont *COVID-19*, malgre tou sa bann defi e sirtou bann kritik negativ ki nou pe gannyen.

(APPLAUSE)

MR SPEAKER

Wi, avans lo ou kestyon prezan *please*.

HON ROSIE BISTOQUET

Minis, vi ki dernyen statistik publiye par Minister Lasante le 20 Me 2021, i montre ki I annan en rediksyon dan nou nouvo ka pozitiv pou lenfeksyon *COVID*. I ti sorti 324 le 9 Me pou vin 154 le 18 Me, sa ki reprezant en rediksyon 47.5poursan pandan sa dernyen 9 zour.

Eski Minis i kapab dir sa Lasanble;

1) Akoz ki sa bann ka pozitiv ti'n mont sitan vit avan sa?

2) Ki bann mezir stratezik ou operasyonnel ki son Minister in met an plas, pou ede pou annan sa rediksyon dan bann ka pozitiv pandan sa kourt dele letan?

3) Ki mezir kontinyel ki Minister Lasante pou met an aksyon, pou asire ki sa sif i kontinyen desann? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Mersi Onorab pou ou kestyon. Mon ti a kontan dir bomaten letan nou'n regard sif pou ozordi nou *rolling average* i 97.

In desann ankor *from* 154 ki ou'n ekrir dan kestyon.

(APPLAUSE)

MINISTER PEGGY VIDOT

Mr Speaker ver lafen Avril e komansman Me nou ti anrezistre en logmantasyon dan bann ka pozitiv *COVID-19*.

Sa ogmantasyon in arive dan nou panse pou plizyer rezon. Nou konnen kan en pei i

dan transmisyon kominoter, ou kapab ekspekte ki bann ka i ogmante ase rapidman. Sa se akoz i annan en kantite mazorite dimoun i kapab vin kontak en case e toudswit sa i kapab propaze.

Nou ti war dan lafen Avril e menm en pe lo komansman Me, ki nou ti annan plizyer sa ki nou apel *clusters*. E sirtou sa ti dan bann lakonpanyen konstriksyon, kot parfwa i pa'n toultan posib pou fer sir ki tou sa bann ka i reste dan karantenn lafason ki zot in ete.

Nou panse ki sa in ede pou propaz ka. Nou panse osi ki avek bann restriksyon ki ti'n ganny retire en pe dimoun ti pe pran mwens prekosyon sirtou letan zot an deor travay e dan kominote.

Sa logmantasyon osi letan nou vwar ou pe fer bann analiz e bann *contact trace*, i posib ki in ganny okazyonnen avek bann diferan selebrasyon otour Lafet Pak.

An menm tan, nou'n remarke ki poudir diferan pei dan lemonn zot osi zot in komans ganny bokou plis ka, rikord bokou plis ka ki oparavan.

E letan nou pe regard to sa ou osi tande poudir i posib i annan en varyan ki nouvo ki dan Sesel, e akoz nou remarke

ki menm karakteristik malad in montre nou en serten sanzman. E ler nou pe diskite avek *WHO* nou vwar ki bann eksper *WHO* i dir ki sa bann kalite keksoz i pa sirprenan.

Nou leksperyans kantmenm i montre nou, ki anviron en tyer ban dimoun ki'n teste pozitiv ti'n fini pran 2 doz vaksen. Sa se akòz zot in an kontak avek dimoun ki'n annan en teste pozitiv.

Dan nou bann diskisyon ki nou'n fer avek lezot pei e pli resaman avek bann eksper ki dan *Public Health England*, nou remarke poudir bokou pei zot pa teste kontak si sa kontak in fini vaksinen. Sa i vadir ki zot pa detekte ka pozitiv dan bann group dimoun ki'n vaksinen *fully*, amwen ki a dimoun i annan en serten sentonm.

Ki fer ki pou nou ler nou pe teste tou dimoun nou pe vwar e sa i osi kekfwa en rezon akòz in annan en serten lartik ki'n dir poudir Sesel menm i annan bokou plis dimoun ki'n vaksinen i *still* annan ase bokou ka ki dimoun in ganny *COVID*.

E si nou, nou pe teste bann ki'n vaksinen, lezot pei pa pe teste ou pa pe kapab konpar sif ki nou, nou pe gannye ek sa bann lezot pei. E se sa pou nou en pe rezon akòz nou krwar

ki ka ki nou'n anrezistre in monte.

Mr Speaker Minister Lasante ti vwar li nesese ler bann ka ti monte, pou li entansifye son program sirveyans, pou fer sir ki i fer plis tes posibil. Ranforsi son kapasite pou li fer *contact tracing* ranforsi son kapasite pou li fer izolasyon bann ka.

An menm tan ki nou ti pe fer tou sa, nou ti remarke poudir i ti nesese pou nou re entrodwir serten mezir ki pou ede pou ralanti e pou koup transmisyon.

Nou ti pe remarke ki ler nou fer nou *contact tracing*, ki en kantite sa transmisyon ti pe ariv plis dan kominote konpare avek dan landrwa travay.

E alor bann mezir ki nou ti bezwen re entrodwir ti enkli *postpone* larantre lekòl, ferm serten landrwa parey; bar, *casino*, laboutik en pe pli boner. Akòz nou konpran poudir se dan *evening* dimoun i komans kekfwa bwar, e alor zot *guard* i desann en pe plis.

Nou'n gard sa restriksyon mouvman apre ller diswar, nou'n re entrodwir restriksyon lo regroupan, sirtou dan en lakour a en lot akòz nou ti vwar poudir en kantite transmisyon to koumsa.

Nou'n restrikte bann rankont, bann *meeting*, nou'n karantenn dimoun dan zot lakour pou fer sir ki ankor transmisyon pa sorti dan en lakour pou al dan en lot ou si non pou al dan en landrwa travay.

Nou ankouraz sa ki dimoun i kapab fer, travay dan lakour, travay a zistans. E enn keksoz ki ti nouvo, se nou'n ranforsi en pti pe nou *border control*.

Akoz nou remarke poudir ti annan ase pa mal kantite dimoun ki ti pe antre sorti dan en serten pei Sid Lazi, kot ler zot ti antre zot menm si zot in antre avek *PCR* negativ, apre detrwa zour isi ler nou'n teste zot, zot ti pozitiv. E pour sa rezon nou ti santi poudir fodre nou kontrol sa *border*.

E osi pandan tou sa letan, nou pa'n ralanti lo nou program vaksinyasyon. Akoz nou konnen poudir vaksinyasyon i kle, i en zouti kle pou ralanti e pour mannye sa lepidemi.

Me nou konnen osi poudir sa bann mezir li tousel, i pa sifi. Sa ki pli enportan se konportman sak endividyel pou pratik tou bann mezir neser pou prevansyon.

Sa ansanm avek vaksen, i pou ede pou nou fer fas a sa met

en ralanti transmisyon e menm koup lasenn transmisyon. Me nou konnen poudir sa lalit i ankor long, e demann bokou zefor lo tou kous popilasyon.

Alor ozordi mon ti a profit lokazyon pou demann tou bann Onorab prezan, pou ed nou dan sa lalit, ankouraz bann dimoun dan zot *constituency* pou pratik bann mezir sanniter, pou gard zot an bonn sante e osi pou zot pran zot vaksen.

Mr Speaker i tre enportan pou popilasyon rekonnèt ki pa zis mezir ki minister Lasante i met an plas ki pou fer sif desann, oubyen met sa lepidemi anba kontrol.

Leksperyans i montre partou dan lemonn ki se kan en pei i travay dan linite e korperasyon son bann sitwayen, ki bann lepidemi i ganny meta anba kontrol pli vit.

Minister Lasante i pou donn gidans e met regilasyon an plas, me si dimoun pa swiv e napa *enforcement* sa bann regilasyon bann mezir pa pou efektiv. Nou'n vwar pou nou menm ki mannyer serten kous nou popilasyon, in azir dan diferan letan kont sa bann mezir ki nou'n mete.

Bann regroupman ki'n annan, bann parti ki'n annan. Me parkont nou kontan konnen e nou kontan vwar ki lamazorite

dimoun in swiv sa bann mezir. Koman Minister Lasante nou pou kontinyen pou donn bann bon konsey e gidans, tout an prenon kont ki lasante ek lavi sitwayen ek lekonomi nou pei, i bezwen ganny proteze.

Nou pe fer byento en letid pou nou vwar ki kantite iminite dimoun i annan dan pei. E sa i ava ed nou sa bann lenformasyon pou nou al adopte diferan Polisi, pou nou pli byen kapab mannye sa lepidemi.

Nou pe revwar e nou pe diskite avek bann diferan eksper dan lezot pei, an menm tan ki *WHO*, pou etidye si i annan nesesite pou donn en trwazyenm doz, ou sinon en *booster* doz parey i ganny souvan koz lo la.

Bomaten en dimoun in koz lo koman nou pe protez sa kous popilasyon ki nou pa ankore donn vaksen. Akoz nou konnen poudir ki vaksen i kle. Nou'n vwar poudir vaksen pou adolesan 12an a 16an ouswa 18an, in ganny sorti e in ganny aprouve par serten pei.

E nou pe fer demars nou osi pou nou vwar ki mannye nou kapab ganny sa vaksen, ki *mainly* an se moman *Pfizer* pou bann adolesan isi e nou pe regard tou posibilite kapab entrodwir sa kan sa i ava posibil.

Nou pe revwar nou bann stratezi ek nou bann gidans, anmezir ki plis lenformasyon i sorti lo sa maladi. E anmezir ki nouvo keksoz i sorti nou ava etidye, nou ava pran tou konsey posibil, pou nou fer sir ki nou osi nou Polisi isi i azour.

Nou'n vwar poudir i esansyel pou ou revwar en pe nou preparasyon, pou ganny kantite dimoun ki nou annan, kote ki nou fer, kote ki nou pou donn zot swen e ki kantite resours nou bezwen.

E tou sa i keksoz ki anmezir nou pe ale, nou pe kalkile nou pe revwar. E parey kekfwa pou bokou dimoun nou pe aranz en nouvo sant kot nou kapab agrandi nou kantite dimoun, ki nou bezwen sonnyen.

Me sa ki nou kapab reasir zot, ki tou mezir ki nou kapab nou pe pran, pou nou kapab *cope* dan le fitir, si nou lepidemi i evolye dan diferan fason. E nou an kontak avek diferan group *partners* ki kapab ed nou dan diferan fason. Mersi.

MR SPEAKER

Mersi. Onorab Bistoquet eski ou annan kestyon siplemanter?

HON ROSIE BISTOQUET

Wi Mr Speaker. Mon annan 2 pti i kestyon siplemanter. Enn,

larepons ki Minis in donn nou, vi ki vaksinyasyon i paret mwan i lo en nivo ase o. E ou'n koz en bon pe lo la, sirtou bann pwen ki ou'n meta ater lo kote vaksinyasyon.

Eski Minister Lasante pe mazinen ouswa anvizaze fer en letid akoz bann dimoun pa pe pran vaksen? Sa i enn.

Aprè lot, tou konpanyi ki konmanse i bezwen annan en letan ki i fini osi.

Petet Minis Lasante dir nou kan ki sa konpanyi pou terminen, e ki mezir stratezi ou servis ki Minister Lasante pou met anmars pou ankouraz bann ki pa ankor pran zot vaksen sirtou bann ki pou ganny 18an aprè ler sa konpanyi in fini? Mersi.

MR SPEAKER

Mersi Onorab. Minis.

MINISTER PEGGY VIDOT

An se moman nou pe travay avek diferan Minister, avek diferan organizasyon pou nou vwar avek zot, rezon ki dimoun pe donner. Konbyen dimoun dan zot organizasyon ki'n prn vaksen e konbyen ki pa ankor pran e ki rezon zot pe donner pou zot pa pran sa vaksen? E osi al dan sa bann diferan landrwa pou nou koz avek zot pou vwar ki fodre nou fer.

Nou realize poudir kot nou'n arive la, nou bezwen fer sir ki nou sanz lapros stratezi pou nou ariv kot bann dimoun. E nou pe travay pre avek sa bann diferan lorganizasyon, sa bann diferan Minister.

Nou'n osi sanz fason ki nou pe dir konpanyi, si oule annan bann sant kot vaksinyasyon i ava arete.

Me konpanyi pou don vaksen i pa pou arete, akoz nou pe entegre sa dan nou sistenm vaksen ki nou donner dan nou bann *health centers*, kot ki toultan vaksen i ava a laporte dimoun ki bezwen.

Alors i en pe lafason ki nou pe fer. Nou konnen poudir nou bezwen apros travay avek diferan groupe e ki zot, zot ava kapab si oule ariv plis kot bann dimoun ki konsernen ki pa ankor pran vaksen, e ed nou pou pas sa mesaz enportan. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mr Speaker mersi. Mr Speaker mon pwen ti en *point of order*, an relasyon avek *Order 25* lo ki manner keston i ganny plase lo *Order Paper*.

Mr Speaker en *Question Without Notice* ouswa en *Urgent*

Question i pa ganny priyorite *over* en *Question* ki *With Notice*. Mon ti *submit* en kestyon e sa kestyon ki'n ganny demande i enn ki'n ganny preski dir klarifye ek *PNQ* ki Onorab *Leader* Lopozisyon in anmennen bomaten.

E mwan mon pe fer referans avek en kestyon ki mon ti *submit* pou Minis Lanplwa. E mon'n lir bann korespondans ant ou avek *Leader* Lopozisyon konsernan mon kestyon ki Minis ti bezwen ganny letan pou kapab vin reponn kestyon.

E mon kestyon, mon war parti mon kestyon ki mon ti pe demann Minis in ganny reponn dan en *press conference* resaman. E la mon pe war ki poudir ki *Urgent Question* i ganny anmennen lo en kestyon ki'n ganny demande *or* ki preski dir ganny klarite par *Leader* Lopozisyon Mr Speaker.

MR SPEAKER

Onorab Cosgrow mon okouran bann kestyon ki ou'n mete. Annou permet fini sa a lafen sa sesyon mon a donn ou en repons lo ou *point of order* silvouple. Mersi.

HON WALLACE COSGROW

Mersi Mr Speaker.

MR SPEAKER

Wi, si ou napa lot kestyon bon. Onorab Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker dan son deklarasyon Minis in dir nou ki linite e korperasyon sitwayen, i kapab ede pou nou kapab kontrol sa sityasyon.

Nou osi konnen ki fason panse sitwayen i kapab ganny enfliyanse par bann group ki zot asosye avek. Larelizyon baze lo zot lafwa, kominote biznes, sosyete sivil, ouswa konviksyon politik.

Kestyon ki mon anvi demann Minis, eski i santi ki ozordi dan Sesel i annan okenn group partikilye ki pe donn lenfirmite ou Minister, pou kapab met sa sityasyon anba kontrol? Mersi.

MR SPEAKER

Mersi. Minis.

MINISTER PEGGY VIDOT

Mersi Onorab pou ou kestyon. Onorab nou konnen par egzanp poudir pou travay pou vaksinasyon, i annan dimoun ki pou diferan rezon zot kont vaksinasyon.

E alors zot pe si oule, partaz zot nide, aköz zot kont avek diferan dimoun. E koman

ou'n dir diferan dimoun i kapab ganny enfliyanse.

Nou konnen osi i annan dimoun kekfwa aköz zot fason panse, ki i relizye, ki i lezot, zot kont serten prosedir ki nou fer dan Lasante. E zot osi zot annan lenfliyans lo serten group pou anpes dimoun pran.

Nou konnen ki kominikasyon i zwe en gran rol. E pou le moman si ou vwar i annan landrwa kot i annan kominikasyon ki negativ kont vaksen, e kont keksoz ki nou merit fer pou nou anpes nou ganny sa maladi, alor i probab ki sa i enfliyans serten dimoun e i enfliyans zot konportman. E ki pa anmenn tou dimoun dan menm laliny pou nou sey konbat sa lepidemi. Mersi.

MR SPEAKER

Mersi. Onorab Aglae.

MR SPEAKER

Onorab Aglae.

HON EGBERT AGLAE

Mersi Mr Speaker. Minis dan ou bann larepons ou'n lans en lapel sirtou avek nou bann MNAs pour donn sa sipor. Baze lo sa Minis mon ti a kontan demann ou petet si, mon konnen dan lasante i annan sa ki nou apel *patient confidentiality*.

Me selman nou bezwen osi lenformasyon pou nou kapab ed zot, sirtou pou nou konn nou statistik an term distrik.

Kantite dimoun ki'n vini, parey pour al Port Glaud. Ki bann *tranche d'age*, ki pe vini e la nou a konnen ki mannyer nou a targete e donn zot sa sipor.

Eski zot kapab fer nou ganny en pe lenformasyon, atraver mon pa konnen si administrasyon distrik, nou pa bezwen non dimoun nou! Nou bezwen statistik petet, pou nou konnen ki mannyer nou sitye nou e pou donn zot sa sipor. Sa i enn. Eski i posib?

Dezyenm Minis. Ou'n fer resorti osi ki vaksinyasyon pou bezwen sirtou *COVID 19* pou bezwen *être* en program ki pou kontinyen byensir. E Minis baze lo sa. Eski zot pe prepar zot, aköz bokou sa bann vaksen zot *lifespan*, zot lefikasite dan lekor preski dir 6mwan.

Eski zot pe prepar, zot pe prepar zot menm zot Minister e nou menm nou bann ki'n vaksinen pou kapab si lannen prosenn nou pou bezwen retournen re al vaksinen pou annan en program ki pou marse? E nou'n pran kont osi bann febles ki Minister in pas atraver. Mersi.

MR SPEAKER

Mersi Onorab. Minis

MINISTER PEGGY VIDOT

Mersi Onorab pou ou kestyon. Wi nou kapab travay avek bann diferan group, bann *MNA* parey ou'n dir pou nou donn bann statistik. Tout an parey ou'n dir nou pou prezerv konfidansyalite tou dimoun. Nou a kapab dir ou par egzanp, konbyen dimoun dan ou distrik ki pa ankò pran, e osi parey ou dir si *tranche d'age*, i en keksoz ki enportan.

Me an menm tan nou osi panse poudir an kozan avek dimoun, en senp kestyon osi i kapab donn ou sa en pe sa bann lenformasyon. Me nou pare pou partaz bann lenformasyon ki nou annan, tout an gardan profesyonnel, nou konfidansyalite san ki nou *breach* sa. Mersi.

Nou osi konnen poudir, ou'n dir zafer efikasite vaksen konbyen letan i tenir. An se moman person pa konn sa.

Lasyans i ankò - diferan group i ankò pe etidye sa. Mon konnen par egzanp *CDC* pe fer en *study* pou regarde efikasite vaksen konbyen letan i ale, ki kantite dimoun ki pran vaksen, ki teste pozitiv apre. I annan en kantite letid ki pe ganny fer e sa nou pe swiv tre pre.

E alor nou pa konnen si nou bezwen en vaksen lannen prosenn, si nou pou bezwen en lot vaksen dan 2an, dan 3an. Nou pe regarde. Me pour nou fer sir ki nou mont en *response* ki pou efikas nou bezwen pe regarde si konmela nou bezwen vaksen lannen prosenn ki mannyer nou pou al arive fer li.

E pour sa rezon, wi nou ankò pe etidye, nou ankò pe diskite e nou pe program nou lekor pou sa ki nou krwar i kapab arive. Me pou lemoman la, i paret ki i annan serten diskisyon pe koz lo en *booster doze* pou serten vaksen, me nanryen pa kler. Mersi.

MR SPEAKER

Mersi Onorab Pillay. Onorab Labonte letan Minis pe donn son repons ki swiv ou kapab bouze pou al lo mikro. Onorab Pillay.

HON SEBASTIEN PILLAY

Mersi Mr Speaker. Mr Speaker mon ti a kontan demann Minis an relasyon avek sa size vaksen. I annan pa mal bann dimoun aze ki reste kot lakaz e ki pe eksprim konsern akòz zot, zot pa pe kapab deplase pou pran, pou pran zot vaksen.

E prezan sa ki mon pe demande se zot menm zot sa bann dimoun pe eksprim zot

lentere pou pran zot vaksen. Me selman sa konsern kot dimoun pe izol dan lakour, kot si en dimoun ki enfekte i al izol dan lakour e zot pa pe swiv bann kontak, i poz en risk pou sa bann dimoun aze.

So ki zot pe met an plas sistenm, ki sistenm zot pe met an plas pou zot kapab *reach out* pou sa bann dimoun aze, ki en pe pli vilnerab dan sosyete ki kot zot ki zot a kapab ganny sa proteksyon atraver bann prosesis vaksinasyon ki zot bezwen gannyen?

E dezyenmman i annan konsern ki lamazorite Seselwa pe swiv bann konsey ki *Public Health* oubyen ki *handling* sitasyon *COVID* i egzize. Me nou pe osi vwar ki a en kantite etranze pa pe swiv menm prosedir.

Par egzanp mwan mon'n vwar legzanp personnelman ki dimoun in dir mwan mon'n al gete *Eden Island* i annan bokou bann etranze ki pe parwaze san mask.

E dan bokou lezot landrwa sa sityasyon i egziste. So ki ou Minister pe fer pou met lanfaz lo asire ,ki pa zis Seselwa ki nou nou'n konpran aköz nou bezwen fer sa pou protez nou frer e nou ser, nou kominote.

Me etranze ki vin dan pei osi, i osi swiv sa bann mezire e

sa bann konsey ki Minister Lasante i donnen pou zot pa donn okenn lenfirmite okenn dimoun. Mersi Mr Speaker.

MR SPEAKER

Mersi. Mersi Onorab. Minis.

MINISTER PEGGY VIDOT

Mersi Onorab. Mon a reponn ou kestyon avek tou fransiz e tou laverite ki mon kapab donn ou. Vaksen pou bann dimoun aze ki pa kapab deplase i pe ganny, in ganny donnen par bann dimoun dan *health centers*.

Lamazorite dimoun ki pa kapab deplase dan bann distrik zot bann Sant Lasante dan zot distrik i konn zot, aköz i al ofer zot, i al anmenn lezot kalite swen pou zot.

E pour sa bann dimoun zot vaksen pe ganny donnen par sa group dimoun. Ou'n mansyonn ankor *contact tracing* pou bann ki dimoun. Si en lakour i ganny fer son *assessment* e i annan en dimoun ki vilnerab e i annan en rezon pou *la quelle* sa dimoun ki en *case* pa kapab reste dan sa lakour, sa dimoun i ganny retire i e ganny mete dan enn nou bann fasilite kot nou fer izolasyon.

I annan problemm parey ou'n dir ki i annan etranze ki pe marse, ki pa pe swiv nou bann

konsiny sanniter ki annan an plas. Nou an diskrit, an kominikasyon, an dialog avek Minis Tourizm. Nou koz avek zot souvan zot, zot koz avek bann diferan landrwa ki pran bann touris.

E pou fer sir ki tou sa touris i konnen tou bann viziter Sesel i konn bann mezir ki zot bezwen fer. Minister Lasante parey mon dir i met bann Polisi, i met bann gidans an plas. I diskrit avek tou bann, antite ki bezwen regard sa bann konsiny.

Nou diskrit avek bann *Law Enforcement Authorities* pou fer sir ki sa bann keksoz koumsa i ganny met a zot konsern. E nou pe fer sir ki nou revwar ankor tou sa bann landrwa kot touris i reste pou sey ankor ranforsi sa bann mezir.

E i en konsern pou nou, aköz tou group dimoun ki i viziter, ki i touris ki pa pe swiv bann mezir sanniter nou ti a kontan ki sa i redwir e nou kont lo tou bann dimoun, tou bann lenstitisyon pou ede pou *enforce* sa bann Lalwa. Mersi.

MR SPEAKER

Mersi Minis. Onorab Labonte.

HON ANDY LABONTE

Bonzour ankor enn fwa Minis avek *panel*. Bon mon kestyon i

baze lo kestyon nimerò 3. E i plizoumwenn pou bann pasyan ek travayer lasante. Aköz an se moman ki nou pe koze nou annan 4 dimoun ki pe atann sitan kantite letan.

So pour vi bann mezir kontinyel pou fer desann. Mon pe demande ki Minister Lasante pe mazin pou met bann, mezir pou bann pasyan oubyen travayer lasante ki'n vini sorti trete dan Lenn pou anpes sa bann nouvo varyan petet ariv dan kominote.

Ki *as soon* ki koman zot vini zot ganny transporte direktman swa, dan karantenn kot zot, oubyen swa lopital. Apre mon dezyenn kestyon ankor enn fwa pou latransparans, aköz i annan en keksoz ki pa kler.

Se ki bokou dimoun la deor pe demande aköz ki, ki kriter ki zot servi pou swazir lekel group dimoun ki sorti dan ankor enn fwa dan, lopital, dan menm avyon me selman ler zot ariv lo Erport.

Serten i al karantenn dan lakour e sertan i al karantenn kot *Coast Guard* ki zot vwar poudir i pa *pleasant*.

So en pe leksplikasyon lo la. Mersi *Minister*.

MR SPEAKER

Mersi Onorab. Wi Minis.

MINISTER PEGGY VIDOT

Mersi Onorab. Mon ava pran premye group kestyon ki ou'n demande pou bann pasyan ki nou ti'n anvoy tretman aletranze ki'n re, e non dan spesifikman dan Lenn e ki'n retourn Sesel sa semenn.

En Polisi ki annan sete ki tou dimoun, i napa ki sorti dan Lenn napa drwa antre Sesel. Nou pa kapab anpes en Seselwa antre Sesel. Me nou osi annan en Polisi poudir si ou sorti dan enn sa bann pei koman en Seselwa ou bezwen al an karantenn.

Akoz i annan en serten sirveyans ki nou bezwen fer e sa bann pei kot, i annan en kantite landrwa ki *red list* diferan pei e ki pei napa drwa antre. Me si ou antre ou bezwen al an karantenn.

Alor pou sa bann dimoun i *mieux* nou'n vwar ki nou met zot an karantenn dan en fasilite, *as oppose* pou lezot al an karantenn se zot.

E nou a swiv zot de pre, e vwar ki *care*, ki kantite peryod karantenn zot kapab fer, apre ki nou'n fer diferan tes lo zot. Mersi.

MR SPEAKER

Mersi. Wi Minis ou pe kontinyen.

MINISTER PEGGY VIDOT

I annan en lot kestyon *sorry* mon'n, pa'n tro konpran ou lot kestyon Onorab.

HON ANDY LABONTE

Yes Minister. Mon dezyenm kestyon i baze lo latransparans, akoz i annan dimoun ki vini ki sorti ankor enn fwa dan Lenn prensipalman. Zot sorti dan menm lopital, zot in vin dan menm avyon.

Me selman ler zot ariv lo Erport serten i ganny dir i pou al karantenn dan lakour e serten i al, *Coast Guard*. Si sa pa vre petet ou ti kapab devwale poudir pou dir sa pe arive aktyelman. Mersi *Minister*.

MR SPEAKER

Mersi Onorab. Wi Minis.

MINISTER PEGGY VIDOT

Mersi Onorab. Mon pa'n tro konpran kestyon oparavan akoz sa i pa en i pa nou Polisi. Tou dimoun an se moman tou Seselwa, napa dimoun kapab sorti dan Lenn sir i pa en Seselwa pou li antre. Me tou Seselwa ki pou antre sorti dan Lenn pou al karantenn dan en fasilite e i pa fer sa swa ler i ariv Erport si al dan lakour si non i al en fasilite i bezwen al dan fasilite. Mersi.

MR SPEAKER

Mersi Minis mon a donn Onorab Loze, dernyen pwen klarifikasyon.

HON JOHAN LOZE

Mersi Mr Speaker. Minis an de repriz depi *ce matin* lo tou le de kestyon, ou'n sit lefe ki Sesel i teste dimoun ki'n pran tou lede de doz vaksen, an konparezon avek bann lezot pei ki zot, zot pa pe fer sa. Minis be sa i en larepons ki kler, i *net*, syantifik *it's empirical*.

Be mon felisit ou pou sorti avek sa. Be *why did not lead with this to start with* letan sa kriz ti komanse letan sa *surge* ti komanse? Bann Minis in mont lo lapres in dir tou kalite keksoz, ekspekte sa ki kler ki kler ki net ki lapres enternasyonal ti'n kapab konpran poudir vwala kot problemn Sesel i ete. Si sa i vremen problemn Sesel.

But this should have been the go to dan plas en Minis monte dir Seselwa i iresponsab. Mon dezyenm pwen Minis, an Zanvye letan nou ti annan premye *surge* Prezidan ti dir sa i an rezilta lafet lannen, ozordi ou vini ou dir nou Lafet Pak.

Mon ti a kontan sizere ki petet letan Onorab Henrie pe fer konpilasyon bann ki pe poz

nwizans, i enkli bann lafet ladan. Mersi Mr Speaker.

MR SPEAKER

Minis wi.

MINISTER PEGGY VIDOT

Onorab parey mon'n fer resorti poudir sa i nou'n, nou'n vwar e pli resaman letan nou pe diskrit avek bann diferan group dimoun zot pe dir nou.

Me mwan si en medya i demann mwan, mon ava dir poudir sa ki nou, nou pe fer e nou'n apersi ki dan lezot pei;-parey mon pe dir pli resaman semenn pase, nou pe koz avek, group *Public Health England* zot osi zot in fer resorti sa.

Alor anmezir nou ganny lenformasyon nou, nou tire. Nou fer resorti. E ankor pou nou pa kasyet nanryen pou nou pa manti. Mersi.

MR SPEAKER

Mersi Minis. Bon mon'n ariv a lafen bann dimoun ki ti'n lev lanmen pou kestyon. Onorab Georges in lev lanmen. Ale. *Go ahead* Onorab Georges.

HON BERNARD GEORGES

Mersi Mr Speaker. Mersi pou donn mwan sa loportinite. Mon ti'n krwar mon ti'n vwar ou pe ...

MR SPEAKER

Mon'n pa'n vwar ou. Mersi.

HON BERNARD GEORGES

Pli boner me kekfw a i pa ti le ka.

MR SPEAKER

Ale carry on.

HON BERNARD GEORGES

Mersi Mr Speaker. Mr Speaker mon ti a kontan demann en senp kestyon Minis. Me avan sa permet mwan silvouple pour felisit Minister Lasante, Minis avek son tim pour sa travay ki zot in fer pou fer sir ki lakantite dimoun ki ganny enfekte pe desann.

Me osi profite pour dir avek popilasyon Sesel, ki pe pran bann konsiny byen serye felisitasyon pou ede zot osi pou fer desann sa nivo e sa to lenfeksyon.

En keksoz i reste Minis, en dout dan popilasyon. E nou konnen nou annan en bon pe *anti-vaxxers* eksetera dan nou, dan nou popilasyon parey i annan partou dan lemonn.

Mon kestyon se sa enn. Vi sa kestyon Onorab Bistoquet lo kisisa nou pe, bann mezir pou pran pou kontinyen fer desann sa, sa to lenfeksyon? Eski ou Minister i annan okenn dout lo lefikasite vaksen?

Ouswa eski zot annan okenn rezon pour krwar ki vaksen i danzere pou popilasyon? Eski mon kapab ganny en repons a sa kestyon silvouple? Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Onorab pou ou kestyon. Mersi Mr Speaker. Onorab mon kapab dir poudir levidans ki nou'n annan avek nou, avek lafason ki dan sa bann dernyen semenn ki dimoun ki'n ganny vaksen e fason ki zot in prezante, kalite sentonm ki zot annan, ou si non zot napa, i donn nou tou si oule, konfyans ki vaksen ki nou'n servi isi i annan efikasite kont maladi.

Tou landrwa in dir poudir vaksen i pa neserman anpes transmisyon, i pa anpes dimoun gannyen, me i anpes maladi grav, i anpes lanmor avek sa.

E nou se sa nou leksperyans ki nou'n vwar isi. Nou pa'n ganny maladi grav, lamazorite dimoun ki'n menm teste pozitiv in napa okenn sentonm. E pour nou, nou panse poudir sa vaksen i efikas.

E nou pou kontinyen pour *roll it out* pou fer sir ki tou dimoun i gannyen. Me mesaz se

ki vaksen pa'n zanmen ganny dir poudir i pe anpes maladi. Mersi.

MR SPEAKER

Ti annan en pwen.

MINISTER PEGGY VIDOT

Wi, wi. Ankor dan tou sa vaksen ki nou'n donnen nou bezwen fer gard rikord si dimoun i ganny en advers i ganny en lefe advers avek.

Ziska prezan nou pa'n rikord okenn lefe advers serye. Nou'n annan enn de pti ka kot in annan en serten lefe si oule, *mild* lefe advers kot dimoun in reazir kekfwa en pti pe vit avek.

Me tou sa in kapab ganny pran swen avek tre vit e ki personn pa'n ganny okenn lefe ki nou'n vwar serten, i non dan lezot pei.

E nou alor pou sa rezon nou dir poudir vaksen i pa danzere, me i ganny donnen toultan anba en fason kontrole. Mersi.

MR SPEAKER

Mersi Minis. Minis ek nou de koleg dokter pa - eskiz mwan pou tenir zot en pti moman, akoz pou mwan *deal* avek kestyon ki pwen ki Onorab Cosgrow in leve. E sa i enportan pou mwan akoz mon anvi zot konpran lo ki baz nou desid

Order Paper. E ki kestyon, ki mannyer nou met kestyon.

Wi Onorab Cosgrow ti annan 2 kestyon ki i ti'n mete lo lalis. Ler nou'n konsider, ler nou ti dan *ABC*, nou ti decide nou pou met apepre 7, 8 kestyon lo *Order Paper* pour ozordi.

E apre *ABC* mon'n asize e mon'n an konsiltasyon avek Madanm Clerk, nou'n desid lo 3 Minis ki ti en total 8 kestyon.

Alor avek sa i evidan ki pa tou Minis, pa tou kestyon ki nou kapab pran menm zour. Serten kestyon nou bezwen met lo lalis e i a vini la prosenn fwa.

Kestyon Onorab Cosgrow ti pou Minis Lanplwa. Minis Lanplwa nou pa ti'n program li pour li vini, alor se pour sa ki kestyon Onorab Cosgrow in al, pou semenn prosenn.

Be selman antretan mon ti eksprim avek *Leader* Lopoziyon ki akoz Onorab Cosgrow son bann kestyon ti annan en kantite sif, en kantite detay ki ti pe rode, i ti a osi bon pour Minis donn en *full* leksplikasyon ki i gannyen sa bann zour.

Sa i pa'n fer pou mwan limit privez Onorab Cosgrow. I zis akoz Minis premyerman i annan serten Departman dan Minister Lanplwa ki'n ti'n fermen akoz *COVID*. E akoz zot

pa ti pe travay sa semenn, zot ti pe vin travay sa semenn la, mon ti osi dir bon pou rezon pratik les kestyon Cosgrow vin semenn prosenn e Minis i a kapab pli byen *deal* avek.

Se konmsa. Mersi Onorab Cosgrow. Se konmsa ki sa in arive. Lo kestyon *press conference*. *Press conference* ki Minis Lanplwa in donnen yer ti lo *Quarterly Review* son Minister. *Quarterly Review*, Zanvye ziska lafen Mars.

E sa ti en papye ki ti'n ganny prezante devan *Cabinet*. E Minis Lanplwa ti eksplik mwan poudir, ki i zot in ganny demand epou letan i annan bann dokiman ki nesese eksplik piblik. Fer en *press conference* e met sa devan piblik. E se sa lo sa baz ki ti'n organiz son *press conference* pou Vandredi pase.

Me Vandredi pase pa ti kapab fer laranzman alor i ti fer li pou Lendi e sa napa nanryen pou fer avek kestyon ki Onorab Cosgrow in met lo *Order Paper*. Onorab Cosgrow ou kestyon i lo *Order Paper* e i pou vini.

Avek sa mon a dir tou dimoun mersi. Mon a dir Minis Dr Gedeon e Dr Louange mersi bokou pour letan ki zot in pas avek nou lo en size vreman enportan.

Pou nou Lasanble e pour piblik. E les mwan zis azout mon lankourazman personnel lo travay ki zot pe fer e ki zot *staff* lasante dan tou kote pe fer, pou *safeguard* nou popilasyon. Mersi bokou e mon remersye tou dimoun pou zot partisipasyon. Nou ava pran poz la e nou a rezwenn 2er apre midi. Mersi.

(BREAK)

MR SPEAKER

Bonn apre midi nou bann Manm e nou lodyans an deor. Nou annan prezan kestyon pour Minister Later e Labita. Nou ava apel delegasyon silvouple.

Bon bonn apre midi e byenveni Minis e delegasyon. Nou annan Minis Billy Rangasamy, Minis pou Later e *Housing*. Nou annan Mr Denis Barbe Sekreter Prensipal pou *Housing* e Mr Yves Choppy Sekreter Prensipal pou Lenfrastriktir.

Nou annan lezot zofisye, pour kestyon swivan. Alor apre sa premye sesyon nou pou bezwen pran ankor en pti *break* pou permet sanitasyon.

Bon nou a komans ek kestyon Onorab Regina Esparon. *Member for Glacis*

pour Minis Rangasamy. Onorab Esparon.

HON REGINA ESPARON

Mersi Mr Speaker. Bonn apre midi Minis avek ou delegasyon. Bonn apre midi tou dimoun a lekout. Mr Speaker an vi ki aprezan tou led pou lozman pou bann dimoun vilnerab ki avan ti pe ganny asiste anba Lazans pou Proteksyon Sosyal (ASP) in transfer kot son Minister, mon kestyon pou Minis se:

Ki manyer son Minister pe evalye bann sityasyon, avan ki bann kliyan i ganny asiste?

Ki nouvo striktir ki'n ganny met an plas pou fasilite prosedir pou bann kliyan?

E trwazyenman, ki maksimonm larzan ki Minister pe ofer bann kliyan ki vilnerab? Mersi Mr Speaker.

MR SPEAKER

Mersi Onorab. Minis ou a donn ou premye repons silvouple.

MINISTER BILLY RANGASAMY

Mersi Mr Speaker. Bonn apre midi tou Onorab prezan. Bonn apre midi tou ki a lekout. Mr Speaker mon remersye Onorab Esparon pou son trwa kestyon. Avan mon reponn kestyon Onorab Mr Speaker, silvouple permet mwan pou remersi

almighty Bondye tre o, pou son lafors ek lasazes ki akord tou prezan e nou pep Seselwa.

Mon priye ki prezans Lespri Sen vi ki nou fek selebre Lafet Lapannkot resaman i ranpli nou leker ek lanmour, pou progre nou pei Sesel e pou nou pep an antye. Mersi.

Mon komans avek premye kestyon Onorab. Onorab parey ou'n fer sorti sa program pou lozman bann dimoun vilnerab, in fek ganny transfer boner sa lannen kot Minister Later ek Lakaz.

E sa ti osi konfirman pandan bann deba Bidze ki ti fer boner sa lannen. I tre, tre enportan pou nou konpran ki sa program i ase konplike. Mon repete ase konplike. Akoz?

I annan plizyer Minister ki enplike tel ki Lazans pou Proteksyon Sosyal ASP kot Minister *Social Affairs*, Minister Gouvernman Lokal dan bann biro distrik. Minister Finans e osi Departman Lakaz e lenfrastriktir dan mon Minister.

An se moman, mon pe enform Lasanble ki en lodit konplet pe ganny fer par Minister Finans, Biro Oditer Entern dan Gouvernman. spesifikaman lo sa Proze Lasistans Lakaz pou bann dimoun vilnerab ki nou pe koz lo la.

Sa legzersis pe analiz koman sa program ti ganny zere dan lepase. Son bon kote, son bann konplikasyon, son move kote. E kote nou bezwen korize. Parske nou bezwen lans nou lo en program ki kordinen, ki entegre e osi ki transparan.

Nou pe atann rezilta sa lodit lo Polisi e prosedir ki an plas prezantman afen ki nou a kapab finaliz nouvo Polisi, en sel Polisi. Ler mon dir en sel Polisi parske prezantman i annan en pe diferan stratezi dan sak Minister.

Be nou bezwen kordin sa fer li vin en sel Polisi. An paralel en resansman tou bann ka ki avek nou, pe osi ganny fer par tou Departman konsernen. Par egzanp Minister Gouvernman Lokal e Departman Lenfrastriktir.

Baze lo sa resansman nou pou kapab kategoriz nou bann proze par trwa group kliyan diferan.

Premye group, se bann proze ki deza in komanse e kontrakter i lo *site*, lakaz pe ganny fer, preparasyon pe ganny fer.

Dezyenm group se sa bann ki Komite *Vetting* ki ti la oparavan ti'n fini pran bann desizyon, me proze ti ankor dan en staz *design*. Fer plan ek

tender. Pa ankor fizikman ganny konstrir lo *site*.

E trwazyenm group bann proze ki en laplikasyon ti ganny dispoze kot bann Lazans konsernen, par bann Biro Brans eksetera, biro distrik. Me travay teknik pa ti ankor konplete.

So mon'n ede pou klasifye sa bann group pou konpran sa lanpler, sa bann ka ki devan nou. An vi sityasyon bidzeter sa lannen e nesesite pou restriktir sa program. Gouvernman pa pe kapab kontinyen avek sa bann proze dan menm fason ki oparavan.

Alors dan limedya lapros Minister i *comme* swivan: -

(1) Pou bann proze ki dan group kategori nimer 1, ki deza kot kontrakter in deza komans konstriksiyon lo *site*. Nou napa swa nou bezwen kontinyen sa bann proze, fini zot e Departman Lenfrastriktir oubyen Departman Gouvernman Lokal, i angaze pou fer sa bann proze bouze e konplete o pli vit posib.

Bidze i la pou fer sa, e lekip osi pe debrouye pou fer sa vin en realite. Parkont pou bann proze ki dan kategori nimer 2;- setadir bann ki'n, Komite *Vetting* ti'n fini pas lo la, me konstriksiyon pa ankor komanse lo santye.

Sa bann proze pa pou kapab demare a se moman, pou bann rezon bidzeter ki nou annan. Parske nou annan deza langazman ek bann kontrakter e sa Bidze ki nou'n gannyen, se pour nou enplimant sa bann proze.

Trwazyenm kategori, e parkont sa bann aplikasyon i la nou konnen ki'n ariv en staz avanse e pou sa trwazyenm kategori parkont kot staz *vetting* ti'n zis ganny fer, me pa ti ankor pas dan bann staz *design*, ni *tender*.

Nou pe depans larzan piblik, alors nou bezwen azir pridan pou gard sa bann dosye lo poz. Setadir parey nou dir an Angle, *pending* pou lemoman.

Sa travay levanter e lodit pour furni nou ek lenformasyon ki ava permet nou met an plas sa nouvo Polisi, en sel Polisi parey mon ti dir oparavan, en fason *ok*, ki ava annan, i ava enkorpor bann kad legal bann kad operasyonnel.

Parske Mr Speaker nou lobzektif i enn ki senp, nou pe vin avek bann kriter kler pou asire ki sa lasistans i tous bann lakour ki vreman, vilnerab. Seryezman vilnerab e dan bezwen.

Onorab pou reponn ou kestyon nimeron 2, ki nouvo

striktir ki'n ganny met an plas pou fasilite prosedir pou bann kliyan.

Mr Speaker anvi ki sa lodit ek levanter i ankor pe ganny fer vi ki lekspertiz Minister Lakaz ek Later i pa dan bann eleman sosyoekonomik. Antretan nou'n met an plas en Komite Travay ki konpri bann lekspertiz dan Gouvernman, diferan Departman, pou nou kapab pran bann desizyon nesese lo bann proze ki an mars e fer sir ki sa i kontinyen bouze parey mon'n mansyonnen oparavan.

Travay pe progrese pou met an plas sa Polisi. I pou anglob sa striktir ki ou'n demande Onorab e entegre bann diferan Lazans ek Minister ki relye avek sa bann kalite proze, e partaz responsabilite dapre zot kapasite e zot koudmen ki zot kapab donnen.

A lafen sa Polisi final ek striktir apre konsiltasyon apropiye, avek tou bann Manm Lasanble pou bezwen laprouvasyon Konsey Minis. E la apre nou a kapab demare dan en fason ki kler e ki transparan.

Mr Speaker, pou trwazyenm kestyon, Onorab ki maksimonm larzan ki Minister pe ofer bann kliyan ki vilnerab? Sa i en kestyon ki mon bezwen,

eksplik prezantman manner keksoz i ete, epi pou pli tar ler Polisi an plas pou nou vwar ki nou pou fer.

Anba Polisi ki egziste konmela dan mon Minister, ki defini kalite proze pou asiste bann kliyan avek, napa en valer maksimonm, napa en valer maksimonm larzan ki ganny spesifye prezantman.

Sa Polisi i fer provizyon pou kalite konstriksyon e limit grander lakaz ki Gouvernman i asiste bann kliyan vilnerab avek. Baze lo kantite lasanm eksetera, la grander lafanmir tou sa.

Pou fer sa bann proze pli ekonomik posib Minister i servi bann plan standar, ki fer sir ki nou kapab kontrol kalite, spesifikasyon ki tonm anba sa *Scheme*.

Akoz ou kapab mazine si ou pa fer sa ou pou kapab ganny tou kalite *design*, bann keksoz ki konplike, ki kout bokou larzan, bann spesifikasyon dan lakaz; tel ki bann *tiles* ki pa tonm dan sa kategori en proze lasistans pou bann lakaz sosyal, *well* dimoun vilnerab.

Alors determinasyon son maksimonm si i neser, pou ganny determinen anba sa nouvo Polisi. Me i pa kler prezantman ki pou annan sa

capping, anefe. Me parkont ler nou ava pas lo sa Polisi nou ava vwar en pe son bann lafors, son bann defayans striktir tou sa, nou a kapab determinen si i neser pou met en sonm maksimonm en fwa pour tou.

Mr Speaker, mon le profit sa lokasyon pou eksprim nou senser lapresyasyon pou bann fanmir. Sirtou kot i annan bann zanfan dan lakour ki dan lanplwa e reste ek zot paran, ki kontribye kan i posib e kot i posib pou ede kot lakour, pour amelyor zot prop sityasyon akote Gouvernman. Sa i tir bokou presyon lo Gouvernman. Wi mersi Mr Speaker.

MR SPEAKER

Mersi Minis. Nou a pas lo kestyon siplemanter bann Manm. Pa bliye mon rapel zot gard zot kestyon kourt e direk. Onorab Esparon ou le komans ek kestyon siplemanter?

HON REGINA ESPARON

Mersi Mr Speaker. Mersi Minis pour larepons byen presi. Mr Speaker mon rekonforte Minis ki ou Minister pe al met en lord dan sa dezord, dan sa dezord dan sa kales kase! E mon kontan parski sa, sa *Vulnerable Home Repair Scheme* ti pe ganny servi pou fer politik avek!

Mr Speaker mon anvi demann Minis, eski Minis ou kapab dir nou lo kote repeyman, si sa nouvo Polisi ki pou ganny etabli, pou osi adres repeyman bann sonm larzan ki ganny donner pour konstri sa bann lakaz vilnerab?

Parski dan bokou ka nou'n vwar letan sa dimoun in mor i annan en *stop* la, e parfwa i annan peyman ki pa pe ganny fer. Eski sa Polisi pou osi adrese? Ki fason ki Minister pou rekiper sa larzan apre ki sa dimoun in *passed away*?

Dezyenmman Mr Speaker, mon apresye ki Minis in dir i annan en lodit ki pou ganny fer. Eski son Minister pou kapab fer nou ganny en lalis apre sa odit? Lo bann travay ki'n komans e par distrik e ki pa ankor fini?

E osi en lalis bann travay ki'n ganny aprouve, me ki pa ankor komanse?

Epi Minis lo kote bann - par egzanp la an se moman, pou nouvo ka eski ou Minister pou *entertain* nouvo ka, oubyen i pou annan en, en *stop* la, pou esper *clear* sa ki ti deza la apre pou pran bann nouvo ka? Mersi Mr Speaker.

MR SPEAKER

Mersi Onorab. Minis mon annan en douzenn Manm lo

lalis deza. Donk mon envit ou pou gard ou repons kourt silvouple. E si ou teknisyen ou bann zofisye i bezwen reponn zot kapab pran laparol zis diriz mwan. Minis ou repons.

MINISTER

BILLY

RANGASAMY

Ou'n fer mwan. Mersi Mr Speaker mon vremen kontan ou'n dir mwan mon bann koleg i kapab ed mwan. E selman mon a reponn mon kestyon mon menm si mon bite mon a demann zot lasistans pou asiste mwan.

MR SPEAKER

Wi. Ler ou bezwen.

MINISTER

BILLY

RANGASAMY

Mon a komans avek kestyon Onorab lo nouvo ka, parey mon'n fer resorti dan mon repons tou bann nouvo ka i lo *pause*. Tousala i lo *pending* pou nou etabli Polisi epi nou a kapab adres bann nouvo ka lo en fason dapre nouvo Polisi.

Lalis byensir, nou a kapab fer ou ganny lalis sa pa en problem ditou.

Nou pe *operate* dan en fason *open and transparent* nenport lalis ki annan, nenport lenformasyon ou osi ou kapab

atraver Mr Speaker nou a kapab fer ou gannyen pour sir.

Lo baz repeyman, tou repeyman pou pas atraver *PMC* e dan nouvo Polisi nou pou met sa an plas. E pou annan bann kad legal, pou nou garanti bann formil repeyman.

E ou pwen i vreman valab sirtou lo bann ka kot en fanmir pou sa dimoun ki ti responsab i kit nou, pou annan sa bann kad legal pou nou adres bann tel kalite sityasyon.

Lo parey dan tou keksoz nou pou fer tou nou *brainstorming* pou nou *capture* tou bann senaryo. Me pou osi sa i enn bann ki trakas nou e preokip nou Minister bokou. Mersi Mr Speaker.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. Bonn apre midi Minis. Bonn apre midi bann *PS*, bonn apre midi tou dimoun. Minis ou'n dir nou poudir zot pe devlop bann nouvo Polisi pou kapab gid zot pou kapab, kontiny sa bann proze, ki Gouvernman oparavan ti'n komanse.

E menm nouvo fason ki mannyer pou *deal* avek sa bann nouvo proze. Minis an mezir nou pe fer Polisi dimoun i dan

bezwen deor, mon ti kontan demann ou ki kantite letan ou pe anvizaze, zot pou nobou kapab met sa bann Polisi ansanm?

So ki sa bann proze bann ki *pending* i a kapab demare e ki dimoun ki bezwen sa lasistans sa led i kapab ganny en soulazman deor?

Dezyenm Minis, ki diferans ant sa Komite ki ou'n dir nou ou'n *set-up* avek sa *Vetting* Komite ki ti egziste anba Departman Gouvernman Lokal ki ti pe *vet* bann diferan laplikasyon. So ki nouvo keksoz ki zot pe anmennen? Akoz ti deza annan en Komite avan e la zot pe kree en lot Komite?

E an mezir sot pe fer tousala i annan dimoun deor la ki vreman, vreman, dan bezwen e ki pa kapab esper Komite apre Komite lo lot Komite Polisi apre Polisi. I paret mwan dan Minister, sa i en Minister ki pou mwan napa okenn gran Polisi ki'n sanze, dan tou sa tapaz ki ti annan dan sizyenm Lasanble - napa okenn Polisi ki pe sanze e zot ti pe kontan lo menm Polisi ki Gouvernman avan ti mete. Mersi Minis.

MR SPEAKER

Mersi Onorab. Minis ou a pran kestyon.

MINISTER **BILLY**
RANGASAMY

Mersi Onorab Cosgrow. *Ok.* I annan enn bann kestyon mon pou demann en lasistans avek *PS Choppy* lo *Vetting Committee*, akoz annefe in travay tou lede group so i byen plase pou ed mwan ek sa kestyon.

Mon a reponn bann pou mwan, avan apre mon a pas li lo sa enn avek ou permisyon. Lo bann Polisi mon a komanse ek dernyen kestyon, lo bann Polisi. I vre ki ou pe dir ki prezantman.

Wi i vre sa ki ou'n dir ki prezantman dan sa peryod kourt ki nou'n komanse nou pe *operate* lo bann menm Polisi ki la an plas. Sa i vre, napa nanryen pou kasyet. Me stratezi lekup la, nou pou prezant sa bann Polisi egzistan ek Konsey Minis byento.

Annefe nou'n alinyen petet dan de semenn, trwa semenn pa plis ki sa. Pou nou pas lo bann Polisi egzistan Later, Polisi egzistan Lakaz, Polisi egzistan lo bann zafer enfrastruktir. Enn de bann keksoz ki bann Polisi *PMC* par egzant pou nou enform nouvo *Cabinet*, swa kwa ki la, kwa ki zot anvi travay lo la.

Nou osi nou pe vin avek detrwa nouvo sizesyon pou nou amelyore touzour. E sa stratezi,

i vre selman sa ki ou'n dir pou le moman Polisi ankor parey.

Me nou pe prevwar dan en dele, en de mwan pa plis ki sa nou a kapab ganny en pe, en pe, enkorpor bann lide ki sorti kot Konsey Minis e osi bann, bann legzersis ki nou pe fer ek bann Manm Lasanble.

Nou pe komans fer sa legzersis ek tou Manm Lasanble pou nou kapab. Bann Onorab eskiz mwan, pou nou kapab ganny zot bann pwennvi e enkorpor li dan plen lespri pou nou kapab fer en Polisi, touzour dan en lespri pou nou kapab amelyore.

Letan pour sa nouvo Polisi konsernan *Vulnerable Housing Scheme* la, li parski son enplimantasyon i relye avek sa odit ki Biro Oditer Entern pe fer, i en legzersis ki Minister Finans pe fer en legzersis vremen detaye.

E mon'n koz avek Sef Oditer Entern, Vandredi e in fer mwan resorti ki bann sityasyon *COVID* pa'n ed li, pou li kapab vremen travay lo tou sa dosye. Menm al vizit bann santye pou li vwar, pou zot vwar pou zot menm.

So, sa travay i bezwen ganny fer konzwentman, ler zot in fini fer zot odit, pou nou kapab vwar bann eleman defayans, bann bon eleman ki

zot in fer resorti, pou nou enkorpor li dan sa Polisi.

So i en pe difisil pou mwan donn ou fransman verite en dele letan. Selman mwan ek mon lanvi travay ek en lespri dinamiz, mon a ti a voudre sa i pran plis ki en trwa mwan.

Mon ti a voudre ki ti a kapab fer bokou plis. Parkont nou konsyan ki annan dimoun laba deor ki nou bezwen amelyor zot kondisyon, nou'n ganny en poursantaz Bidze en, en sonm Bidze.

E parey mon ti fer resorti tou bann ka ki'n deza demare lo *site* sa pe ganny fer pe fini. E *hopefully* nou a kapab pran sa dezyenm kategori *once* ki nou, nou'n kapab etabli serten striktir pou nou *move* devan o pli vit posib. I pa mwan, i pa dezir mon leker pou tard okenn dimoun aranz zot sityasyon lavi en. Pa ditou leka.

MR SPEAKER

Mersi Minis. *PS Choppy* pou rebran. Parey Minis in dir.

PS YVES CHOPPY

Mersi Mr Speaker. Diferans ant sa de Komite se plito dan manda. Sa Komite *Vetting* avan li i ti pe get sa bann laplikasyon zot zistifikasyon pou zot antre anba sa program. I ti plito ganny dirize par Gouvernman

Lokal ek Lazans Proteksyon Sosyal.

Sa nouvo Komite li son manda i plito pou get bann proze ki an mars pou lemoman.

E an ka kot i annan bann desizyon ki bezwen pran lo bann proze ki an mars an se moman, sa responsabilite i avek sa Komite Travay ki la.

Sa Komite Travay i osi pou get en pe bann levanter ki pe ganny fer, pou gete lekel bann proze ki bezwen ganny plis *assessment*. Komite Travay ki an plas pou le moman i ganny formen reprezante *PS* Departman Lenfrastriktir, *PS Housing*, *PS Family Affairs*, *CEO Lazans Proteksyon Sosyal*, *PS Local* Gouvernman. E nou osi annan reprezentan Departman Finans ek en reprezentan *Procurement Oversight Unit*. Mersi.

MR SPEAKER

Mersi Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker mon'n not larepons Minis dan son dernyen bout larepons, kot ou'n fer en lapel pou bann zanfan, bann fanmir ede, kot zot kapab pou tir en pe fardo lo Gouvernman.

E resaman nou pe koz

bokou lo responsabilite personnel. Nou lakour i nou responsabilite, non selman nou lasante me nou lakour osi i nou responsabilite.

Donk mon ti ava kontan demann ou avek *panel*, si anba sa nouvo Polisi, zot pe reflexir dan direksyon ki bann zenerasyon lavenir i pran sa responsabilite.

Me solman i annan bann program ki Gouvernman ti kapab negosye zot legzistans, ki kapab ed bann dimoun. Par egzanp, bann labank i kapab fer bann *Scheme*.

Zis pou bann *Home Improvement Grant*, bann Fon Pansyon i kapab *come-up* avek en, en keksoz. Bann lakonpanyen lasirans i kapab *come up ek something specific with regards to home improvement*. Eski anba sa nouvo Polisi zot pe mazin dan sa direksyon? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Be Onorab Henrie mersi bokou. Ou'n vreman partaz bann bon nide. E i kler ki anba sa nouvo Polisi vi ki nou pou annan sa, sa fason ki oditer pou get sa bann, sa bann sityasyon aktyel.

E fason ki nou pou annan bann dimoun ki annan bann lespri komersyal osi pou vwar sa sityasyon.

Parey ou'n fer resorti i annan bann bon eleman la, pou osi nou pou enkorpor sa dan sa, dan sa nouvo Polisi. E la ou donn mwan en lentere pou mwan sertennman angaz bokou. Mon pou fer en lapel ek tou bann Manm Lasanble koman mon la, partaz sa bann nide ek nou, la nou dan peryod nou pe fer sa lodit nou pe fer bann resansman. Okenn nide ki zot annan, nou pou resevwar sa ek tou nou leker e nou pou enkorpor li *to the maximum*.

Bann bon nide e i kler pou nou al, pa tro met sa fardo lo Gouvernman toutan Gouvernman ki pou fer, Gouvernman ki pou fer. I annan lezot alternativ parey ou'n fer sorti Onorab. Wi, an prensip toutafe dakor nou pou fer sa wi. Mersi Mr Speaker.

MR SPEAKER

Mersi Minis. Onorab Aglae.

HON EGBERT AGLAE

Mersi Mr Speaker. Bonn apre midi Minis. Minis mon'n ekout byen ou bann larepons, ki ou'n donner. Mon ti a kontan petet Minis etabli en pti gin mon krwar labaz akoz i annan

serten.

I annan serten persepsyon la deor konmkwa resours pa ti pe ganny servi byen, ouswa ti pe ganny servi pou politik.

Me selman rezilta i montre pou li menm i pa'n dan nou faver savedir. Minis 40poursan lapovrete ti enn bann labaz ki ti annan plis larzan ti ganny mete anver sa *Scheme* ki nou apel *Vulnerable Home Repair Scheme*.

E mon konnen aköz mon ti dan sizyenm Lasanble kote lot latab *LDS* ti fer bokou lafanfar lo sa 40poursan lapovrete. E letid ti ganny fer li menm li e kreasyon sa Seksyon *Poverty Alleviation*, kot laba i annan bokou bann lenformasyon baze lo bann resers ki'n ganny fer, data ki'n ganny kolekte.

Mon ti a kontan petet konnen anvi ki zot pe revwar Polisi bann keksoz koumsa, eski sa bann lenformasyon ki ti ganny kapte i a la zot porte, zot pou ganny zot pe servi li, pou kapab *at least* nou pa bezwen al re envant larou.

Ouswa re al vizit, re al rod *cases* aköz ti deza la, pou nou kapab pa perdi letan me bouze apre ki zot, zot krwar ki zot in pare pour zot kapab met finans annord pou zot bouze. Sa i enn Minis.

Dezyenmman Minis, mon

ti a kontan petet - i pou pas atraver ladministrasyon distrik, ganny en komikman dan en fason kot ki bann *existing cases* ki deza pe espere plis ki lan, 2an i ava pas koman bann priyorite, si in satisfere sa ki zot, zot krwar zot pe vin avek devan? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Mersi Mr Speaker. Mersi Onorab pou ou bann bon kestyon. Pou premye kestyon avek ou permisyon mon a demann *PS Barbe* pou asiste mwan, epi mon a pran dezyenm kestyon silvouple, en?

MR SPEAKER

Ok. Annou ale. *PS Barbe*.

PS DENIS BARBE

Mersi Mr Speaker. Onorab mersi pou ou kestyon. Enn bann rezon prensipal osi aköz ki nou santi nou bezwen met en pti poz lo sa bann *case* ki nou pe dir ki ti'n deza fer aplikasyon. I pou permet nou osi kapab rekaliibre nou an term lenformasyon ki bann diferan sekter anmase.

Parey *PS Choppy* in soulinyen i annan plizyer akter

ki lo sa *Working Committee*.

E sa *Working Committee* enn son bann manda osi se ki pou fer sa pti letid baze lo bann diferan lenformasyon ki pe dekoule from *Family Affairs*, ki dapre mon konpran laplipar bann lenformasyon ki zot in anmase pour sa *Poverty Survey* ki zot in fer sirtou bann konponan ki annan pou fer avek sekte lakaz.

Zot kapab dekoule sa lenformasyon dan sa *Working Committee*. Nou osi ganny sa lenformasyon de baz ki nou pe fer, ki nou deza fini anmase lo bann levanter lo bann ka ki nou annan, pertinan avek bann ka ki pe antre.

E avek lenformasyon odit sa pou kapab ed nou pou nou kapab *at least* ankadre sa Polisi pou rezourd bann konsern ki pa zis Minister, me selman ki kekfwa Departman Entern kot Odit Minister Finans i annan.

E an menm tan get en pti pe *trend* ki nou pe *pick up* ek bann laplikasyon ki pe antre, pou nou gete egzakteman ki mannyer nou kapab *rule out* sa Polisi ek en striktir ki kapab ed nou anmenn sa bann rezilta ki nou, nou anvi pour soulaz bezwen sa bann dimoun.

So bann lenformasyon ki deza la nou pa bezwen re anmase. Nou pou zis re servi sa

bann lenformasyon, pou napa kapab *at least* ganny en set Polisi avek prodwi ki kapab zwenn bezwen *grassroot* ater. *Thank you.*

MR SPEAKER

Mersi Minis.

MINISTER

BILLY

RANGASAMY

Mersi Mr Speaker. Onorab pou ou dezyenm kestyon. Wi, parti en pe eleman ki nou pou met an konsiderasyon letan nou *set-up* bann striktir, bann kriter se bann dimoun ki pe espere depi lontan, pour sir si zot merite, si ou pe fer en lalis ou pe fer priyorite zot, zot pou annan bann, bann eleman kot zot pou ganny sa priyorite pou sir an vi ki zot aplikasyon i avek nou ase lontan par egzant en?

E sa i pou ou, annandler parey nou pe ti dir bann kad operasyonnel legal eksetera dan operasyonnel bann kriter ki nou pou met an plas, en fakter ki ou pou bezwen pran konsiderasyon se, konbyen letan sa dimoun pe espere par egzant? Sa pou sir. Mersi Onorab.

MR SPEAKER

Mersi Minis. Leres Manm mon prezant en leskiz, menm kanmenm senk dimoun in

demann kestyon i reste mwan ankor 10. Mon pou limit bann entervenans ki vini avek en pwen. Silvouple zis pou permet tou dimoun annan sans aköz mon bezwen termin sa ver 3er pou nou pran lezot biznes. Onorab Mondon.

HON TERENCE MONDON

Mersi Mr Speaker. Mr Speaker mon anvi demann Minis ler nou pe koz lo sa bann ka in koz lo trwa kategori. Si i kapab dir nou dan sa kategori 1. Sa bann ka kot konstriksyon ti deza komanse ki kantite ka e konbyen pe kout Gouvernman ozordi?

E osi pou tou lede larestan kategori 2 avek 3. Bann ki'n fini fer *design*, epi bann ki aplikasyon, donn nou en pe statistik kantite ka e konbyen sa i reprezante an term Bidze pei? Mersi.

MR SPEAKER

Mersi Onorab. Minis

MINISTER BILLY RANGASAMY

Mersi Mr Speaker. Mersi Onorab. Mon pou demann lasistans PS Choppy ki annan tou sa bann detay devan li pou partaz sa avek nou. Sa bann statistik.

MR SPEAKER

Mersi PS. *Go ahead.*

PS YVES CHOPPY

Mersi Speaker. Dan kategori 1 kot i annan bann proze ki *ongoing*. Petet avan mon komanse mon a zis fer resorti ki bann ka i annan serten bann, bann ka ki kot nou Minister Departman Lenfrastriktir pou enplimante. Apre sa, i annan en bann ka ki kot Gouvernman Lokal.

Dan premye kategori ki bann ki anba konstriksyon. Mon annan statistik pour tou lede Minister. I annan 61 ka kot Minister Gouvernman Lokal ek 18 ka kot Minister kot nou Departman Lenfrastriktir.

An term bann lezot ki dan staz *design* ek bann ka ki nou pa ankor fer bann travay teknik. Malerezman Mr Speaker mon annan statistik zis pour nou Minister. E bann ka ki nou ti'n fini fer *design* me selman nou pa ti ankor ariv lo staz enplimantasyon, nou annan nou 19 ka.

E bann ki total, nou ti annan nou 134 ka ki ti'n ganny *refer* avek nou. Savedir balans bann ka ki nou pa ti ankor fer louvraz teknik i pou vin nou 74 ka. Mersi

MR SPEAKER

Mersi *PS.* Onorab Monthy.

HON PHILIP MONTHY

Mersi Mr Chair. Bonn apre midi Minis avek ou delegasyon. Mon ti annan de kestyon Mr Speaker bezwen demann zis enn.

MR SPEAKER

Wi. Anvoy enn silvouple.

HON PHILIP MONTHY

Mon a demann enn epi mon annan zis en pti sizesyon pou, pour Minis.

MR SPEAKER

Anvoy en kestyon silvouple Onorab.

HON PHILIP MONTHY

Minis dan lenstans kot ou remarke in annan labi. *Ok.* Mon pa tro familye ek sistenm repeyman sa *Scheme*. Me selman si ou remarke i annan lenstans in annan labi ki en dimoun ti kapab al kot en labank, pran en *loan*, fer son lakaz ki'n benefisye atraver sa *Scheme*.

Eski sa sistenm repeyman, fason ki i pou re pey sa i reste parey, oubyen zot pe mazin fer li pey en pe plis pour ki petet sa larzan i a ganny servi pou benefisye en lot fanmir ki vremen dan bezwen? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Wi, wi mersi bokou Mr Speaker. Mersi Onorab. Wi pou osi i pou en eleman ki nou bezwen analiz e pran bann bon desizyon lo la. E kot i annan labi i pa keksoz ki nou kapab tolere. Si i kler se sa Departman Odit Entern i ti bann dimoun kalifye, kalipa zot annan sa kalipa, sa konpetans pou *advice* nou lo la.

E kot nou vwar si i kler i annan sa osi nou pa pou kapab kontinyen tolere i ava annan konsekans ki pou al avek.

Mon napa sa lenformasyon pou konfirm ek ou i vre ki annan sa bann ka. Nou pou osi si annan i pa en keksoz ki nou kapab, ki pou akseptab pou nou zis, met anba tapi e les ale. Ou bezwen *deal* avek apropiye. Mersi bokou.

MR SPEAKER

Mersi. Onorab Monthy eski ou kapab fer ou sizesyon lo 30 segonn?

HON PHILIP MONTHY

Wi. Mon ti pe zis sizere ki i annan form kominikasyon sorti kot Minister konsernen dan laform en let, pou enform sa bann dimoun ki petet ti'n fer

laplikasyon, oubyen zot proze i ankour zis pou enform zot ki pe arive avek sa prosesis e petet *the way forward*. Mersi.

MR SPEAKER

Ok. Mersi Onorab Monthy Minis ou'n note. Onorab Loze.

HON JOHAN LOZE

Mersi Mr Speaker. Bonzour Minis avek ou delegasyon. Bonzour tou dimoun a lekout. Minis mon anvi konnen si ou, si ti posib pou ou konsider lefe ki nou annan serten fanmir dan sa pei ki li i pa pou zanmen *get anywhere* avek en Labank Komersyal li.

Souvan sa bann menm fanmir zot napa ni en lasirans zot, zot napa mwayen pou ganny akse avek kapital lo marse komersyal. Sa i zot realite. La mon pa pe koz dimoun ki'n abize, dimoun ki'n fer koripsyon.

Mon pe koz dimoun ki viv li dan sa realite.

Parti *LDS* in vin o pouvwar avek en kanpany Eleksyon "elimin lapovrete". Ou Gouvernman, Minis i annan li en devwar moral, pou li onor sa bann ki'n pran pandan tou sa bann lannen, ki i ti pe fwet lapovrete koman son seval batay.

Ozordi nou pa kapab vire

dir sa bann dimoun ki i en *burden* lo Gouvernman, i en fardo lo Gouvernman e i pa pou kapab et en *burden* lo Gouvernman e i bezwen al ver Labank Komersyal, kot i pa'n zanmen kapab ganny *proper access* avek kapital laba.

Nou trouv nou dan en sityasyon Minis, kot nou trouv 3 milyon pou al fet *Yuri Gagarin* lo zil, selman letan ariv pou vilnerab nou dir zot dan kales kase! Mersi *Minister*.

MR SPEAKER

Mersi. La prosenn fwa pran letan pou kestasyon silvouple. E pa anmenn eleman eksternel ladan. Minis ou annan en repons pou sa?

MINISTER

BILLY

RANGASAMY

Annefe mersi bokou Mr Speaker. Mon pa tro vwar i annan bokou kestasyon. I plito bann komanter vremen enportan, byen enportan. Parske mwan ek personnelman, personnelman san okenn afilyasyon politik. Mon annan en leker, mon en kretyen e mon konsyan ki pa tou dimoun ki'n arive en staz kapasite finansyer dan son lavi.

I annan ki dan difikilte, alors pour sir bann dimoun ki vremen vilnerab parey mon'n

fer sorti i vremen merite, zot ka pou ganny, zot pou ganny sa lasistans dapre zot sityasyon familyal, zot sityasyon sosyal, zot sityasyon finansyer dan lakour.

Sa pou sir, zot pou parey mon'n fer resorti se zot ki pou ganny priyorite. Me parkont bann fanmir kot i annan zanfan ki kapab ki pe kontribye kot lakour, lentervansyon mon krwar ki ti ganny fer oparavan ki mon osi mon ti mansyonnen, nou pou ankouraze, nou pou sey fer fason nou a met an plas, bann mekanizm ki zot osi zot kapab antre dan sa zwe donn en koudmen siport Gouvernman dan sa travay.

MR SPEAKER

Mersi Minis pou sa repons. Onorab Letourdie. Mon'n bliye.

HON JANY DE LETOURDIE

Mersi Mr Speaker. Bonn apre midi tou dimoun. Mr Speaker avek ou permisyon mon ti ava regarde si ou ti kontan, kapab les mwan fer en remersiman.

MR SPEAKER

15 segonn.

HON JANY DE LETOURDIE

15 segonn. Mon remersi mon parti ki'n donn mwan ankor sa sans pou mwan kapab vini pou

brose, pouse pou mon pei. Me selman mon konnen poudir gran met li menm li ki'n met *wisdom* dan zot, ki fer zot deside pou zot pran bann bon desizyon.

Gran met i dir “Jany ou pa pou al ni North East Point, ou pa ni pou tonm latak, ni dan *ICU*, me ou pou tourn dan Lasanble”.

(APPLAUSE)

HON JANY DE LETOURDIE

Minis, vilnerabilite i en mo ki kapab ganny enterprete dan nenport ki fason, pou sa dimoun ki li in vwar li petet i ladan. Mon ti a voudre si ou ti a kapab donn en nide kwa ki ou pe konsider, ki zot pe konsider bann dimoun ki vilnerab?

Koumsa i ava napa bokou mekontantman petet pou bann dimoun ki krwar petet zot dan sa sityasyon me selman zot vwar zot, zot pe ganny viktimize.

Alors donn nou en nide ki ou krwar sa bann dimoun ki ganny klasifye dan sa term vilnerabilite i ete? Mersi.

MR SPEAKER

Mersi. Minis.

MINISTER
RANGASAMY

BILLY

Mersi Mr Speaker. E mersi Onorab pou ou kestyon. Mon osi mon ti a kontan, mon pa'n demann permisyon Mr Speaker mon ti a kontan osi felisit ou pou revwar ou ankor dan Lasanble.

E vilnerabilite, sa i en bon kestyon. Akoz mon asize mon ganny *phone call* lannwit koman lizour, mesaz. E *obviously* tou dimoun i konn son ka personnel e li i dir ou i vilnerab.

Me letan ou asiz dan mon sez ek mon bann zofisye nou vwar serten eleman ki kondisyon enn i bokou pli diferan ki kondisyon lot.

Me selman sa dimoun ki dan sa douler li i dir ou i vilnerab. Ou konpran mwan? I vre sa i en keksoz ki nou bezwen klasifye konfirman, met byen kler.

Prensipalman nou pe baz li plito lo laspe ekonomik e kapasite finansyer sa fanmir.

Sa i prezantman kriter prensipal. I annan bann lezot kriter sosyal osi ki nou bezwen prenon kont. Ki mannyer landrwa i ankonbre petet, me selman i plis lo labaz finansyer pou kapasite sa fanmir, pou li kapab ed son lekor la kot Gouvernman i bezwen entervenir.

Me pour sir mon ti a

voudre kapab met en keksoz ki donn nou en pe paramet pou nou mezir sa, si i posib ler nou prezant sa nouvo striktir ek Polisi, Onorab.

Be parkont selman i delika, i sak dimoun i dir ou li i vilnerab osi en. E mon priye ki mon'n ase byen reponn ou kestyon. Mersi Mr Speaker.

MR SPEAKER

Mersi. Mersi Minis nou ava aksepte sa. Onorab Pillay e swivan pou Onorab Bistoquet. Alor ler Minis pe reponn ou kapab met pare. Onorab Pillay.

HON SEBASTIEN PILLAY

Mersi Mr Speaker. Mr Speaker Minis in donn nou larepons ase detaye, bann larepons ase emosyonnel vizavi sa sityasyon *Vulnerable Home Repair Scheme* e tou bann *Scheme* ki asosye avek sa.

Eski Minis pa panse ki enn bann fason pou *deal* avek sa sityasyon finansman otour sa bann *Scheme*, se pour osi retourn ver bann lazans ki ti pe *provide* serten finansman pour li?

Pa zis depan lo sa Bidze kapital ki Gouvernman i donner, me osi bann Bidze alternativ ki kapab ganny donner atraver swa *ASP* e lezot landrwa. Pou zisteman

translate sa bann lasistans ki ti pe gannyen ki ou kapab pe donn dimoun dan son lanmen, ganny en lasistans pli formel e pli dirab, par ed li pou fer annan sa reparasyon lo zot lakaz. Eski sa i form parti bann fason revwar sa *Policy* ki zot annan an plas?

Akoz lesansyel se pour nou kapab zisteman asire ki dimoun ki vilnerab i gannyen sa sipor, e nou pa anvoy en lot kalite mesaz avek zot ki, nou pa en sosyete ki krwar oubyen ki anvi ed dimoun ki vilnerab. Mon krwar ou konpran kote mon pe ale Mr Speaker. Mersi.

MR SPEAKER

Mersi Onorab. Minis wi?

MINISTER **BILLY**
RANGASAMY

Mersi Mr Speaker. Mersi Onorab Pillay. Wi mon personnelman kapab annan en lemosyon vreman personel. E en konpasyon enorm pou bann dimoun ki dan bann kondisyon difisil, vilnerab e mon pou bezwen pran sa.

Mon vreman kontan ou pwen e pou osi nou pou bezwen travay en pe pli pros avek *ASP*, dan sa nouvo demars pou rod ki fason, ki mekanizm nou pou servi, pou vwar avek zot ki manner nou kapab petet

partaz bann konponan bidzeter, pou nou vreman al asiste sa bann dimoun.

Pa neserman, parey ou'n fer resorti larzan dan lanmen. Me atraver serten travay ki nou kapab fer ki kapab ganny peye dan en fason transparan.

MR SPEAKER

Mersi Minis. Onorab Bistoquet.

HON ROSIE BISTOQUET

Mersi Mr Speaker. Bonn apre midi Minis avek ou delegasyon. Minis letan ou'n koze i annan en detrwa mo konmsi ki'n atrakte mon latansyon.

Sirtou letan ou ti pe fer lentervansyon kot ou ti dir anba sa nouvo *leadership*, ou pa'n dir nouvo *leadership* solman anba sa Minister baze lo sa lodit ki ou pou fer, bann dimoun in repet de fwa vreman, vreman ki vreman, vreman vilnerab pou ganny asiste.

Eski Minis ki sa i vedir ki en kantite dimoun ki pa ti vilnerab, me ki zot ti ganny asiste dan lepase? Mersi.

MR SPEAKER

Mersi Onorab. Minis.

MINISTER **BILLY**
RANGASAMY

Mersi Mr Speaker. Mersi

Onorab Bistoquet. Onorab Bistoquet nou annan en responsabilite pou nou depans larzan piblik dan en fason ki drwat e onnet. E mon'n napa laprev devan mwan ki'n ganny konfirman ki annan dimoun ki pa ti merite e in ganny asiste. Mon napa sa lenformasyon devan mwan.

Mon annan serten obzervasyon mon'n fer me selman mon pe esper lofis konsernen pou annan larepons sa kestyon atraver lodit ki zot pou soumet avek mwan ek mon Minister.

Me parkont i enportan pou nou pran sa sityasyon serye letan nou bouz devan. Nou bezwen kapab annan bann kriter kler, pou nou fer sir ki sa labi si in annan pa repete. Se tou mon lapros ki mon pe pran.

Se sa mon'n fer resorti nou bezwen aprann bann fot si annan bann fot ki'n arive. I annan labi ki'n arive ek bann dimoun ki pa ti merite in ganny ede. Nou pou bezwen *deal* avek parey enn bann kestyon ti demande boner e bouz devan, dan en fason transparan.

E i kler ler i en pti pe isi, i en pti pe laba petet nou pa konnen ki'n kapab arive in *between*. Be selman si nou annan en sel Polisi, en sel set kriter ki aplik pou tou dimoun,

en sel fason pou analiz keksoz.

Mon krwar nou a kapab diminyen okenn bann, bann move pratik ki'n kapab arive. Parey mon repet ou mon'n dir ki kapab arive akoz pou le moman mon napa laprev devan mwan, *black and white*. Mersi Onorab.

MR SPEAKER

Mersi Minis. Onorab Vidot.

HON AUDREY VIDOT

Mersi Mr Speaker. Minis si i annan labi, si napa labi sa ki mwan mon kapab dir ki mon apresye ki Roche Caiman nou pa'n benefisyé ni dan labi, ni dan napa labi. Akoz nou, nou pa'n benefisyé atraver bann *Scheme* ki repar, oubyen ki kapab ed bann dimoun ki vilnerab annan en *unit*, ki permet zot kapab viv stab.

Me parkont mon ti a demann ou Minis dan revizyon ki zot pe fer. Akoz mwan dan mon distrik Roche Caiman, i annan bann dimoun ki parey mon koleg Onorab Loze in dir ou, i napa sa mwayen, sa resours pou li pran en *loan* pou li kapab aranz kot li oubyen azout en bout pour *accommodate* son fanmir.

Alors dan sa revizyon konsider Roche Caiman. I en distrik ki diferan avek lezot, pou plizyer laspe. Konsider li pour

bann proze parey letan zot fer bann analiz pou regarde vremen bann dimoun ki pa kapab *afford* pou antre anba okenn *Scheme loan*. Me parkont si Gouvernman i konstrir e i pare pou li peye, parey zot *rent* bann lakaz Gouvernman ziske ler sa dimoun i aste. Sa i enn.

Ansanm osi dan sa revizyon nou pe koz lo revizyon, lo *part rental* ki mon konnen sa i tonm anba sa *Scheme ASP*, ki zot osi zot analiz en bon pe bann dimoun ki reste dan mon parey dan mon distrik.

Ki pe *rent* an deor, akoz i napa landrwa pou reste e baze ek sa kou lavi ozordi, ki dan sa bann revizyon zot vwar en pti pe sa kantite sipor ki zot donn sa bann dimoun pou zot kapab *rent*. Mersi.

MR SPEAKER

Mersi. Mon pa sir si i annan en keston ladan Minis. Eski i annan keksoz ou kapab adrese? Vitman silvouple.

MINISTER **BILLY RANGASAMY**

Mersi Mr Speaker. Mersi Onorab. Mon krwar i plito bann kontribisyon, bann obzervasyon.

MR SPEAKER

Wi.

MINISTER **BILLY RANGASAMY**

Bann sizesyon pou bouz devan. Pou sir mon'n pran tou an kont, mon lekip la osi in pran. Lo *part rental* osi nou ava pran tou sa bann eleman an konsiderasyon. Me parkont, mon bezwen fer resorti mon a profit sa lokazyon pou resorti. Ki bann dimoun ki mannyer nouvo Polisi i ete, nouvo striktir bann dimoun ki kalifye ki kalifye pou *part rental* i bann dimoun ki bezwen dan lanplwa. Enn. E ki zot annan en enplikasyon kot *Housing* e osi pe kontribye aktivman zot *HSS*.

Sa i montre ki zot annan en lanvi, en *commitment* pa zis deside al lwe epi met sa presyon lo Gouvernman. Sa en pti pe, mon'n profit sa lokazyon pou partaz sa pti pwen enn pti pe. I annan bann lezot eleman, me sa i bann kriter kle. Mersi Onorab.

MR SPEAKER

Mersi Minis Onorab Woodcock.

HON WAVEL WOODCOCK

Mersi Mr Speaker. Minis dan 6mwan lopoziyon pe ekspekte ou fer sa ki zot, zot pa'n kapab fer dan plis ki 43an, kan nou pa ti dan en sityasyon kriz ekonomik ek lasante.

Mon kestyon i kot i konsern de diferan program ki dan Bidze. I annan *Social Programmes of Government* avek *Benefits of Approved Program of ASP*. Si ou pou gete i annan plizyer bann diferan lasistans ki tous en pti pe lo sa zafer lozman, pou bann ki vilnerab.

Anba *Social Program of Government* nou annan *Housing Finance Scheme, Home Improvement Re-Roofing Scheme for pensioners*, anba *Benefits of Approved Program of ASP* nou annan *Emergency Housing Assistance Scheme*, nou annan *Vulnerable Home Repair Scheme*.

Mon problem se ki i annan tro bokou diferan kategori kan petet mon pa konnen si dan sa Polisi ki zot pe vin avek zot pou, zot pou annan en fason kekfwa en antite. Akoz tou sa bann lasistans i ganny divize parmi diferan Minister, en bout i kot finans lot i kot *ASP* lot i kot Gouvernman Lokal, en pe i kot Departman Lakaz ek Lagrikiltir ek Lenfrastriktir.

Petet Minis, eski dan sa Polisi ki zot pe revize, zot pou annan en antite ouswa en landrwa spesifik ki pou adres tou sa bann size, kot i konsern lasistans pou sa bann dimoun ki bezwen led avek bann zafer

lakaz?

Minis mon bezwen fer sorti lo sa size osi, se ki in annan bokou bat latet lo kote sa bann lasistans. *Case in point*, permet mwan Mr Speaker - dan distrik la, dan mon distrik ki mon prezimen dan lezot distrik, mon annan 11 a 12 dimoun ki nou'n fer, nou met bann ka devan.

Mwan mon menm mwan personnelman mon'n met bann ka devan kot biro distrik i sa *focal point*, sa *central point* ki apre pou kordin avek lezot Minister.

Me ou pa pe vwar *file* bann dimoun. I zis kantmenm ou met devan ou'n vwar poudir i annan en problem pandan letan eleksyon i annan bann *campaign* ki'n ganny deroule kot bokou dimoun zot latet in ganny bate, in ganny dir zot pou ganny asiste, zot pou ganny asiste.

11,12 dimoun mwan mon annan 11,12 ka Mr Speaker napa en sou *file*, napa en sou nanryen ki'n ganny anvoye, ki'n ganny met devan, zis ti pe ganny servi pou bat latet dimoun, pou fer krwar poudir sa bann dimoun pou ganny lasistans.

Alor eski nou kapab annan sa landrwa spesifik ki *deal* avek tou sa bann size ki

nou pa pou vwar sa bann keksoz? Mersi Mr Speaker.

MR SPEAKER

Onorab Woodcock nou kapab *move-on*. Poz en kestyon si ou annan? Ale. Mersi Onorab Pillay pou ou led. Nou a pas lo Onorab Lemiel.

HON SYLVANNE LEMIEL

Pa ankor reponn.

MR SPEAKER

Sorry Minis. Mon pe bliye. Minis ou ava adres kestyon Onorab Pillay, Onorab Woodcock.

MINISTER **BILLY RANGASAMY**

Mersi Mr Speaker. Mersi Onorab Woodcock. *PS* Choppy i familye byen ek tou sa bann diferan *Schemes*, alors ek ou permisyon Mr Speaker mon a demann li pou elabor en pti pe lo la silvouple.

MR SPEAKER

Wi. Korek. *PS* Choppy

PS YVES CHOPPY

Mersi. Onorab in fer sorti bann diferan landrwa kot dimoun i kapab ale pou rod lasistans. An partikilye in mansyonn bann *loan products* ki annan avek *HFC*.

E apre in mansyonn bann,

bann lasistans ki vin atraver Bidze Gouvernman, atraver bann proze. Otan posib si annan servis ki kapab pas atraver Lazans Gouvernman parey *HFC* pou donn bann *loan*. Ki i pa vin presyon lo Bidze, i pou petet dezirab pou kontinyen annan sa bann mekanizm, ki separe avek Bidze, akoz Bidze nou tou nou konnen nou annan nou kontrent, nou *ceiling* ki nou kapab depanse anba la.

Donk bann program *HFC* mon prevwar ki zot pou kontinyen pou kapab ed Gouvernman annan plizyer fason, kot i asiste bann dimoun ki annan bezwen.

E byensir son pwen lo bann annan en sel fason kot dimoun i kapab *apply*, e zot bann priyorite i ganny zere, avek sa nouvo Polisi ek bann nouvo mekanizm ki Minis in koz lo la, sa i ava permet sa bann, sa bann keksoz ganny pran an konsiderasyon ler sa bann nouvo mekanizm i ganny etabli.

E osi zis pou mwan pran loportinite petet fer en pti komanter lo akoz petet sa program *Venerable Repair Scheme*, i pe ganny transfer avek departman ek nou Minister.

Povrete ek vilnerabilite i

annan diferan dimansyon. Be selman spesifikman anba sa *Scheme*, nou vwar ki annan sa laspe konstriksyon apre i annan sa laspe *housing*.

So se pou sa rezonn ki ,ki i annan sa panse ki si sa *Scheme* i vin anba nou Minister nou, nou annan plis sa lekspertiz dan konstriksyon e ki dan sa Sekter *Housing*, i a petet pli byen pou kapab zer sa program. Mersi.

MR SPEAKER

Mersi *PS*. Onorab Lemiel e Onorab Michel Roucou, ou *next in line* so letan Minis pe reponn met ou pare. Onorab Lemiel.

HON SYLVANNE LEMIEL

Mersi Mr Speaker. Bonn apre midi Minis ek ou delegasyon. Mon pou profite koman mon annan laparol, pou mwan dir mersi o non zabitan Anse Royale ki'n benefisye anba sa *Scheme*.

Mon'n annan *quite a number of* dimoun ki ti bezwen sa lasistans e mwan mon dir mersi lo zot par. Akoz ozordi Mr Speaker e Minis nou vwar sourir lo figir serten zanfan ki zot ti pe viv dan en sityasyon ki ti ase deplorab.

E atraver sa bann *Scheme* kot zot lakaz in ganny repare, zot lakaz i annan ki'n ganny

refer, menm si en *bedsitter* ou en dimoun tousel. Mwan mon dir mersi lo zot par. Parkont Mr Speaker mon kestyon ...

MR SPEAKER

Onorab, wi.

HON SYLVANNE LEMIEL

... i se ki ozordi menm si *Minister* nou pe dir ki bann *files* in ganny anmennen, pe ganny *compile*. Par kont i annan sityasyon ki'n vin dan mon latansyon sanmenm sa semenn, semenn pase. I paret mwan ki annan de *case*, mon le met sa a zot latansyon zis pou zot pa *miss out* personn.

I annan kontrakter ki'n antre lo *site* in demolir lakaz dimoun in fini met ater, sa dimoun in ganny dir *ok* reste ek ou zanfan pou en pe letan, *three months* nou pe fini, *ok?*

Kontrakter in kit *site* in ale, *case* pa'n zanmen ganny raporte ni kot Gouvernman Lokal, Gouvernman Lokal pa okouran travay in komanse. Gouvernman Lokal pa okouran, kontrakter in kit *site*.

So mon le met sa bann ka koumsa devan zot osi pou zot *miss out* personn! Erezman sa ka nou'n ganny met devan mon panse ki i ava tonm dan enn parmi sa 61 ka e *or la* i ava vin 62.

Me zis mon le port a zot latansyon Mr Speaker mon konpran ou, me selman i sityasyon nou bezwen met devan. Mon le met sa devan Minis pou nou fer sir *we don't miss out anybody!*

E petet mon pa konnen ki lapel petet Minis ou pou pran la. Kekfwa si i annan dimoun akoz zot pa konnen. Sa madanm zis li i *call* mwan i dir be kontrakter in ale lo mon *site*, prezan ou *call* partou.

So ki lapel, swa Gouvernman Lokal ansanm ek ou Minister, zot fer ek bann dimoun ki pa pou konnen kekfwa kot i pou ale ki pa pe *call* en dimoun Lotorite Distrik pou fer konnen poudir, i annan sa problem? Mersi.

MR SPEAKER

Mersi Onorab, mon krwar ou'n fer ou pwen. Onorab Roucou.

HON SEBASTIEN PILLAY

(Off-Mic)

MR SPEAKER

Minis. Onorab Pillay ou a gard en pe lord. Byen! Onorab Pillay mon a demann ou en pe respe silvouple. Eskiz mwan, mon'n vreman sot en pe vit. Minis si ou annan komanter.

HON SEBASTIEN PILLAY

(Off-Mic)

MR SPEAKER

Onorab Lemiel pa'n vreman poz okenn kestyon li. Selman, napa kestyon li. Selman Minis ou kapab zis dir si ou annan en komanter.

HON SEBASTIEN PILLAY

(Off-Mic)

MR SPEAKER

Ale! Minis ou annan en komanter? Onorab Pillay mon pe demann ou arete avek sa ton! Mon pe demann ou arete avek sa ton silvouple. Ou bezwen respe Speaker e arete silvouple. Arete!

(Interruption)

MR SPEAKER

Minis ou adres remark Onorab Lemiel silvouple, si ou annan?

MINISTER

BILLY

RANGASAMY

Mersi Mr Speaker. Mersi Onorab Lemiel, me Onorab Lemiel i tou mon vreman kontan ou'n alert mwan lo sa sityasyon e mon pou lans en lapel ek tou mon bann koleg, tou ou bann koleg zot nou bann per lizye lo bann santye lo zot distrik e bokou zot pe fer sa

deza.

Silvouple atraver *DA* osi si i posibil. Les mwan ganny sa bann non sa bann dimoun e mon a fer mon mye posibil pou nou met en lord ek sa zafer. Akoz sa bann dimoun ki ou'n dir mwan zot bezwen tonm anba kategori ki nou'n klasifye as kategori nimero 1.

In other words, kontrakter in fini antre lo *site*, nou pa pou kapab les sa bann dimoun dan lenzirditan nou napa okenn konesans ki pe arive ek sa bann proze. Sa nou bezwen met en lord, *no, no question about it!* So se ed nou zot tou, si zot konnen sa i annan dan zot distrik.

Yer mon ti annan en *site* vizit avek Onorab Esparon i ti alert mwan detrwa ka. Ed mwan Onorab Lemiel zot tou zot annan mon bann kontak. Les nou ganny sa, menm atraver biro distrik les nou ganny sa lenformasyon nou a met en lord nou ava regle sa sityasyon. Mersi bokou en.

MR SPEAKER

Mersi Minis. Onorab Roucou.

HON MICHEL ROUCOU

Mersi Mr Chair. Bonn apre midi a tous. Minis en pti pe lo sa laliny ki ou'n tous lo la. I annan bann, bann dimoun dan diferan distrik ki'n ganny

plizyer vizit menm bann komikman ki ozordi zot, zot pa konnen kote zot *stand*, en pti pe bann dimoun koumsa.

Eski ou Minister pou rebran kontak? Pour vi ki la prezan laplipar sa bann *case* in ganny transfer kot ou. Eski ou Minister pou rebran kontak ek sa bann dimoun ki pou zot konnen si zot *case* i vremen pou tonm ladan?

I menm i annan dimoun ki'n siny serten Lagreman, oparavan pou zot lakour i pas dan sa devlopman. E en pti pe mon dezyenm pwen i eski ou Minister i konnen par distrik lekel bann distrik, konbyen *case* ki annan par distrik silvouple? Mersi.

MR SPEAKER

Mersi Minis.

MINISTER **BILLY RANGASAMY**

Wi, Onorab. Mersi Mr Speaker Onorab Roucou bon, bon kestyon. Mon pou demann *PS* Choppy pou ed mwan ek sa. Akoz i annan tou sa bann statistik par distrik. E i ava en bon depar epi mon ava vwar si i annan keksoz siplemanter pou mwan azoute.

MR SPEAKER

Mersi *PS*.

PS YVES CHOPPY

Wi. Mr Speaker nou annan, nou konnen bann *case* ki ti'n vin kot nou Minister, ler la mon pe dir kot Departman Lenfrastriktir. Nou annan lalis bann, bann *case* par distrik konmsi konbyen.

So nou kapab fer ou ganny sa, sa lalis. Mon pa konnen, mon pa pou pas dan lalis antye. Me selman petet pou nou ganny bann ki kot Gouvernman Lokal, akoz parey mon'n, refer sorti oparavan pa tou *case* ki ti'n deza transfer avek nou Minister.

So i annan sa resansman parey Minis ti dir ki pe ganny fer e se apre sa ki nou a kapab konn tou bann larestan *case* ki bann ki ti kot Gouvernman Lokal osi. Mersi.

MR SPEAKER

Mersi. Minis ou bezwen azoute. Ou satisfè?

MINISTER BILLY RANGASAMY

Mr Speaker mon satisfè, wi. Mersi bokou.

MR SPEAKER

Tre byen. Mersi. *Ok* nou pou pas lo lot kestyon. E la mon bezwen remersye *PS Barbe* e *PS Choppy* pou zot partisipasyon

akoz mon krwar i annan de lezot zofisye ki pou pran zot plas. Donk mon a dir zot mersi. Mon a retenir Minis e bonn apre midi.

(PS BARBE AND PS CHOPPY WERE EXCUSED FROM THE HOUSE)**MR SPEAKER**

Madam Clerk, nou kapab fer *sanitize* bann latab *sur place* la silvouple? Koumsa nou a kapab pas direktman lo lot kestyon. Nou kapab, pare? Silvouple?

Eskize, mon krwar nou pa ti'n prevwar *Sergeant-at-Arms* pour sa. Mersi madam. Bonn bonn apre midi Mr Gerard Hoareau *Technical Advisor* e Madam Angela Servina *CEO Planning Authority*. Nou prezan pas lo kestyon swivan e sa se Onorab Churchill Gill.

HON CHURCHILL GILL

Mersi Mr Speaker. Bonn apre midi Minis ek ou *panel*. Bonn apre midi tou Manm e tou dimoun ki pe ekout nou.

Donnen sa bann devlopman dan Sekter Tourizm. Eski Minis i kapab enform sa Lasanble: -

1) Konbyen proze lotel touristik ki'n ganny aprouve me

pa ankor devlope, enkli Zil Elwanye?

2) Konbyen ki dan *pipeline* pa ankor ganny aprouve?

3) Kote sa bann devlopman pou ganny fer, e lekel sa bann developer? Mersi.

MR SPEAKER

Mersi Onorab Gill. Minis.

MINISTER BILLY RANGASAMY

Mersi bokou Mr Speaker. Mersi Onorab Gill pou ou kestyon. En kestyon vreman enportan. Mr Speaker, mon pou reponn ou premye parti kestyon Onorab. Lo sa kestyon lo bann devlopman lotel, ki pou ganny fer atraver pei lo nou bann zil tel ki Mahé, Praslin e Zil Elwanye.

Lanpler sa kestyon i enn ki gran, vi lakantite laplikasyon ki relye ek Sekter Tourizm ki Lotorite Plan i resevwar. Kategori letablisman dan sa sekter i varye depi bann pti *self-catering* ziska bann gran proze. Dan kad gran lotel, sa i bann proze 24 lasanm an montan.

Alors Mr Speaker, an vi ki lakantite aplikasyon ki nou resevwar, petet i a pran mwan apre midi antye pou eksplike. Mon pou *focus*, mon pou pran plis latansyon lo bann, pou reponn ou kestyon Onorab - lo bann gran lotel. 24 lasanm

eskize mwan an plis. Mon krwar sa ki petet ou pe, ou pe vin lo la en? Mersi.

Alors mon a reponn ou kestyon direk. Bann nouvo proze lotel ki'n ganny aprouve ziska ozordi le 25 Me 2021 i 12 e konstriksyon pa ankor komanse. 12.

Bann proze lotel ki dan *pipeline* i annan 22. So, an tou i annan 24 proze touristik lo baz gran lotel ki nou pe, ki devan nou prezantman. I bon pou note ki bann proze ki dan *pipeline* i bann ki'n pas oubyen pe pas atraver bann prosedir ki an plas prezantman avan soumisyon kot Lotorite Plan.

Serten sa bann, lezot Minister e departman konsernen se par egzanp Minister Tourizm, *Board* Lenvestisman Sesel *SIB* e Minister Lanvironnman. E zot osi zot annan zot prop prosedir pou analiz sa bann proze ki dan *pipeline*.

Alors zis mon le kalifye mon larepons parske la mazorite lenformasyon lo sa bann proze lotel ki dan *pipeline*, sa 22 proze ki mon'n mansyonnen i, i pou'n ganny partaz avek mon Minister, me i sorti kot sa bann antite e mon'n pran zot detay pou mwan kapab reponn ou kestyon ozordi.

So mon'n tous lo, lo bann lo laspe konbyen. Prezan pour dezyenm parti ou kestyon. Kote bann devlopman pe ganny fer? Lekel bann devloper?

Mr Speaker bann devloper i varye. I annan Seselwa, i annan Seselwa natiralize, i annan etranze, i annan bann, bann *partnership* osi. So i melanze.

Me permet mwan pou profit sa lokazyon e fer resorti ki Lalwa ki govern Lotorite Plan ki tonm anba mon Minister, mon portfolyo sa Lalwa, i *Town and Country Planning Act* par met lenportans, mon repete pa met gran lenportans lo devloper ki soumet proze, me i plito avek sa devlopman lo sa sit, lo sa *parcel number*, dan sa kominote, kot sa proze pe ganny propoze.

Alors son bann lenpak ki i annan lo laspe lanvironnman, lo son laspe *land use plan*, lenfrastruktir, transpor, litilite delo, drenaz tousala, lakominote ki pou benefisyé i plis get li lo sa bann laspe teknik.

Me parkont sa bann Minister ki mon'n mansyonnen sa bann lezot antite tel ki lenvestisman, *Board* Lenvestisman Sesel, Minis Tourizm zot, zot al en pe plis an

detay lo bann devloper li menm. Ok?

Bann proze aprouve par Lotorite Plan e bann ki dan *pipeline* i *comme* swivan: La monpanse zot tou zot enterese be ki pe pase dan mon distrik. So mon a zis fer en pti lalis vitman, vitman pou eksplik zot kwa ki dan sak distrik, dan sa 34 proze ki mon'n mansyonnen.

Dan distrik Anse aux Pins i annan enn, dan distrik Anse Boileau i annan 2. Anse Etoile i annan 1, Au Cap i annan 2, Baie Lazare i annan 2, Baie Ste Anne kot Onorab Churchill i annan 8, Bel Ombre i annan 2, Beau Vallon i annan 1, Fregate i annan 1, Glacis 3, Grand'Anse Mahé 1, Grand'Anse Praslin 3, Roche Caiman i annan 2. I tonm dan distrik Roche Caiman, mon ava eksplike si zot demann mwan pli tar kote sa de i ete, e Takamaka i annan 5. Bel Air napa.

So mersi, mersi bokou Onorab. E parkont i annan bann lezot detay mon kapab donn zot pli tar oubyen fer zot ganny sa lalis. Sa pa deranz mwan ditou. Mersi bokou Mr Speaker mon krwar mon'n reponn kestyon Onorab, spesifikman ase byen.

MR SPEAKER

Wi, wi Minis mon apresye ou sizesyon ki ou donn detay bann Manm ki rode apre. Akoz si nou pas dan tou sa lalis e sak Manm i le detay lo son distrik, nou pa pou fini. Onorab Gill, siplemanter. Wi.

HON CHURCHILL GILL

Mersi Minis pour ou bann larepons mon krwar tou distrik in byen *appraise* la prezan ki pe, ki pe arive. Me selman mon kestyon se Zil Elwanye pa'n ganny mansyonnen. Eski napa okenn devlopman ki pe al pran plas lo Zil Elwanye an term touristik?

E mon dezyenm. Eski apard ki bann ptipti lotel ki nou pa'n touse ki i byen pou rezon letan. Sa bann gran lotel ki pe ganny fer parey ou'n dir i annan Seselwa i annan natiralize, i annan etranze, eski i annan okenn *incentive* ki sa bann promoter pe gannyen?

Ki okenn form, ki nou devret konnen e akoz sa i pou enportan konnen akoz ou'n dir nou i annan 34 proze. E si i annan okenn *incentive*, si sa benefis pe ganny pase avek tou sa bann promoter oubyen serten promoter? E si wi ki rezon ki serten pe ganny serten benefis e serten non?

Apre mon dernyen siplemanter se. Si i annan lo Zil

Elwanye donner, an term labote nou bann zil. Eski bann kondisyon ki devloper i gannyen lo Mahé, Praslin ek La Digue i parey pour bann dimoun ki fer proze lo Zil Elwanye, donner sa nivo bote nou bann Zil Elwanye? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Mersi Mr Speaker. Onorab Churchill Gill mon pour, mon pour tous de pwen. Mon pou demann *CEO Planning Authority* pou osi elabor lo en lot pwen. Lo, sirtou dan sa eleman bann Zil Elwanye, ki mannyer nou Lotorite Plan nou analiz sa bann soumisyon.

Me parkont an vi ou kestyon, mon pa'n tous lo akoz ou'n demann lalis bann ki'n ganny aprouve me pa ankor devlope epi bann ki dan *pipeline* e apart ki Fregate i sel zil ki annan en proze dan *pipeline*. Bann lezot lo sa bann Zil Elwanye ki Onorab, *CEO Planning Authority* i a eksplik nou sa bann zot in fini demare konstriksyon in fini demare. Se sa mon pa'n *capture* li dan bann ki'n aprouve pa ankor komanse ou konpran mwan.

So sa mon'n reponn sa bout. *Incentives* sa i en konponan ki pa tous kot mon Minister, fransman verite i plito kot *Seychelles Investment Board*, kot Minis Devika Vidot ki, ki travay lo sa eleman.

E i annan bann osi bann *incentive* lanplwa ki tous en pe kot sosyal. E mon santi mwan mon pa pou kapab pronons lo sa pwen. Parske i an deor mon, mon portfolyo mon Minister.

Sa in tous en pe lo *incentive*, in tous en pti pe lo Zil Elwanye. Mon a les *CEO*.

MR SPEAKER

Wi *CEO*.

CEO ANGELA SERVINA

Bonn apre midi Onorab. Mersi pour ou kestyon. Si oule, ou permet mwan klarifye. *Planning Authority* letan i konsider bann devlopman nou pa get lokasyon, ki bor i ete. *Per se*, me plito nou pou get sa devlopman ki pe, propoze. Nou pou get sa devlopman ki son groser, ki son lanpler, ki i pe vin avek.

E baze lo son sit kot i ete, la ki nou pou kapab donn li bann kondisyon ki pou vin avek. I kapab ki i en devlopman ki i pe fer lo Mahé, i annan plis kondisyon ki enn ki lo en lo Zil Elwanye.

Sa i tou depan lo son sit devlopman kot i pe vini e ki kalite proze i pe, i pe vin avek. So en proze tourizm, lo en Zil Elwanye i pou diferan son kondisyon avek enn ki lo Mahé, or lo Praslin. I pou tou depan lo sa proze li menm ki i pe vin avek, ki bor i pou ete. *Ok*. Mersi.

MR SPEAKER

Minis wi.

MINISTER

BILLY

RANGASAMY

Mersi Mr Speaker. Mersi *CEO*. Mon le zis azout ankor en pti pwen parey mon ti'n fer resorti bann, bann *incentives*. Epi osi Minister Finans i annan en rol ki i zwe ladan, zis mon le zis azout sa an ladisyon avek *SIB* par egzanp ki mon ti'n mansyonnen boner en.

MR SPEAKER

Byen nou a kontinyen. Onorab Samynadin.

HON KELLY SAMYNADIN

Mersi Mr Speaker. Bonn apre midi Minis ou delegasyon e tou dimoun a lekout. Minis ou'n mansyonnen ki dan distrik Au Cap i annan 2 proze touristik. Me prenon kont ki *ex-Reef Hotel* i sitye lo en propriyete prive.

Eski Gouvernman pe mazin antre an negosyasyon

avek sa propriyeter, pou ki sa morso later ava retourn ankor pou Sesel? E en lenvestisman i ava ganny fer pou benefis zabitan Au Cap e Sesel.

Dezyenmman, mon ti a kontan konnen si i annan okenn lenvestiser Seselwa ki'n vin devan avek lentere pou aste e fer en devlopman touristik lo sa morso later? Mersi.

MR SPEAKER

Mersi Onorab. Minis.

MINISTER **BILLY**
RANGASAMY

Mersi Mr Speaker. Mersi Onorab. Onorab mon annan zis, permet mwan pou fer en pti koreksyon. Sa morso later i ankor en later Gouvernman i ganny *lease* oparavan avek en lot konpanyen e sa *lease* orizinal in ganny vann avek en trwazyenm konpanyen ou kapab dir en.

So be selman son *original lease*, son *lessee* i Gouvernman Sesel. E *SIB* in, in alert nou sa proze resaman. I pa en proze ki fek, ki'n fek demare. Parkont in demare depi o mwen lan pase. E en lenvestiser, en devloper ki'n, ki'n ki prezantman i annan sa *lease*. Sa *lessee*, sa *lessor sorry*.

In propoz en zoli proze pour sa landrwa e pour nou ki

konn *Reef Hotel* pou tou sa lannen, ki'n reste la dan en leta abandonnen, mon krwar i ankourazan pou vwar en proze pe vin devan pou kapab remet sa landrwa dan sa lanpler ki i ti ete 30an pase.

So sa lenvestiser i paret vremen, mannyer mon pe analize paret i annan en bon plan e a se moman nou pa pou al dan sa sityasyon mon krwar pei, Gouvernman pa pou dan en sityasyon pou al kas en laranzman *lease*.

I annan bann konplikasyon legal e vi ki i pe met devan en keksoz vremen pozitiv pou Au Cap, e an menm tan i ava annan bann lenpak lavantaz ki pou anmennen pou lanplwa, pou redevelop sa landrwa dan sa leta ki i ete.

Mon santi ki, Gouvernman i santi ki nou ava kontinyen ankouraz sa proze. Nou a met bann paramet pou li, pou li kapab al fer sa proze vin en realite, o pli vit posibil.

So an prenon kont osi, restriksyon finansyer ki nou annan nou pa kapab al anpaye dan en sityasyon legal. E pou pour nou epi nou menm nou, nou pa kapab devlop sa proze. Mon krwar stratezi se nou konpran poudir Gouvernman pa kapab antre dan bann proze

pou zot devlope, pou fer lotel par egzanp.

Sa nou les ek bann dimoun ki konn fer zot fer. Nou fasilite sa pou zot e si i en proze ki anmenn valer azoute sirtou pou pei nou ankouraze. Mersi.

MR SPEAKER

Mersi. Mersi Minis, ankor enn fwa mon pou limit bann entervenans pou en pwen, en kestyon silvouple. Onorab Adelaide. *Ah*, eskize mon'n bliye dir ou.

HON FRANCOIS ADELAIDE

Mersi Mr Speaker. Bonzour. Bonn apre midi Mr Speaker. Bonn apre midi Minis avek ou lekip. Mr Speaker permet mwan avan mon komanse, vi ki Minis in komans lo en bon not.

Pour mwan osi met a sa latansyon Lasanble. Ki yer dan Baie Lazare ariv en levennman vreman istorik ankor, kot en kliyan. Mon'n espere pou mwan demann lo sa size touris aköz in ariv en lensidan kot en touris ti pe noye e Baie Lazare nou'n annan en zonm ki'n azir brav avek kouraz e in kapab sov sa touris.

E i ozordi ero Baie Lazare

..

.

(APPLAUSE)

HON FRANCOIS ADELAIDE

E esperon ki lotorite konsernen i tande. E vreman i ava remerisi sa garson e donn li son meday.

Mr Speaker. Minis mwan mon kestyon pou ou se ki vi ki i annan sa bann lotel ki ou dir i dan *pipeline*, i pe al fer. E vi ki ou konnen poudir resaman nou annan bokou bann problem ki nou gannyen avek bann piblik *in regards* aköz akse lenformasyon, napa ase.

Eski ou Minister i pe deza komans met en program lo latab ki mannyer pou diskite avek sa bann, ek bann distrik, bann dimoun pou i ler sa bann proze i arive ki i pou napa retar e ki dimoun i konpran e zot osi zot partisipe pour ki proze i al ase byen?

E zis pou azoute Minis. Nou annan en lotel ki pe aktyelman pe ganny konstrir dan Anse la Mouche e ki mannyer Minister in al avek sa, sa bann lakonpanyen aköz vi ki ti annan aksidan, vit ankor ater. Later i ankor dan rigol, e i pe kree en lenkonvenyan pou distrik. Lapli pou tonbe, i pou inonde e sa lotel i ankor pe fer.

So mon ti a kontan ki ler zot pe fer sa bann lotel, i enportan ki zot travay avek sa bann investiser pou fer sir ki keksoz i ganny fer byen. Mersi.

MR SPEAKER

Mersi Onorab. Minis.

**MINISTER BILLY
RANGASAMY**

Wi mersi. Mersi Mr Speaker, mersi Onorab. Mon santi ki *CEO Planning Authority* i byen plase pou reponn sa bann kestyon. Mon ava azoute apre si annan pou azoute. Mersi.

MR SPEAKER

Mersi.

CEO ANGELA SERVINA

Bonn apre midi Onorab. Mersi pou ou kestyon. An sa ki konsern konsiltasyon avek piblik, pour tou bann proze lotel *above* 24 lasanm otomatikman i pou neselit en letid lenpak lanvironnman klas 1.

Savedir otomatikman la *as part of* sa prose, i pou bezwen annan konsiltasyon avek piblik. So depandan lo ki distrik ki sa proze i tonm ladan i pou bezwen annan en konsiltasyon avek distrik. Normalman i annan de, i annan, i tou depan.

So Departman Lanvironnman, Minister Lanvironnman i ava donn zot son, zot kriter depandan lo proze ki zot pe vin avek sit kot i pou ete. E li sa devloper i ava fer le neseler ansanm avek gidans

bann Gouvernman, bann Minister konsernen pou fer konsiltasyon avek piblik.

Ou dezyenm kestyon ki ou'n, mon pa tro konnen si en kestyon oubyen si en, zafer ki ou'n met la devan nou.

MR SPEAKER

En komanter, ou kapab fer en pti komanter.

CEO ANGELA SERVINA

En komanter wi. Mon krwar ou ti pe koz lo sa proze lotel Anse La Mouche non? Mon en pti pe sirprann letan ou'n dir i annan later dan rigol, *whatnot*. Akoz i annan en tim Gouvernman, ki pe fer *weekly* vizit tou le semenn lo sa sit.

In fact bomaten, zot fer li tou le Mardi bomaten. I konpri Minister Lanvironnman, *Planning Authority* ki *lead* sa de Lazans. *SLTA*, distrik menm enn ler i vin avek nou Minister Lasante, bann seksyon sanniter.

So *in fact* mwan personnelman mon, mon satisfè avek ki mannyer keksoz in ale.

Akoz i kanmenm nou'n ganny sa gro lapli mon krwar trwa semenn pase, nou'n vwar poudir lo sit Anse La Mouche napa, i pa'n kontribye dan nanryen negativman pour avek

sa dezas pou fer li vin pli, pli *worse* ki i ti ete.

So nou'n pran kont ou'n konsern an menm tan. Mon ava pas li *on* avek bann tim ki pe fer *monitoring*, tou le semenn nou fer. *Thank you.*

MR SPEAKER

Mersi. Minis ou ti a kontan azout en keksoz.

MINISTER
RANGASAMY

Mersi Mr Speaker. Wi, mon ti a kontan azout en pti keksoz Mr Speaker. Mwan menm mwan letan mon fini sa *meeting*. Mon pou pran li, mon responsabilite pou mont lo sit, Anse La Mouche pou mwan al vwar sa sityasyon.

Akoz mon pran sa vreman a ker e tou sa bann Onorab ki'n vwar in travay ek mwan. Mon en dimoun santye, *boots on the ground*, mon pou al regarde. Mon promet ou mon pou fer sa Onorab en!

E si mon vwar i annan defayans kot *CEO*. Mon pou *highlight* sa pou nou kapab ranforsi nou sipervizyon lo santye.

Dezyenm pwen, Onorab eskiz mwan, lo sa konsiltasyon piblik la, nou pa pou zis fer konsiltasyon apre fini lanmenm.

Mon pou fer sir ki mon Minister i pran sa bann komanter piblik e i annan en *check list* ki nou vwar ki mannyer sa bann komanter kot i aplikab i ganny enkorpoze.

So that's the way I want to work. Pa zis pran en lalis kit laba, nou bezwen fer sir mon pou ankouraz *CEO* donn li tou sa sipor ...

(APPLAUSE)

MINISTER
RANGASAMY

... pou nou kapab, pran komanter sa bann piblik e. Akfer ou fer konsiltasyon? Pa fer sans sansan. Mersi.

MR SPEAKER

Mersi Minis. Nou a kontinyen. Nou a kontinyen, Onorab Sophola.

HON NOLINE SOPHOLA

Mersi Mr Speaker. Mon apresye ki ou'n donn mwan laparol Mr Speaker. Mr Speaker. Mersi. Bonn apre midi Minis ek ou delegasyon e tou dimoun ki a lekout. Minis i vre ki nou bezwen devlopman touristik dan pei. Me i annan bokou problem ki asosye ler ki proze in fini ganny aprouve.

Zis pou mwan nonm enn de, par egzanp landrwa kot

proze pe fer souvandfwa i tonm dan landrwa rezidansyel. Ler in fini ganny aprouve apre la dimoun i komans konplent, tapaz zannimo, lanmizik.

Eski kapasite litilite delo, elektrisite i soutenab? Semen aktyel parey mon pe pran lo La Digue. Si i annan sa devlopman eski i pou kapab deservi sa bann devlopman byen?

Minis donn nou en leksplikasyon ki ou Minister pe anmennen nouvo, pour redwir sa bann problemn? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Mersi Mr Speaker. Mersi Onorab pou ou kestyon. Mon osi mon kontan vwar ou dan Lasanble e felisitasyon. Mon a les *CEO Planning Authority handle* sa kestyon si mon annan en pti bout pou azoute, mon a fer li. Mersi.

MR SPEAKER

Mersi *CEO*.

CEO ANGELA SERVINA

Bonn apre midi Onorab. Mersi pou, ou bann pwen konsern ki ou'n fer pase. Pour met dan ou latansyon reasir ou petet. Tou bann proze, la an se moman

nou *focus* i lo bann proze, bann gran proze *above* par lao 24 lasanm pou touris.

Me selman mon krwar ou kestyon ou, *or* ou konsern i pe plito baz lo bann proze swa *guest house, self-catering* ki i pa pou tonm dan kategori gran lotel. Mon anvi met dan ou latansyon, latansyon Lasanble poudir *Planning Authority* i annan son bann kriter ki i servi letan ki i pe ziz devlopman, nenport ki devlopman.

Devlopman tourizm i pa en lenspeksyon. I pou sa rezon ki ou vwar letan en dimoun i vin avek en propozisyon pou en devlopman touristik, nou poudir, trwa kar ditan nou *advise* zot pou nou, pour tyeke avek nou avan, vin rod en *pre-planning advice*. Pou gete si pou *ok* pou zot *proceed* avan ler zot *submit* zot plan depans larzan.

E, en bon pe fwa nou poudir zot non i pa posib. Pou le senp rezon ki dapre bann klasifikasyon Litolizasyon Later bann proze pou tonm dan bann landrwa kot nou apel *high density residential*. Savedir bann landrwa kot rezidans i konsantre e ki otomatikman nou pou vwar pou annan problemn, apre letan in fini komans *operate*.

So sa i enn. Me, souvandfwa osi nou vwar ki

menm isi avek zot menm zot bann Manm Lasanble zot *lobby* en kantite lo lapar sa bann dimoun. Ki finalman ou vwar zot ganny zot proze i aprouve, apre letan i komans, i operasyonnel, konplent i antre pou al kot Biro Tourizm kot Minister Lanvironnman.

“Akoz ou ti aprouv li la.”

“Mon touris i ganny *disturb* dan bomaten.”

“I bezwen fer son parti Premyer Konminyon.”

“Lisyen i zap for.”

You name it. En kantite zafer ki vini.

So letan nou pa, letan ki *Planning* i refiz en aplikasyon i dir ou non ou pa kapab fer. I pa zis a la lezer aköz konmsi nou anvi dir ou, swa i annan en kantite dimoun i kontan servi sa term viktimizasyon. I pa li ditou.

I annan bann rezon baze lo leksperyans ki nou, nou'n pas atraver, ki fer nou dir ou non aköz nou, nou prevwar nou vwar ki pou arive nou.

Be selman i annan dimoun ki ensiste, i annan i ganny son *refusal* i al fer son *appeal*, apre i gannyen osi, tousala. Me selman lefet i reste ki *at the end of the day* se Gouvernman apre ki ganny sa ta konplent. I retourn kot nou menm.

So mwan ki mon pou *advice* zot lo zot kote, ed nou zot osi. Letan ki nou dir zot bann dimoun non zot pa pou kapab, pa bezwen ankouraz li pou vin *lobby* pli lwen, aköz apre sa problem i vin pou nou tou. *Ok.* Mersi.

Apre pou ou dezyenm kestyon. An sa ki konsern lenfrastruktir. Lenfrastruktir, mon krwar ou'n mansyonn semen, lot, lot. *In fact*, bann keksoz koumsa, nou, nou pran kont letan nou pe ziz bann laplikasyon lo son merit.

Nou bezwen gete. I annan, konmela nou pe vwar en *trend or* en lanmod kot nou vwar bann devloper bann dimoun pe vann zot later avek bann devloper dan bann landrwa rezidansyel. Bann *residential estate* ki'n ganny fer.

Kot apre ou vwar bann gro manman proze i ganny *submit*. Gro proze, i pa zis *tourism*, i pa zis touristik, me ou vwar bann proze flat, bann gro manman zafer ki vini.

So nou, nou poudir li nou. Ou pa pou kapab fer sa la aköz sa semen ki la son fasilite i pou ti ganny fer pou sa bann dimoun ki reste la. Si ou pe anmenn plis trafik, ou pe anmenn plis roulman la, ou pou bezwen donn en kontribisyon *enlarge* sa semen, al rod

wayleave.

Met en *STP*, akoz tousala i pou annan lefe lo later letan son, ou delo sal pe al partou. So sa i en pe nou bann, i nou bann konsiderasyon ki nou pran. Me osi an menm tan nou bann difikilte ki nou gannyen. Akoz i annan en kantite devloper ki reziste, en kantite. Me nou osi nou met nou lipye ater. Mersi.

MR SPEAKER

Mersi. Wi Minis, al vitman silvouple.

MINISTER

BILLY

RANGASAMY

Mersi Mr Speaker. Mon siport *CEO Planning Authority* enfiniman lo son stratezi ki mannyer i pe, travay, atraver en serten paramet. Zis mon le fer resorti ki ou'n demann mwan kwa ki nou pou fer de nouvo.

Enn ki nou pou vreman met lanfaz lo la ki mon'n koz avek *Planning Authority* osi lo la. Se fer sir, mon krwar *CEO* in tous lo la, ki sa bann investiser, sa bann devloper la i donn en keksoz pou sa kominote.

I ranforsi sa lenfrastruktir parey nou'n koze, e si i annan zot eleman i osi, i pa zis vini ganny sa zoli bout later i fer son proze.

Me i osi donn *something back* dan kominote. Sa nou pou met, konmsi sa nou pou fer li byen boner letan lo sa bann staz negosyasyon sirtou. Bann kondisyon zot aprouvasyon.

E pou mwan, mon anvi profit sa lokazyon zis tous en pti pe lo La Digue. Zeneralman nou santi ki La Digue mannyer in, in devlop ek en lavites enorm in perdi en pti pe son *charm*, e son kapasite pou li *handle* sa nivo touris, ki pou donn en bon kalite prodwi i limite prezan.

So enn bann keksoz ki nou pe regard ladan, ou nou pou reponn ou kestyon lo bann nouvo keksoz, se vwar lo La Digue eski nou pou kontinyen donn aprouvasyon bann aplikasyon? Oubyen nou pou met en *stop* e met lanfaz lo kalite prodwi *rather than* kantite prodwi?

Akoz sa zoli zil La Digue ki ou sorti Onorab Sophola ek tou son zabitan, i bezwen ganny sa balans osi akoz son pti lafyerte, son pti *charm* ki La Digue i annan, mon santi pe ganny afekte.

E sa bokou koleg Minis ki mon'n partaz mon pwennvi avek i partaz sa osi. So enn pti pe, en lot keksoz ki nou pe regard ladan, spesifikman pour La Digue. Mersi bokou Mr Speaker.

MR SPEAKER

Mersi. Zot a remarke nou'n depas 3er edmi. Be mon annan ankor detrwa Manm la mon a kontinyen. Me selman, rezilta se probableman nou sesyon answit pou ganny rakoursi. Onorab Henrie.

HON GERVAIS HENRIE

Mersi Mr Speaker. Bonn apre midi ankor enn fwa tou dimoun. Mr Speaker, anvi ki Minis in dir nou ki Baie Ste Anne i annan 8 proze. Mon ti ava kontan i konfirm ek Lasanble si lo sa kare later PR5446, ki mezir en grander 4240 met kare e ki ti ganny *subdivide* sorti dan kare later PR4736 le 15 Zen 2010 e ki en *lease* lo la ti ganny sinyen avek en Manm Lasanble le 8 Out 2017.

Me ki mon pa'n tann okenn lentere, deklarasyon lentere lo sa kestyon. So mon ti ava kontan konnen si i konfirman ki i annan en proze lo sa *plot* later PR5446? Mersi.

MR SPEAKER

Mersi Onorab. Minis ou annan larepons pou sa kestyon?

**MINISTER
RANGASAMY****BILLY**

Wi, wi, mersi Mr Speaker. Mon annan larepons direk pour sa, lo kot i konsern lotel. Napa en aplikasyon lo PR5446 ki lo mon lalis ki devan mwan, napa. Mersi Onorab.

MR SPEAKER

Ok. Mersi. Nou a kontinyen. Onorab Cosgrow.

HON WALLACE COSGROW

Mersi Mr Speaker. Mr Speaker mon ti a kontan demann Minis, ler in eksplik nou bann diferan devlopman, mon pe prezimen in eksplik nou bann devlopman ki'n ganny aprouve par *Planning Authority*.

So eski Minis i kapab fer nou Lasanble ganny en kopi, lalis tou bann devlopman enkli Zil Elwanye ki'n ganny aprouve?

E osi lo sa lalis, si i annan okenn *approved development* ki'n ganny petet retire e la mon pe fer petet referans avek en, en topik ki ti so dan sizyenm Lasanble lo en, kare later Cote D'Or Praslin. Ki detrwa Minister sa letan ti bezwen al fer rapor pou kapab vin reponn Lasanble. So si sa i ankor *stand*, ouswa si i pe kontinyen? Mersi.

MR SPEAKER

Mersi. Minis?

MINISTER **BILLY**
RANGASAMY

Wi mersi Mr Speaker. Mersi Onorab Cosgrow. *CEO Planning Authority* ava ed mwan ek sa larepons sa kestyon.

MR SPEAKER

CEO wi?

CEO ANGELA SERVINA

Bonn apre midi Onorab. Mersi pou ou kestyon. Sa devlopman ki ou pe koz lo la mon krwar i *La Praslin Guest House*. I pa dan sa lalis ki la, akoz i pa ganny konsidere koman en gran lotel, i en *guest house* 16 lasanm.

E wi son *approval* i ankor *stand* ki i ti gannyen an 2020.

MR SPEAKER

Lo size lalis ki'n demann ou.

CEO ANGELA SERVINA

Wi, wi, wi.

MR SPEAKER

Swa ou a kapab anvoy li pli tar petet.

CEO ANGELA SERVINA

Non Mr Speaker si ou permet mwan klarifye. Onorab fodre ou spesifik letan ou pe dir lalis akoz letan, dan konteks *Planning Authority* letan nou pe

koz proze ki'n aprouve i pou tou proze depi 2016 ziska ozordi 2021.

Akoz i *within* sa peryod 5an, nou *approval* i *last* pou 5an. So ou bezwen dir mwan ki kalite proze. Eski ou pe koz *large hotels* ou pe koz *guest house, self-catering* or ou pe koz tou keksoz ki annan? Akoz si ou pe koz tou keksoz nou pe koz en lalis over 1500. Ale.

MR SPEAKER

Onorab Cosgrow. Mon krwar ou devret anvoy ou kestyon an ekrire. Si ou le en repons spesifik lo la. Ale klarifye vitman wi.

HON WALLACE COSGROW

Wi ler mon pe dir lalis. Mon pe dir lalis an referans avek sa Kestyon ki devan Lasanble ozordi. Pa tou keksoz me sa bann gran lotel enkli lo Zil Elwane. Mersi.

MR SPEAKER

Petet ou a kapab anvoy sa lalis madanm *CEO*.

CEO ANGELA SERVINA

Wi nou ava fer ou gannyen. I *ok*. Nou a fer zot tou gannyen.

MR SPEAKER

Mersi Onorab Woodcock.

HON WAVEL WOODCOCK

Mersi Mr Speaker. Minis ti annan en *moratorium* lo bann gran lotel, bann lotel 25 lasanm ou plis ki ti ganny mete anfe le 29 Zen an 2015 par sa letan Prezidan Michel. Apre ler Prezidan Faure in vini in kontinyen avek sa *moratorium*, *in fact* in *extend* li pou ziska lafen 2020.

Mon kekyon i eski Gouvernman di zour pou kontinyen *maintain* sa *moratorium*, ouswa zot pou *allow* bann nouvo lenvestiser devloper pou konmsi zot pou donn permisyon lezot lenvestiser pou fer bann gro lotel par lao 25 lasanm? Oubyen zot pou *maintain* sa *moratorium*? Mersi.

MR SPEAKER

Mersi Onorab. Minis ou'n pare?

MINISTER **BILLY**
RANGASAMY

Ankor enn fwa lo sa size Mr Speaker, mon a demann *CEO* pou ed nou ek larepons sa kekyon.

MR SPEAKER

Tre byen *CEO*.

CEO ANGELA SERVINA

Mersi Onorab pou ou kekyon. Letan nou pe koz *moratorium* kouraman nou annan 2

moratorium dan pei en. Nou annan enn La Digue ki restrikte devloper avek 5 lasanm. Apre nou annan enn ki pou pei an zeneral, kot nou Gouvernman oparavan i ti'n ganny mete, i pa ti pe les plis ki 24 lasanm.

Ki mon kapab dir ou lo la, mon pa dan Minister Tourism, mon pa dan *Cabinet*, mon pa konn bann deryer desizyon. Me selman mwan, lo en pwennvi *Planing*, sa ki mon pou kapab dir ou se ki devlopman in arive. I pe arive dan pei, me nou bann lenfrastriktir i ankor lwen laba deryer.

Savedir i pa ankor, lenfrastriktir pa ankor *catch up* avek devlopman li. Devlopman pe arive li. Letan mon pe dir ou lenfrastriktir nou pe koz lo semen, *sewage*, *you name it* tou sa ki vin avek pou kapab fer en devlopman varyab, fer li soutenab.

So mon ava les sa la pou zot fer zot nide lo la. Akoz ki Gouvernman pou retir sa *moratorium* si sa bann lezot lenfrastriktir pa ankor arive? Ki lenpak ki pou annan?

Mon kapab dir ou ki Minister Touris pe fer, i pe travay lo en *carrying capacity study* pou pei *in regards to* kantite devlopman touristik ki annan. E mon pa asire si in

finalize, me mon konnen zot ti dan prosedir pou fer sa letid.

Mon krwar i bon ki nou esper rezilta sa letid apre nou ava dan en pli bon pozisyon pou nou kapab donn en larepons lo ou kestyon. Mersi.

MR SPEAKER

Mersi. Onorab Hoareau.

HON JOHN HOAREAU

Mersi Mr Speaker. Bonn apre midi Minis ek ou delegasyon. Minis mon ti ava konnen si ou annan sa lenformasyon a ou dispozisyon an se moman. Ki kantite *FDI* ki sa bann devlopman lotel par etranze i pe reprezante dan ou pei?

E ki kantite nouvo lasanm i pou azoute lo kota ki deza annan la? Mersi.

MR SPEAKER

Mersi. Minis lekel ki annan repons ou oubyen *CEO*?

MINISTER BILLY RANGASAMY

Mersi Mr Speaker. I en kestyon enportan Onorab. Selman prezant mwan personnelman mon napa sa lenformasyon a mon dispozisyon. Me nou kapab vwar avek Minister Tourism e *SIB* osi lo sa bann lalis ki nou'n endike lo sa 34 ki

nou'n koz lo la. Nou ava kapab ganny sa lenformasyon.

Mon krwar zot bezwen annan sa lenformasyon a zot dispozisyon. Me mon Minister parey mon ti fer resorti, nou plito get bann proze pou Lotorite Plan. I plis lo laspe teknik.

Selman nou ava kapab, mon pa war en rezondet. nou ava kapab konsilte nou lezot Minister e nou ava vwar ki mannyer nou kapab partaz sa lenformasyon lo laspe *FDI*.

MR SPEAKER

Mersi Minis. Onorab Georges.

HON BERNARD GEORGES

Mersi Mr Speaker. Mr Speaker, tre bref. Minis mon, en gran latristes pou vwar ki annefe napa okenn proze lotel pou mon distrik Les Mamelles. Ki parey nou tou nou konnen i pli zoli distrik isi Sesel.

Mon kestyon i lo bann lotel ki ti'n ganny abandonnen. Onorab Samynadin i koz lo *Reef Hotel*. Mwan mon kestyon i egzaktaman parey me i lo *Mahe Beach Hotel*. Ki la depi en pe letan. En *eyesore*. I ti en zoli lotel dan son tan.

Eski i annan en fason, eski i annan en plan pou re devlop li? E si non, eski zot annan okenn zouti pou fors son

owner devlop sa landrwa olye zis les li la koman en *eyesore*? Mersi Mr Speaker.

MR SPEAKER

Mersi. Minis? CEO?

MINISTER

BILLY

RANGASAMY

Mersi Mr Speaker. Mersi Onorab. Bon kestyon. Mon personnelman i trakas mwan sa bann devlopman. Parey ou konnen sa i en propriyete prive, nou limite koman Gouvernman pou fer gran keksoz. Me mon a les *Planning Authority* pou vwar from *Planning Authority* si i annan en *avenue* nou kapab pran.

Parske mon krwar i plis ki ler pou retire sa bann kosonnyen ki nou annan en pe partou. Me lo laspe nou bezwen fer en odit, pa dir en odit en pti *summary* kot zot ete zot tou. E vwar ki mannyer nou kapab bouz devan pou travay lo la. CEO.

MR SPEAKER

CEO ou annan.

CEO ANGELA SERVINA

Onorab mersi pou ou kestyon. Ki mon kapab dir ou lo nou kote *Planning Authority*, napa okenn proze lo sa sit *Mahe Beach* ki nou'n ganny konsilte lo la.

Menm kot *SIB* or *submit* kot nou, napa.

Me dapre Lalwa *Planning* aksyon ki nou kapab pran i pou tonm anba sa seksyon dan nou Lalwa ki pou vin *dilapidated buildings*. So nou bezwen fer en *structural assessment* pou son leta li menm. E si nou *assessment* i montre poudir wi i en danze i pe tonbe. La nou kapab ekrir devloper pou fer li kase. Mersi.

MR SPEAKER

Mersi. Onorab Mondon ou ti'n lev ou lanmen boner ou?

HON TERENCE MONDON

Wi Mr Speaker.

MR SPEAKER

Ok dan sa ka 30 segonn silvouple pou ou kestyon. Ou dernyen.

HON TERENCE MONDON

Mersi Mr Speaker pou ou konsiderasyon. Mon anvi demann Minis in nonm 5 lotel Takamaka. E an vi, mon pa anvi ki Takamaka i perdi son karakter, son *charm* parey Minis i dir. Ki mannyer *Planning* ler zot pe pran sa bann konsiderasyon zot pe balans sa devlopman avek lenpak sosyal?

Eski zot pe met lanfaz vremen lo lenpak sosyal? Eski i

pe ganny enkorpoire dan sa letid lanvironnman? Pou fer sir ki nou annan sa bon balans sa devlopman avek sa karakter, avek sa parey zot dir *charm* sa landrwa. Mersi.

MR SPEAKER

Mersi. Minis.

MINISTER **BILLY**
RANGASAMY

Mersi Mr Speaker. *CEO Planning Authority* i ava donn nou en pti pe pli lesplikasyon lo sa pwen. Mersi.

MR SPEAKER

CEO wi please.

CEO ANGELA SERVINA

Mersi Onorab pou ou kestyon. Si nou pou gete bann proze parey nou'n dir nou'n klasifye li an 2 nou en. Akoz kestyon ti vin an 2 porsyon, bann ki'n ganny aprouve ki pa ankor komanse. Apre bann ki dan *pipeline*.

So bann ki'n ganny aprouve ki pa ankor komanse nou annan 3. Dan *pipeline* i annan ankor 2. Be selman letan mon pe gete la dan pipeline i annan petet enn ladan ki ava demare. Petet, mon pa konnen.

Ki mon kapab dir ou, nou letan nou pou ziz sa proze nou pou ziz li an-term son sit kot i ete parey mon'n dir oparavan.

Apre sa ki i pa anmennen. Kwa spesyal ki i pe anmennen. Akoz letan nou fer konsiltasyon lo proze, nou pou konsilte tou nou bann *partners*.

Nou pou konsilte Minister Tourizm, distrik, Lanvironnman, *you name it*. Zot tou zot ganny konsilte. So Minister Lanvironnman li dan parti son evalyasyon ki i fer, i annan sa konponan ki apel, (mon pe *struggle* pou mazin en non an Kreol), i apel *ESIA, Environmental and Social Impact Assessment*.

So sa konsiltan ki pe fer sa evalyasyon, li i ganny mandate. I annan bann *terms of reference* ki i ganny donner e i bezwen *meet* sa bann kriter ki Minister Lanvironnman pou donn li. I pa zis lo kote Minister, Minister Sosyal osi konsilte, Lotorite Distrik. Tou bann *partner* konsernen i bezwen ganny konsilte ladan.

E letan ki Minister li, mon pe koz en pti pe tro bokou Lanvironnman, me selman letan Minister li i ganny konsilte, i pou pran kont tou sa bann komanter ki'n ganny donner li.

Me selman letan mwan mon pe mazin li en pe *further*, an-term ou distrik parey nou pe dir la nou war i annan 5 proze. Petet i pou ariv en serten ler kot

nou pou bezwen mazin petet en *carrying capacity study* osi pou ou distrik. Pou gete ki resours ki distrik i annan eski i ase pou soutenir sa bann devlopman tourism ki pe vini.

Si i annan ankor ki vini ki pou arive? Lekel ki pou travay dan sa bann lotel? Lekel ki pou vin reste dan sa bann lotel? Konpran? Me selman sa mon mazine i pou bezwen lo en baz nasyonal plito. Mersi.

MR SPEAKER

mersi. Avek sa nou'n ariv a lafen sesyon, nou pou dir mersi Minis Rangasamy, e Mr Hoareau e Madanm Servina pou zot partisipasyon. E nou a swet zot bon retour. Nou pou repran travay 4.20 avek en lot kestyon silvouple. Mersi. Nou a pran poz.

(BREAK)

MR SPEAKER

Delegasyon Minister Lagrikiltir, Sanzman Klima e Lanvironnman. Nou ava apel zot silvouple.

Byen nou ava dir bonn apre midi Minis Flavien Joubert, Minis pou Lagrikiltir, Sanzman Klima e lanvironnman. E 2 zofisye ki avek li la o bor li. Mr Phillip Morin *Chief Executive Officer*

PUC. E Mr Michel Zialor Chief Commercial Officer PUC.

Osi dan Galeri nou annan Mr Joel Valmont *Deputy Chief Executive Officer PUC.* E Ms Rebecca Loustau-Lalanne, Sekreter Prensipal pou *Climate Change.*

Nou annan 2 kestyon pou Minis Joubert. Mon le fer kler ek bann Manm, nou annan laranzman pou transpor pou bann Manm *Staff* ki nou'n fer ekspre en pe akoz sityasyon *COVID.* E tou ki nou pa oule zot al tar, nou pa oule ki zot al trennen dan bis. Alor nou laranzman sete pou fini pou 5er.

Mon pou fer sa 2 kestyon. Mon regrete mon pou donn 20 minit sak kestyon. Mon satisfé ki sa dimoun ki'n poz sa kestyon i pou gannyen son larepons. Si i annan ki pa ganny sans demann zot kestyon, zot pou bezwen ekrir nouvo kestyon pou Minis e nou ava envit li pou revin dan nou Lasanble silvouple.

Avek sa nou ava komans avek premye kestyon sorti kot Onorab Regina Esparon Member for Glacis. Onorab Esparon.

HON REGINA ESPARON

Mersi Mr Speaker. Bonn apre midi Minister avek ou delegasyon;

Mr Speaker, an vi bokou dimoun in war en gran logmantasyon dan bann *bill* litilite, eski minis pou Lagrikiltir, Sanzman Klima ek Lanvironnman i kapab eksplik sa Lasanble ki fason ki *PUC* in kalkil tarif elektrisite ek delo dan sa dernyen 3 mwan? Mersi Mr Speaker.

MR SPEAKER

Mersi Onorab. Minis ou Kapab reponn. Si ou bezwen envit ou bann zofisyè pou reponn zot kapab pran laparol.

MINISTER FLAVIEN JOUBERT

Mersi Mr Speaker. Bonn apre midi you bann Manm Lasanble Nasyonal. Bonn apre midi tou bann dimoun ki pe ekoute. Bonn apre midi Mr Speaker.

Mr Speaker, pou nou konpran ki mannyer *bill* litilite i ganny kalkile dan sa bann dernyen mwan, i enportan pou nou pran kont sa bann faktè swivan ki annan en lefe direk lo nou *bill* litilite.

Premye, an vi logmantasyon dan pri karbiran dan dernyen kar lannen 2020. Tarif elektrisite i bezwen ogmante par 30sou par *kilowatt*

er pou tou sekter e sa in arive depi komansman Zanvye 2021.

Dezyenmman, swivan ankor ogmantasyon dan pri karbiran dan premye kar 2021, sa in ariv par R1.81. Tarif elektrisite in bezwen ganny ogmante par 25sou pou sekter domestik, e 51 sou pou lezot sekter. E sa in arive depi le 1 Avril 2021.

Trwazyenmman, akoz sityasyon *COVID-19* dan pei lo komansman lannen 2021, kot in annan restriksyon lo mouvman e bokou dimoun in reste kot lakaz. Konsonmasyon elektrisite pou sekter domestik in ogmante dan en fason sibstansyel.

Pandan sa premye kar lannen 2021 bann *meter readers* pa'n kapab al lir *meter* kot lakour dimoun pou bann faktè asosye avek *COVID-19*. Konsonmasyon bann kliyan ti alor ganny rikorde dan sistenm *billing PUC* dan sa fason swivan.

Dernyen *meter reading* ti ganny fer an Desanm 2020. Konsonmasyon ti ganny estimen pou Zanvye 2021. Konsonmasyon ti ganny estimen pou Fevriye 2021 e konsonmasyon ti ganny parsyelman estimen an Mars 2021. E *meter reading* ti rekomanse an antye, antyerman an Avril 2021.

Bann estimasyon pou sak mwan ti ganny an servan konsonmasyon mwayenn pou sa dernyen 6 mwan avan sa peryod. Letan bann meter readers ti re komans lir bann meter dan milye Mars 2021, bann *bill* pou Zanvye, Fevriye ek Mars ti ganny re kalkile. E sak konsonmasyon ti ganny etale lo sa 3 ouswa 4 mean depandan lo si *meter* sa kliyan ti ganny lir an mars ouswa an Avril.

Sa lapros kot konsonmasyon total i ganny separe, i ganny kalkile pou sak mwan endividuelman. E asire ki bann kliyan pa ganny penalize par sistenm tarif progresiv, ki fer li kout pli ser pou bann ki konsonm plis.

Alors si ou fer ou kalkil lo konsonmasyon total, sa kliyan byensir i ti pou bezwen pey plis. Depandan lo si estimasyon ti pli o ouswa pli ba, letan sa re kalkilasyon in ganny fer i annan kliyan ki swa ti ganny en bout an plis pou peye. Ouswa i annan kliyan ki ti ganny en kredi lo son *bill*.

Bann *bill* pou delo ek *sewage* pou sa peryod in osi ganny kalkile dan menm fason. Alor akoz en onivo konsonmasyon dan premye kar 2021 e bann sanzman enportan dan pri karbiran dan sa menm peryod. Ki'n enpakte pri ki *PUC*

i vann sak kilowatt elektrisite, i fer ki bann kliyan i war en logmantasyon dan zot *bill* litilite.

An menm tan, bann konplikasyon asosye avek lepidemi *COVID-19*, in afekte lafason ki bann kliyan i ganny lenformasyon lo zot *bill*. *PUC* i rekonnèt ki sa bann azisteman i kapab pe koz problem pou serten kliyan.

Me *PUC* i reste fleksib dan lafason ki i adres sak ka. E i ankouraz kliyan ki annan konsern pou kontakte son servis kliyantel pou adres son ka.

PUC in rikord detrwa ka kot konsonmater in ganny donnen bann *bill* ki vreman gro. Sa bann ka in ganny analize e bann koreksyon in ganny fer. Sa bann ka i relye laplipar letan avek bann lerer dan rikord bann *meter readers*.

PUC pe travay pou amelyor performans son bann anplwaye, lo sa kote pou asire ki bann *bill* i ganny byen verifeye avan ki zot donn avek kliyan. Mersi Mr Speaker.

MR SPEAKER

Mersi Minis. Onorab Esparon eski ou annan kestyon siplemanter? Yes.

HON REGINA ESPARON

Wi Mr Speaker, mersi mon annan kestyon siplemanter. Mr Speaker, mon ti ava kontan demann Minis oubyen son teknisyen ki o bor li si ou donn permisyon. Parski zot in sarz kliyan lo konsonmasyon mwayenn Zanvye ek Fevriye. Ki arive si sa kliyan li an Zanvye in servi plis li sa ki ou'n sarz li, li? Sa ki an plis i ganny pase lo son *bill* ki pou vin apre.

Fevriye zot pa'n lir meter, si in servi plis ki sa ki zot in sarze sa konsonmasyon mwayenn la, definitivman sa ki an plis i pou pas lo son *bill* ki pou vin apre.

E ki nou'n remarke Mr Speaker? Minis mon konpran tou sa ki ou'n dir. Parski letan ki sa kliyan pe ganny sarze son *bill*, pou son bann premye inite i pe pey li Elektrisite R1.52 sou pou son premye 200. Son dezyenm 200 i pey li R1.81sou. son trwazyenm, lot sa ankor i pet li R3.45.

Ler i tonm lo son 200 inite an plis ankor i pey li R3.85. E si i pe ale ankor, i pe al pli ban ankor i pou pey li R4.50. Eski sa pa sanmenm sa ki'n fer *bill* bann dimoun monte? Mr Morin mon a esper ou fini apre mon a kontinyen. Kapab kontinyen?

Eski pa sanmenm sa kalkilasyon ki'n fer bann *bill* monte? Parski i si li an Zanvye

ou kalkil li lo konsonmasyon mwayenn, Fevriye ou'n kalkil li lo konsonmasyon mwayenn definitivman mwan Mars ki ou'n komans lir *meter*. Son *bill* Mars avek son *bill* Avril i pou otomatikman monte.

Parski sa kantite ki in servi ki pa'n reflekte lo sa *bill* ki ou'n sarz li Zanvye e Fevriye i vin reflekte lo sa *bill* Mars oubyen Avril. E ki fer ki pou Avril la i war ou pe sarz li sa R4.50. Olye lo sa bann pti inite anler la, pti sonm, ou pe sarz li R4.50 pou tou sa ki in servi par anba sa 500 inite. Eski pa sa ki'n fer zot bann pri monte?

Mr Speaker, eski, parski mon annan en *bill* devan mwan la, eski Minis i kapab dir nou si in annan en legzersis evalyasyon ki'n ganny fer dan bann ka kot *bill* in depas limit. Pou ki sa kliyan i kapab rantre an negosyasyon avek PUC pou etal sa sonm ki zot in tonm dakor lo la?

Parski sa bann dimoun in ganny dir ou'n servi ou a peye. Kan sa bann dimoun zot dir zot pa'n servi. Ki zot in tonm dakor lo la dan en peryod letan, les dir 3 mwan kot sa ava retir en pe presyon lo Bidze sa fanmir, ki parfwa zot war zot avek en *bill* ki bokou pli o ki lapey ki zot resevwar. Mersi Mr Speaker.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou sa kestyon siplemanter. Mon pou pas en bout sa kestyon avek Mr Morin apre. Me selman Onorab mon ti a voudre fer sorti de pti pwen.

Enn, se sa pwen ki ou'n fer sorti dernyen kot ou'n mansyonnen ki i annan serten dimoun ki dir ki i pa'n servi. Nou konnen poudir sa ki *PUC* i rikorde, i egzaktaman sa ki lo ou meter kot ou lakour. E sa ki lo ou *meter* kot ou lakour i sanmenm sa ki ou servi.

Petet i annan serten dispit lo lafason ki pe ganny kalkile e lafason ki sa *bill* i ganny donneren avek ou e bann posibilite anba la. Me i aktyelman reflekte egzaktaman sa ki lo *meter*.

Lot keksoz parey mon ti dir dan mon prezantasyon se ki dan mon repons, *PUC* dapre bann diskisyon ki mon'n ganny avek zot, zot annan en servis kliyantel ki la pou travay avek sak sa bann kliyan pou get dan zot ka e pou menm trouv bann solisyon pou zot kapab re pey sa bann det dapre en peryod ki zot ava dakor ansanm avek *PUC*.

Parey mon'n dir *PUC* in eksplike ki zot ase fleksib. Me mon krwar i osi enportan ki nou bann kliyan zot apros servis kliyantel *PUC*. Zot ganny en konversasyon avek bann zofisyè. Zot kapab vreman al dan detay zot *bill*.

Mon pou pas laparol Mr Speaker avek ou permisyon avek Mr Morin. Pou li azout ankor lo la.

MR SPEAKER

CEO wi.

CEO PHILLIP MORIN

Mr Speaker mersi. Onorab mon krwar ki mon ti'n a voudre re pran sa lesplikasyon kot i dir ki mannyer nou kalkil sa tarif en. Desanm mon repete, konter ti ganny lir. Fevriye in ganny estimen. Zanvye in ganny estimen, Fevriye i ganny estimen.

Me Mars ler nou'n lir konter nou pa'n fer en kalkil baze lo senpleman pou war total ki'n ganny konsonmen parey ou pe dir in akimile.

E an Mars nou'n fer en kalkil kot sa bann dimoun i ganny penalize. Ki nou'n fer? Nou'n pran *reading* Mars. Mwens *reading* Desanm. Sa konsonmasyon total pandan sa lenterval in ganny divize par 3.

Ou 4 si sa *meter* ti ganny lir an Avril.

Ki vedir nou'n ganny tou le 3 mwan parey. Ki fer i donn en sans sa konsonmater pou li pa war li dan sa braket parey ou'n eksplike ki tre o laba anler. Sa fason i fason pli ekitab pou tou dimoun. E kalkil ler in fer nou regarde konbyen in arive pou sak mwan baze lo sa mwayenn ki nou fer.

Epi si dizon ler nou'n azout tousala pou sa 3 mwan i ariv par egzanp R1000. E ou deza ou'n ganny estimen pou en lavalè R800 avan. Savedir ou ava annan ou zis R200 pou ou peye ekstra. Koumsa ki nou fer sa marse.

E souvan konsonmater in war zot avek en gro *bill* aköz konsonmasyon pandan sa lenterval an kestasyon in tre o. In o aköz i annan fanmir ki'n reste dan lakaz. Zanfàn in reste dan lakour e inevitableman keksoz, lenerzi in ganny konsonmen. E sa ki zot i espekte.

E *PUC* boner avan sa *lockdown*, *PUC* ti'n fer en pe lanons kot i ti'n advice konsonmater pou fer atansyon aköz nou santi sa in deza ganny repete lannen 2020 pou sa premye kar. Nou ti war nou avek menm sityasyon.

Alor sa rezon ler ou azout en konsonmasyon ki'n deza o

aköz dimoun i reste dan lakour, e prezan tarif in monte an Zanvye par 30sou pou konsonmater domestik. Epi in monte par 25 sou an Avril. In fer ki an zeneral konsonmater in war zot ek en *bill* en pe o an konparezon avek bann letan avan. Mersi Mr Speaker.

MR SPEAKER

Mersi. Mersi *CEO*. Onorab Sandy Arissol.

HON SANDY ARISSOL

Mersi Mr Speaker. Bonn apre midi Minis avek ou delegasyon. Mr Speaker, mon ti a kontan retourn lo pwen ki Minis in fer letan in dir ek nou bann fakter ki'n ede oubyen ki relye pou fer *bill* monte.

Mon ti a kontan met dan latansyon Minis poudir spesifikman Bel Ombre dan mon distrik. En konsonmater i ganny en *bill* delo R3,541.

En *bill* estimen R3, 541 zis pou delo. Apre letan zot vin lir son *meter* i ganny en *bill* R1070. Tou dimoun i ankor dan lakour, tou dimoun pe konsonmen, personn pa ankor bouze. Zis mon pe met sa pou nou tou konpran ki nou pe koz lo la.

Letan nou pe koz fakter Mr Speaker mon ti a kontan demann Minis, eski tou bann fakter ki zot in mansyonnen i

ok, napa problemm zot pe sey fer nou konpran akoz nou'n pey en gro *bill* mwan pase.

Me mon ti a kontan demann Minis si napa lezot faktor ki pe ede fer *PUC* sarz nou oubyen rod en fason pou anmas larzan. Akoz mon dir sa, mon ava eksplik mon lekor pou zot konpran ki mon pe dir.

Mon aprann i kontinyen annan vol kot *PUC*, *CEO* i la i ava eksplik nou. I annan kab ki'n perdi dan store akout 6 a 7 kab, koriz mwan si mon mal. Bann ka ki i annan kot *PUC* se par egzantp bann saler ki kontinyen ogmante pou bann etranze ki travay dan *PUC*. Ki nou kapab ezans zot pou bann Seselwa ki kapab fer sa travay. Parske mon aprann zot pas zot letan lo *skype* pou koz avek zot fanmir.

I annan en *store* triko kot *PUC* ki pa ankor partaze pou donn person, zis i la pe dormi. Bann pano soler ki ti ganny donnen avek Seselwa vilnerab pou met lo zot lakaz, mon aprann bann zofisye *PUC* ki'n pran in met lo zot lakaz. E zot ki pe benefisye. E nou konsonmater nou kontinyen pey *bill* R3, 541 pou *bill* delo.

Eski Gouvernman pe mazin fer en lodit kot *PUC* pou asire servis ki zot pe donn nou koman konsonmater i adekwat,

i byen e i korek? Mersi Mr Speaker.

MR SPEAKER

Mersi Onorab. Minis oubyen *CEO*?

MINISTER FLAVIEN JOUBERT

Mersi Mr Speaker. Mersi Onorab pou sa 2 pwen. Mon pou les reponn sa pwen kot i konsern estimasyon avek *actual bill* ki en konsonmater in resevwar.

Kot i konsern *PUC* bann kestyon ki mon osi mon demann ek *PUC* e zot in fer mwan konpran poudir i annan *PEMC* - *Public Enterprise Monitoring Commission* in fek fer en travay pou verifye tou ban fonksyonman *PUC*. E i annan en rapor ki sipoze ganny fer lo sa size.

PUC i osi ganny odit tou le lannen par *BDO* e mon krwar i bon ki petet Lasanble i vwar en pe ki i annan dan sa bann odit. E petet met latansyon lo bann pwen ki petet zot krwar pa pe ganny donn ase latansyon. E si i annan okenn keksoz ki pe arive, mon krwar i devret ganny sorti dan tou sa bann kalite envestigasyon.

E si i annan bann pert, *foreigners* ki pe mal ganny peye e menm bann *assets* parey

pano soler ki pe mal ganny servi. Mon krwar sa osi i devret ganny sorti dan sa bann lenvestigasyon.

Alor mon pa pou fer okenn repons lo sa bann alegasyon spesifik ki Onorab in met devan Lasanble. Me mwan mon krwar ki i devret ganny fer atraver evalyasyon formel, en envestigasyon formel. E la prezan lenformasyon i ava sorti klerman pou tou dimoun konpran egzaktman si i annan problem, e kalite problem i annan kot *PUC*. Mersi.

Mon a pas laparol avek Mr Morin. Mersi bokou.

MR SPEAKER

Wi *CEO*.

CEO PHILLIP MORIN

Mersi Mr Speaker. Mon ava komans avek kab. Wi, i annan kab ki'n perdi kot *PUC* mon kapab konfirm sa. E Lapolis pe *investigate*, in ariv devan Lapolis sa.

Mr Speaker mon ti a voudre fer resorti okenn ensidan vol dan *PUC* pa ganny tolere. E an ka ki i anmenn a nou latansyon nou dekouver keksoz, i ganny *investigated* e aksyon disipliner i ganny pran. Nou pe pou zanmen toler okenn vol ou koripsyon dan *PUC*.

Panel, Mr Speaker mon kapab asir ou ki tou *panel* ki'n ganny mete lo bann lakaz, panel asistans in ganny fer anba sirveyans *Energy Commission* avek Minister responsab pou Lenerzi.

Alor napa okenn *panel* ki'n mete ki dimoun in pran in al met se li akoz i pa'n posib. Sa in ganny kontrole, gouvrenen par sistenm etern dan *PUC*. E ti annan bokou dimoun ki ti kapab war ki pe pase.

Mr Speaker, mon krwar la i annan zis en ka kot en anlwaye *PUC* ti fer en aplikasyon avek Minister, sa ki mwan mon an kouran. In ganny en panel, en set panel pou 3 kilowatt si mon *memory* i *serve* mon *right*. E sa i ofisyel, napa naryen ki'n ganny pran par laport deryer. Mon kapab asir Lasanble ek sa.

An se ki konsern travayer etranze. Mr Speaker, si ou le ganny travayer etranze pou vin travay pou nou. Nou bezwen pey zot pou nou ganny kalite. Nou pa pou kapab pey travayer etranze en saler ki terribleman ba, nou pa pou ganny sa kalite ki nou pe rode. Alor larepons se ki wi nou bezwen veye ki nou pe peye. Nou bezwen rod valer pou larzan ki nou pe pey bann travayer etranze.

E mon kapab asir Lasanble Mr Speaker, bann travayer etranze dan *PUC* nou bezwen zot sa ki la. Nou pa'n anmenn dimoun dan *PUC* dan zis akoz nou anvi war etranze dan *PUC*. Pa ditou, i pa le ka.

E finalman odit. Mon *echo* sa ki Minister in dir, i annan en lodit ki'n ganny fer par *PEMC*. In pran zot 6 mwan pou fer sa lodit. In annan en *thorough investigation* dan *PUC*, e zot rapor in ganny soumet avek *PUC* an *draft form*. Vedir *PUC* prezan pou lir sa rapor, i pou donn son komanter avan ler rapor i al kot Gouvernman e Lotorite e lezot Lotorite piblik. Mersi Mr Speaker.

MR SPEAKER

Mersi *CEO*. Mon'n azout bann non ki'n leve, be selman mon pa garanti ki zot pou ganny sans demann zot keston. Nou a pas lo Onorab Loze.

HON JOHAN LOZE

Mersi Mr Speaker. Bonzour Minis. Byenveni dan Lasanble, ou Minis avek ou delegasyon. Minis si nou met keksoz an konteks. Depi 2020 nou pei pe pas atraver en kriz ekonomik ki relye avek *COVID-19*. Pandan sa bann dernyen mwan ki nou'n ladan, dimoun in komans

al lo *redundancy*, in perdi lanplwa.

An rezilta perdi lanplwa dimoun i perdi zot landrwa reste. I annan bann fanmir ki pe vin pli gran. Zot pe retourn kot lakour manman, papa. Met presyon lo konsonmasyon delo, elektrik.

E dan sa bann menm dernyen mwan, dimoun in vwar zot perdi tou zot bann benefis sosyal. Ki son *URS*, ki son *Social Welfare*, dimoun in ganny destitye sa pti 5 sou ki ti antre dan zot lanmen, akoz zot en *burden* lo Gouvernman.

Now Minis, dan sa *pénurie* ki Seselwa i ladan ozordi zot vwar en *bill PUC* 5 mil ekek, 3 mil ekek, 4 mil ekek. I tonm dan zot lanmen san okenn *warning*. Sa gro *bill* i tonm dan zot lanmen, e i annan dimoun mon pe dir ou ozordi Minis ki'n bezwen fer en swa ant manze avek pey *bill*.

Zot in bezwen fer en swa ant donn zot zanfand en pti goute avek klere e lave kot zot lakaz. Se sa la sityasyon, se sa la realite pa sa lesplikasyon ki ou'n donn nou ozordi. Avek tou respe Minis ki mon annan pou ou bann teknisyen.

MR SPEAKER

Ou annan en keston Onorab?

HON JOHAN LOZE

With all fairness Mr Speaker, Onorab Sandy Arissol in al dan store PUC in

MR SPEAKER

Non, non. Avans lo kestyon. Zis letan, letan. Avans lo kestyon.

HON JOHAN LOZE

Mon kestyon pou ou Minis, eski ou santi i annan en sans, en loportinite ki ou Minister i kapab entersedé silvouple avek *ASP on behalf of* bann dimoun ki ou rikorde kot PUC. Ki zot in ganny tape avek sa bann gro *bill* ki zot a resevwar en serten lasistans silvouple.

Ki ava ed zot fer de bout zwenn zot osi. E donn zot zanfan en lasyet manze. Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab pou sa kestyon. Eski nou kapab entervenir dan bann ka parey? Premye Mr Speaker mon pou koz lo sa size parey Onorab in dir i annan bann dimoun ki vreman i pa pou kapab pey son *bill* e i annan problemn.

I annan bann lenstitisyon ki sipoze la pou zot kapab

konsilte avek e ganny apiye pou zot kapab pran ka avek zot bann *bill*.

Me selman si i annan okenn ka ki PUC i remarke, ki nou, nou remarke ki anmennen a mon latansyon ki mon war i annan en problemn. Si mon pou rod en fason pou kapab trouv en lasistans, pou sa dimoun an traver bann mekanizm ki deza egziste.

Me selman mon krwar i enportan Onorab ki parey pli boner kestyon se *bill* ek lafason ki in ganny kalkile nou bezwen separ osi sa size sipor pou peyman *bill* avek bann fakter ki pe afekte peyman *bill*. Sa ki mon'n reponn sa zis bann fakter ki pe afekte sanzman dan *bill* elektrisite ek delo byensir.

Me son bann konponan lasistans mon krwar i annan en fran diskisyon ki kapab ganny fer lo la. I annan diferan *mechanism* ki'n ganny konsidere.

I annan mekanizm sosyal. I menm i annan en fasilite lenerzi renouvlab ki ti sipoze li osi asiste avek bann dimoun ki annan problemn lo zot *bill*. Ki i osi pe ganny *commission* la.

E son bann benefis ki i vin avek i sipoze ganny pas avek bann dimoun ki pli vilnerab. Savedir i annan serten posibilite, i annan bann

mekanizm ki merit kapab la pou apiy sa bann dimoun.

Mon krwar letan nou ava fer en pe piblisite lo sa bout, nou ava eksplike. I annan posibilite pou dimoun ganny asiste dan diferan fason. Me parey mon'n dir *PUC* ek son bann *bill*, i annan en baz teknik ki'n fer sa lefe lo son *bill*.

E bann lezot keksoz ki vin avek i en diskisyon ki bezwen ganny fer en pe pli long avek bann lezot lenstitisyon ki egziste dan pei.

Me mon a remerisi ou pou sa pwen. E si i annan okenn dimoun ki vreman ou okouran Onorab ki pe ganny bann difikilte partikilye kot vreman zot pa pe kapab. Zot bezwen fer sa swa ant manze avek pey zot *bill* elektrisite, byensir mon pou bezwen fer en fason kontakte bann dimoun nesese e trouv en fason pou kapab adres zot problemn. Mersi.

MR SPEAKER

Mersi. Onorab Michel Roucou.

HON MICHEL ROUCOU

Mersi Mr Chair. Bonn apre midi a tous. Eski ki mon pe demande, si zot annan en legzersis ki zot fer lo zot bann *meter*, sirtou *meter* delo pou vwar si pe fonksyon byen. Akoz mon'n pas dan en

leksperyans mwan osi kot mon'n ganny mwan en *bill* vreman o. Ki ler mon'n al kot *PUC* mon'n koz avek zot, ler zot in vin vwar poudir problemn ti avek sa *meter*.

Eski zot pe vwar poudir pou ki zot bann *meter* pe mars byen? Mersi.

MR SPEAKER

Mersi Onorab. Minis oubyen CEO. Wi Minis.

MINISTER FLAVIEN JOUBERT

Mersi Mr Speaker. Avek ou permisyon mon pou demann Mr Morin pou reponn sa kestyon. Mersi.

MR SPEAKER

Tre byen.

CEO PHILLIP MORIN

Mersi Mr Speaker. Onorab, bann konter delo e osi elektrisite rarman zot pou al pli vit ki zot devret ale normalman. Sa akoz zot mekanizm anndan dan sa meter pa permet zot sa. Alor bann ka ki ou pe mansyonnen i eksepsyonnel e rarman ou war bann tel sityasyon parey.

Mon sipoze in arive ki meter in ganny andomaze ou kek keksoz koumsa.

An se ki konsern etalonaz *meter* konman nou dir sa *calibration meter*. Ki nou pe fer, kontinyelman nou pe ranplas meter. Dan sa dernyen 4an, 5an nou'n ranplas de milye, de milye konter. E nou pe kontinyen fer li sa. Akoz en konter i devret annan en lavi avek apepre depan son kalite, annan de ler i kapab 5an, annan de ler osi i kapab ale ziskan 10an.

Alor ki mon kapab asir ou se ki konter pe ganny ranplase. E dan sirkonstans kot en dimoun i annan en konplent ki dout son konter, ki nou fer, nou met en lot *test meter* pou nou regarde si i pe fonksyonn byen oubyen non.

E si dan okenn sirkonstans ki son konter pe mars an plis ki i devret, alor nou pou kalkile pou vwar konbyen i an plis e nou a *refund* li sa ki nou war i devret ganny *refund*. Mersi Mr Speaker.

MR SPEAKER

Mersi *CEO*. Onorab Lemiel.

HON SYLVANNE LEMIEL

Mersi Mr Speaker. Mon ti pou al lev mon lanmen dan menm letan ki Onorab Roucou in demann sa akoz i *sort of a supplementary*. Akoz *Minister* i annan dimoun ki'n ganny en let

depi Fevriye ki'n dir poudir zot *meter*. Nou'n remarke ki ou *meter* pa pe marse e nou pou vin ranplase.

Me selman ozordi *meter* pa ankor ranplase kot sa bann dimoun en. Mon annan 2 ka apepre. E ozordi i annan sa bann dimoun ki'n ganny zot *bill* R5 mil ekek.

So ler mon'n tann *CEO PUC* pe koz lo la, dan sa ka eski ki sa bann dimoun i fer la prezan? Zot vin direk kot ou? *Meter* pa ankor ganny ranplase, zot annan sa let dan zot lanmen. *What is the procedure now?* Mersi.

MR SPEAKER

Mersi. *CEO*.

CEO PHILLIP MORIN

Mersi Mr Speaker. Onorab dan sa ka nou pou *investigate*. Dan sa ka nou pou *investigate* si sa dimoun i vin kot nou i dir nou i annan en problem ek son konter nou pou *investigate* sa. Prezan ou pe dir mwan i annan en let.

Souvan *PUC* i en pe inonde ek bokou louvraz, alor i annan en dekalaz ant moman ki en desizyon i ganny pran pou fer en louvraz ek moman ki'n arive fer li.

Nou donn priyorite souvan bann louvraz kot

dimoun napa sa servis. Alor en konter pa pe marse, o sito ki nou pou kapab fer li nou pou fer li nou pou ranplase. E mon en pe sirprann ki ou dir mwan ki i annan bokou mwan la ki sa dimoun pe espere, pou son konter sanze.

Akoz normalman i pa devret pran sa kantite letan. Akoz i annan en legzersis kouraman nou pe ranplas konter.

En lalis ki sorti kot komersyal i vin kot teknik. E teknik i al lo *site* i al sanz sa bann konter. Alor si ou ti kapab donn nou pli tar sa lenformasyon e nou ti ava *investigate*, e nou ava donn ou en *feedback* lo la. Mersi.

MR SPEAKER

Mersi. Onorab Monthy.

HON PHILIP MONTHY

Mersi Mr Speaker. Bonn apre midi Minis e bonn apre midi *CEO PUC*. Minis ou'n sit bann fakter ki'n fer ki in annan sa logmantasyon. Mon santi ki i annan en fakter osi petet ki'n kontribye se sa sityasyon avek lasosyasyon bann drayver *pick-up* avek konstriksyon danm La Gogue, ki'n kout *PUC* en pe milyon.

E mon sipoze zot pe sey rekiper en pe sa larzan ki sa in

fer sa trou ki sa in fer dan zot Bidze. Mon kestyon se, eski sa logmantasyon i *the best* ki *PUC* ti kapab vin avek a sa moman la?

Eski ler nou pe get lenpak ki sa pe annan lo nou bann dimoun, i pa nesosite ki nou'n revwar sa logmantasyon 25 sou oubyen 30 sou pou fer li desann en pti gin pli ba pou soulaz soufrans nou bann dimoun la deor. Mersi.

MR SPEAKER

Mersi Onorab. Wi Minis.

MINISTER FLAVIEN JOUBERT

Mersi Mr Speaker, mon pou zis, non mon a pas laparol avek Mr Morin i ava reponn kestyon an antye. Mersi.

MR SPEAKER

Mersi. Wi *CEO*.

CEO PHILLIP MORIN

Mersi Mr Speaker. Onorab mon kapab asir ou ki dan proze Danm La Gogue e sirkonstans ki annan pou fer avek transportasyon, napa naryen pou fer avek logmantasyon dan pri elektrisite.

Elektrisite in monte an Zanvyé par 30 sou aköz *fuel*, pri *fuel* parey Minis in dir in monte. Le 01 Avril sa lannen in mont

par 25 sou ankor pou domestik, e in mont 51sou pou lezot sekter.

An realite i ti devret mont 51sou pou domestik osi. Me an konsiltasyon ek *Energy Commission* avek Minister, desizyon ti ganny pran ki pou redwir lenpak lo konsonmater domestik. Alor pa fer monte par 51sou, me fer monte par selman 25sou.

Alor en zefor pe ganny fer la pou ede dan ver sa direksyon ki ou'n koz lo la.

MR SPEAKER

Mersi *CEO*. A se pwen mon pou pas lo prosen keston. Sa keston ki vini osi i ankor lo *PUC*. So si nou annan letan nou a kapab rebran bann entervenans ki lo mon lalis. Me selman mon a permet Manm ki'n demann sa dezyenm keston ganny son *full* larepons avan mon pran okenn risk.

Alor mon apel Onorab Rocky Uranie Manm pou La Digue, *Inner Islands* pou poz son keston.

HON ROCKY URANIE

Mersi Mr Chair. Bonn apre midi Minis avek *CEO*. Koupir elektrisite i en problem ki konsern tou Digwa. Dan sa napa larzan zot depans bokou pou re aste oubyen fer

reparasyon lo bann lekipman parey televizyon, *fridge* e lezot ankor ki'n brile aköz koupir kouran.

Eski *PUC* i kapab dir nou kote problem i ete, e ki zot pe fer pou rektifye sa problem?

Mon dezyenm keston. Eski sa zenerater ki ti sipoze tanporer Dan Goulo La Digue pou prezan permanan kot i ete? Mersi Mr Chair.

MR SPEAKER

Mersi Onorab. Minis si ou, wi Minis.

MINISTER FLAVIEN JOUBERT

Mersi Mr Speaker. Mr Speaker La Digue i ganny elektrisite atraver en kab, atraver 2 kab soumaren sorti Praslin. Sa ti ganny enstale 1985, e en lot an 2008. An adisyon 2an pase *PUC* ti enstal tanporer 2 zenerater Dan Goulo pou asir servis elektrisite letan i annan koupir.

Lo La Digue elektrisite i ganny distribye an traver en sistenm *overhead*. Savedir difil lo poto e osi atraver kab anba later. Rikord *PUC* i montre ki depi Zanve 2021 konsomater lo La Digue in ganny enteripsyon elektrisite mazer dan 3 lokasyon.

Premye ti le 5 Zanvye 2021 kot elekrisite ti ganny enteronpe pou 1 erdtan letan en brans mang ti tonm lo laliny o tansyon dan rezyon Grand Anse. Rezyon Grand Anse antye ti ganny koupir kouran pou 1 erdtan.

Dezyenm ti ariv le 16 Fevriye kot stasyon zenerasyon elekrisite Praslin ti eksperyans en *blackout* apre ki en zenerater ti devlop en fot. Sa lensidan ti fer ki La Digue an antye ti ganny enteripsyon dan servis elekrisite pou 1 erdtan.

Trwazyenm lensidan ti ariv le 29 Avril letan enn parmi sa 2 kab soumaren ti devlop en fot dan lokasyon pres avek Ile Ronde. Sa ti fer ki bann konsonmater dan rezyon Belle Vue, Grand Anse, Anse Reunion, L'Union, e Dan Goulo ti eksperyans en lenteripsyon dan servis elekrisite pandan 2 erdtan.

Mr Speaker, *PUC* pe sey tou son posib pou asir sekirite servis elekrisite dan pei. I pe fer kontinyelman bann travay pou koup bann brans ki menas bann laliny, e lezot lenfrastruktir lo son rezo elektrik.

PUC i osi fer mentenans regilye lo son bann zenerater baze lo bann norm ek standar ki rekomande. Me i pa posib

pou *PUC* garanti en servis san okenn enteripsyon dan son bann stasyon.

I osi enportan fer resorti ki fot lo nouvo kab soumaren dan rezyon Ile Ronde in ase frekan, e *PUC* in rikord omwen en fot par lannen. Sa 2 zenerater lo La Digue in ganny enstale pou zisteman adres sa risk ki i annan lo sa kab soumaren.

I ti dan plan *PUC* pou met en nouvo seksyon kab 3.5 kilomet lo en lot larout, ki mwen ganny afekte avek mouvman kouran. Me sa pou ganny retar aköz en aksidan ki'n arive pandan transportasyon. *PUC* pe fer demars avek lasirans pou ranplas sa kab, pou ranplas sa roulo kab. Pou kapab antreprann sa louvraz pli tar dan lannen.

I osi annan plan dan lonterm pou annan en trwazyenm kab pou asir plis sekirite e kapasite servis elekrisite lo La Digue.

Mersi Mr Speaker. Mon ava demann Mr Morin pou eksplik en pti pe konsernan sa 2 zenerater ki Dan Goulo e zot nouvo lokasyon. Mersi.

MR SPEAKER

Mersi Minis. Wi *CEO*.

CEO PHILLIP MORIN

Mersi Mr Speaker. Sa 2 zenerater Dan Goulo in ganny enstale detrwa lannen pase zisteman konman sekour an ka ki i annan okenn defayans lo enn parmi sa 2 ka. Nou plan se pou transfer zot kot zot ete, i pa normal kot zot ete. Nou santi nou osi ki i en pe dan ekspoze.

Nou le anmenn zot kot nou'n annan plan pou fer nou stasyon tretman *sewage*. E sa L'Union. E zis akote i annan en morso later la ki nou pe an diskisyon ek Gouvernman pou nou kapab gannnen.

Nou ava met sa 2 zenerater la akote. I ava sorti an vi Dan Goulo, e i ava permet nou pou nou kit zot la en pe pli lontan. E pou fer fas avek okenn risk ki kapab arive kot kab i tonm *en panne*. Mersi.

MR SPEAKER

Mersi *CEO*. Onorab Romain.

HON GEORGE ROMAIN

Mersi Mr Speaker. Minis bonn apre midi avek ou delegasyon. Minis mon'n fek tann ou dir an vi ki sa Onorab Rocky La Digue *regarding* zenerater. Me mon ti vwar lo televizyon ki ti annan enn zot kab parey Minis fek mansyonnen. Ki ti ganny andomaze ki ler ti pe, pou met dan bato pou anmenn Praslin.

apre kefwat ti pou pas anba lanmer pou al La Digue.

Mon kestyon mon ti a kontan demann Minis, mon'n tande ki zot dir zot pe fer negosyasyon ek lasirans. Eski sa kab savedir ti'n ganny asire atraver lasirans ki si savedir i ariv en domaz savedir zot pe ganny zot larzan *back* pou kapab rod en lot kab?

Si sa i wi savedir lasirans pe rann zot, be selman si non lekel ki responsab vreman pou sa domaz ki'n arive ek enn sa kab?

Apre dezyenmman Minis vitman anvi ki sa bann kab ki'n perdi lo Ile Aurore, ki Ile Aurore i tonm dan Anse Etoile. E mon'n tann sa, e pou lemoman pa ankor dir lo medya. Mon ti a kontan si medya savedir ti ava, pep Seselwa ti ava ganny dir ki vreman in arive.

Apre si Minis ti kapab dir vitman konbyen in koute enn sa kab? Enn sa kab konbyen vreman i koute? Mersi Mr Speaker.

(technical problem)

MR SPEAKER

I fer 3 pwen Onorab. *Ok*, byen Minis ou a sey adres sa koman en pwen. Minis ou a sey adres sa

MINISTER FLAVIEN JOUBERT

Mersi Mr Speaker. Nou a sey adres tou le 3 koman en sel pwen. Lasirans pou kab i annan en laranzman lasirans. Mon ava les *CEO* donn en pe detay.

E osi anmenn tan mon a les *CEO* klarifye kou enn sa bann kab konbyen i arive.

Me kot konsern medya parey *CEO* in eksplike pli boner, mon krwar sa size i ankor dan lanmen Lapolis, si i annan okenn bann pert. Alor parfwa i difisil pou ou zis al lo medya e fer komanter letan keksoz i anba investigasyon.

Me mon a les *CEO* osi klarifye lo sa pwen. Mersi Mr Speaker.

MR SPEAKER

Wi *CEO*.

CEO PHILLIP MORIN

Mersi Mr Speaker. Mon a pran kab perdi tou dabor. Mon konfirman ankor enn fwa wi kab in perdi e *PUC* in travay tre etrwatman avek Lapolis pou fer lenvestigasyon e atrap dimoun konekte avek sa vol ka. Alor detay nou pa ti a voudre devwale ziska ler petet i rezonnab pou nou fer sa.

An se ki konsern sa kab ki'n ganny andomaze ti annan 3 roulo apepre 3.4 or .5 kilomet.

Enn sa roulo ki'n ganny andomaze. E i kout apepre \$110 ekek mil pou en roulo.

E lasirans pou sa kab ki nou annan, nou osi en lasirans e osi kontrakter ki ti responsab pou transfer sa kab pou nou i devret annan son lasirans pou li osi.

Alor an se moman nou an diskisyon avek kontrakter pou war anba ki lasirans sa pou tonbe e ki mannyer, sa ki pou responsab vremen. Sa ki responsab vremen sa. Alor sa an se moman kot sityasyon i ete. Mersi Mr Speaker.

MR SPEAKER

Mersi. Onorab Sophola.

HON NOLINE SOPHOLA

Mersi Mr Speaker. Bonn apre midi Minis ek ou delegasyon. Minis mon vremen apresye ki ou pe tir sa zenerater kot i ete. Sa pou dan benefis bann fanmir ek biznes dan sa landrwa. Fodre note ki sa ti dan plan Gouvernman sortan.

Minis eski ou kapab dir nou si ou Minister i annan en mekanizm ki kapab met an mars pou ed bann fanmir ki ler tanzantan i ariv sa ban koupir e ki zot keksoz i ganny brile, i ganny andomaze. Me vremen ki ou'n fer en bon *assessment* e ki

ou vwar ki zot ka i vreman byen.
Mersi.

MR SPEAKER

Mersi Onorab. Minis.

MINISTER **FLAVIEN**
JOUBERT

Mersi Onorab pou sa kestryon. E mersi Mr Speaker. Mr Speaker, konsernan zenerater mon krwar *CEO* in fini eksplike.

Mekanizm pou ranbours dimoun ki perdi zot lekipman ki ganny andomaze. Mon pa ou dir par koupir kouran, me zot lekipman ki petet i ganny andomaze.

Mon krwar premye keksoz Onorab, mwan osi mon'n fer sa diskisyon en *PUC* akoz mon doute poudir sa kestryon ti pou monte dan Lasanble Nasyonal. Premye keksoz mon krwar fodre petet nou dakor lo la se ki, letan en lensidan i arive *PUC* osi ki Leta li osi i perdi en kantite.

En senp lensidan kot ou annan en kab ki bezwen ganny ranplase. Ou annan deplasman, ou annan en ta lekipman ki bezwen ganny met lo teren. Ou annan dimoun ki bezwen ganny peye. Li osi i koute pou sey met sa problemn annord pou kapab retourn servis pli vit posibil.

Alor i annan deza en pert lo kote Leta. Mon'n demann *PUC* lo bann ka dan lepase, kot konpansasyon in deza sey ganny eseye. E zot in donn mwan en legzanp kot zis en ptipti lensidan in ariv apepre zis par anba R500mil.

E nou demann nou lekor sa kestryon menm si nou ti annan sa lanvi, nou ti a kontan dimoun pa santi li in ganny abandonnen letan i annan sa bann problemn.

Eski pei, Leta, *PUC* pou kapab soutenir en sistenm parey, kot letan i annan en koupir elektrisite ou ganny inonde par bann reklanmasyon sorti kot diferan dimoun, akoz in ariv diferan pert lekipman dan zot lakaz.

Petet i annan serten ka kot i kler poudir in annan en fot *PUC* e sa in koz en pert pou en partikilye ouswa en lenstalasyon komersyal par egzantp.

La i annan en diskisyon direk ki ganny fer ant sa enn ki ganny afekte ek *PUC*. I annan bann evalyasyon ki kapab ganny fer.

Me pou ou annan en sistenm zeneral ki adres tou dimoun letan ou annan en sel koupir. I posibil ki nou kapab pe war nou pe met nou lekor dan en difikilte finansyel. E apre

PUC pou bezwen vin kot Gouvernman pou rod en pe larzan akoz i pou napa larzan pou pey tousala.

Alor mon war li en kestyon ki ase difisil pou adrese. Me nou konnen poudir i annan plizyer ka kot si en dimoun ouswa en konpanyen i santi in ganny afekte direkteman par negligans ouswa aksyon *PUC*. Ouswa enn son bann prosedir ki in fer atraver sa sistenm, byensir sa enn endividi i kapab vin devan e la i ava annan en konversasyon ant sa de. E zot ava gete ki kalite solisyon zot kapab vin avek.

Me en *Scheme* zeneral Onorab mon pa toutafe krwar ki i pou rezourd nou problem. E petet i kapab amenn nou en pe plis dan difikilte avek finansman *PUC*. Mersi.

MR SPEAKER

Mersi. I konmsi mon'n oubliye ofer Onorab Uranie posibilite kestyon siplemanter. Silvouple Onorab si ou annan.

HON ROCKY URANIE

Mersi Mr Chair pou mazin mwan. Mon ti a kontan demann *CEO* oubyen Minis konmsi, sa bann proze la, ki kantite letan zot krwar Digwa pou bezwen espere avan ler ki i ganny

demare oubyen i konmanse? Mersi.

MR SPEAKER

Mersi. *CEO*. Lekel?

MINISTER FLAVIEN JOUBERT

Mersi Onorab pou sa kestyon siplemanter. Mersi Mr Speaker. Mon ti mansyonnen pli boner ki *PUC* i annan lentansyon koriz sa sityasyon avek sa kab ki i ti pe al enstale lafen lannen. E sa i pou bezwen ganny fer letan i ganny letan kalmi.

E i bezwen pas letan ki nou pa kapab fer naryen la. Me selman letan kalmi i a retournen, *PUC* i ava bezwen in pare pou li fer sa travay.

Kot i konsern zenerater mon a les *CEO* reponn sa bout kestyon. Mersi.

MR SPEAKER

CEO wi.

CEO PHILLIP MORIN

Mersi Mr Speaker. Larepons se ki o pli to ki nou kapab sa Morsi later L'Union dan bor landrwa kot sa *STP* pou ete. Nou a komans fer demars pou nou transfer sa zenerater. Pou lemoman i pa ankore klerman etabli si nou pou kapab servi sa landrwa.

Alor mon estimen probableman avan lafen sa lannen, boner lannen prosenn si nou *fail* lafen sa lannen. Sa *timing* ki mon kapab donnen Mr Speaker. Mersi.

MR SPEAKER

Mersi. Wi Onorab Uranie dernyen pwen.

HON ROCKY URANIE

Wi Mr Chair mersi. Ki opsyon si zot pa ganny sa bout later? Akoz sa later prezan ki zot pe al diskite oubyen ti'n deza fini? Ti'n deza? Ki opsyon si zot pa ganny sa later? Mersi.

MR SPEAKER

Mersi. Silvouple. Onorab Arissol les. Wi, silvouple bann Manm zot a les nou ekout kestyon e ekout repons. Wi Onorab Uranie mersi. Minis ou'n ganny son kestyon?

MINISTER FLAVIEN JOUBERT

Mersi Mr Speaker. Mersi Onorab. Nou'n konpran ou kestyon. Mon ava les CEO reponn. Mersi.

CEO PHILLIP MORIN

Mersi Mr Speaker. Nou ava bezwen fer demars natirelman rod en lot landrwa. I bezwen annan en lot landrwa parla. Me

pou lemoman mon pa vwar okenn rezon Mr Speaker akoz nou pa kapab ganny sa morso later la pou nou met sa zenerater.

Alor mon krwar i zis en kestyon letan pou nou etabli sa epi *move* sa zenerater. Mersi.

MR SPEAKER

Mersi. Bon *ok* mon ava pous letan en pti gin e mon ava repas lo premye kestyon ki ti ganny demande. Avek ankor enn de, tou pou depan lo si kestyon i kourt, si ou kapab fer ou kestyon kourt e larepons i kapab kourt, nou kapab pran bann ki'n mete. Onorab Pillay.

Wi, selman avek bann Manm ki ti'n deza lev zot lanmen. Mon pa pe pran nouvo non. Onorab Pillay.

HON SEBASTIEN PILLAY

Mersi Mr Speaker. Mr Speaker, mon kestyon i tre senp. Minis kestyon ki nou pe met devan ou se ki dan larepons ki ou'n donn Onorab Loze vizavi kestyon ki'n poz ek ou. *Regarding* bann lasistans ki serten dimoun i gannyen.

E mon asire lamazorite Manm dan Lasanble in ganny bann diferan *bill* ki bann dimoun in anvoy kot zot.

Onorab Esparon ki'n *move* sa kestyon in koz lo en *bill* ki in gannyen. Eski ou pou pran en langazman ki ou pou al devan *Cabinet* e ou pou met sa pwen devan lo ki fason ou pou ed sa group dimoun ki pli vilnerab?

Akoz mon santi ou pa'n vreman adres sa sityasyon kot i annan dimoun deor la ki vreman pe soufer. Avek lefe ki zot annan bann *bill* ki pe monte, zot in ganny fer *redundant*, zot napa bann lezot lasistans. E si zot pe rod bann lezot lasistans, e si zot pe rod sa bann lasistans Minis malerezman i pran bokou letan.

So eski nou kapab ganny en langazman avek ou Minister ki zot pou al met sa pwen devan oubyen ki *PUC* pou fer en *assessment* pou vwar ki kantite dimoun ki'n anmenn sa konplent devan kot son *Customer Services Department*. Mersi Mr Speaker.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab pou sa, Leader Lopoziyon pou sa kestyon. Onorab prezan mon konpran sa ki ou pe dir. Sa ki Onorab Loze pli boner ti donn mwan se i ti pe

koz ek mwan lo en sityasyon *pénurie* e lezot sityasyon asosye avek.

La ou pe demann mwan en langazman si nou kapab pran sa lenformasyon sorti kot *PUC* transmet sa avek Sosyal e eksplik zot poudir i annan en serten kantite dimoun ki dan difikilte.

E sa mon krwar i en keksoz ki nou kapab fer, aköz sa lenformasyon i deza la. E nou kapab endik ek bann lotorite konsernen poudir i annan en serten nonm dimoun ki pe ganny problem. E zot, zot ava deside ki mannyer zot pou evalye sa bann dimoun.

Akoz *PUC* menm si i pou transmet sa bann lenformasyon dapre bann lapel, ki i pe gannyen devan li, i pa pou evalye sa bann dimoun, alor i pou bezwen annan en lot letap kot sa bann dimoun ki travay dan sa sekter i bezwen retournen e vin evalye sa bann kliyan ki pe demontre sa bann problem.

E apre keksoz i a ganny fer pou trouv en lasistans pou zot. Alor mon krwar i en keksoz ase kler ki *PUC* i kapab fer. Pran sa bann lenformasyon transmet kot Sosyal, donn tou bann lenformasyon lo zot konsonmasyon dan lepase. Zot

bann kapasite pou re peye eksetera.

E apre si i annan en bezwen i ava, en lasistans i ava bezwen ganny trouve pou siport sa bann dimoun. Alor i en keksoz ki mon angaze pou fer. E ansanm ek *PUC* nou a transmet sa bann lenformasyon kot nou war ki sa bann dimoun pe vin devan avek bann problem, ki vremen *PUC* pa pe kapab rezourd ki bezwen ganny transmet avek en lot Lazans. Mersi.

MR SPEAKER

Mersi. Eskiz mwan Onorab Loizeau mon pe pran mon bann Manm ki ti lev lanmen lo kestyon Onorab Esparon depi avan. Onorab Aglae.

HON EGBERT AGLAE

Wi Mr Speaker. Mon ti a kontan petet, mon pa konnen si *CEO* ouswa Minis *ok*. Dan laliny sa bann kou ki'n monte sirtou sa bann lesplikasyon ki ou'n donner. Kot i konsern alternativ ki nou kapab donn dimoun.

Akoz mon santi poudir petet eski *PUC* pa ti kapab premyerman dir be *ok* vi ki sityasyon mannyer i ete, *delay* sa bann logmantasyon pou ankor en peryod letan.

Pei ava ganny letan petet rekouver petet ankor dan 3 mwan, 4 mwan, 5 mwan. Eski pa ti kapab fer sa? Akoz i annan dimoun *still* pa ankor ganny en lanplwa li menm li e i pe war son bann *bill* komodite depi laboutik tou keksoz pe monte.

Eski *PUC* pa ti kapab konsider petet *refrain* en pti gin lo zot bann ogmantasyon pou donn dimoun en pe *breathing space* ziskan ler zot arete.

MR SPEAKER

Mersi pou ou kestyon Onorab. *CEO* oubyen Minis.

MINISTER FLAVIEN JOUBERT

Mersi Mr Speaker. Mon ava demann Mr Morin pou reponn avek ou permisyon. Mersi.

MR SPEAKER

Tre byen.

CEO PHILLIP MORIN

Mersi Mr Speaker. Onorab i pa pou posib aköz *PUC* osi son kondisyon finansyer pa permet li fer sa. Akoz ler *fuel* i monte sak sou ki nou pe koz lo la, sak sou par *kilowatt* er i reprezant mon estimen R4 milyon. Nou pe koz 1 sou lo en *kilowatt* er.

E si ou pe demann nou pou pa fer monte par 25sou lo 400milyon *kilowatt* er dan en

lannen, i en kantite, en gro sonm sa. Alor larepons mon dezole se ki *PUC* pou dan terib problemm finansyer si ou komans fer sa.

Le mye ki nou kapab fer se azir en pe toleran anver bann konsonmater domestik, donn zot en pti pe plis souf pou zot kapab pey zot *bill* en?

Sa nou kapab fer, me nou pa dan en pozisyon pou nou dir *fuel* in monte annou retarde pou fer monte tarif akoz i pou en katastrof pou *PUC*. Se lafason ki mon kapab dekrir li. Mersi Mr Speaker.

MR SPEAKER

Mersi. Onorab Gill.

HON CHURCHILL GILL

Mersi Mr Speaker. Bonn apre midi Minis. Kestyon i tre bref. *CEO* dan lesplikasyon dan kestyon en Manm avan sa, ler in dir nou poudir pou ou ganny kalite travayer dan *PUC* ou bezwen pey zot.

E aprezan mon kestyon pou *CEO*. Be lo en plan lonterm eski *PUC* pe *train* Seselwa pou ki a en serten pwen sa bann dimoun etranze i ava kapab ganny ranplase par Seselwa? Mersi.

MR SPEAKER

Mersi Onorab. *CEO*.

CEO PHILLIP MORIN

Mersi Mr Speaker. Onorab toulezour *PUC* pe *train* Seselwa. Toulezour *PUC* pe anploy nouvo *graduates*. Par egzanp tou dernyerman la i annan 2 ki nou'n anploye. Alor i annan en gran zefor ki pe ganny fer dan *PUC* pou nou anploy otan posib Seselwa ki nou kapab.

Me pou lemoman Mr Speaker, ki pe arive se ki *PUC* pe elarzi son sistenm en fason mazer. Nou annan 33 *KV* Sid Mahe de kilomet par kilomet nou bezwen enstal kab. Nou'n annan 10 stasyon e bann lenstriman modern ki nou forse mete pou nou amelyor kalite servis.

Lo Romainville nou annan nou 6 *megawatt* soler. Nou'n enstal 4 *megawatt* batri. E tousala e lezot proze ankor ki nou pe fer ki mon napa letan pou nonmen. Alor tousala i met en presyon enorm lo *PUC* kot nou bezwen ekspertiz, mon *emphasizes* lo 'ekspertiz.'

E osi lafors pou nou kapab mentenir tousala, kit zot a en eta ki permet li marse pou en lavi ki in ganny *design* pou li fer.

Otreman si nou pa rod *expertise* anmennen, souvan sa *expertise* nou bezwen fer li sorti a aletranze. Nou pou kit sa

sistenm i pou tonm an dezolasyon e nou pa pou kapab mentenir li.

Alor an menm tan ki nou anmenn etranze isi. Nou annan en kantite Seselwa, Mr Speaker nou annan en kantite zenn Seselwa dan *PUC* ki pe partisipe ozordi. Pe fer sistenm marse. Petet i pa evidan nou war detrwa etranze e nou dir be i annan tro bokou etranze.

Mon osi mon pa anvi war en kantite etranze dan *PUC*. Me i annan en kantite Seselwa ki pe kontribye ozordi. Zenn Seselwa e i fer mwan plezir pou mwan dir sa. Mersi.

MR SPEAKER

Mersi *CEO*. Mon le remersye bann Manm pou zot kestyon e zot partisipasyon. Mon ava remersye Minis ek son delegasyon. Mr Morin e son teknisyen. E osi pou bann zofisye ki dan *Gallery* pou zot letan e larepons ki zot in donn nou.

Mon ava swet zot bonn rout e bon depar. Avek sa nou ava *adjourn* pou ozordi, e nou a rebran travay demen bomaten *Adjourn*.

(ADJOURNMENT)